

Bernard 1925

First edition of this famous book
Lord Kelvin calls it "The beginning
of the literature of Revolution."


He attributes it, I think rightly, to
Duttenne de Kormac.

Barbier to Albert Langen.

Digitized by the Internet Archive
in 2017 with funding from
Getty Research Institute

Really issued at Basel.

DV208





VINDICIAE,
CONTRA TY-
RANNOS:

SIVE,

DE PRINCIPIS IN
*Populum, Populique in Princi-
pem, legitima potestate,*

STEPHANO IVNIO
Bruto Celta, Auctore.

Blanchard

EDIMBURGI, AN.
NO M. D. LXXIX.

HOC LIBRO INFR A
scriptæ Quæstiones explicantur.

- I. An subditi teneantur, aut debeant Principibus obedire, si quid contra legem Dei imperent.
- II. An liceat resistere Principi, legē Dei abrogare volenti, Ecclesiāve vastanti. Item, quibus, quomodo, & quatenus.
- III. An, & quatenus Principi Rempubli-
cam aut opprimenti, aut perdenti,
resistere liceat. Item, quibus id, quo
modo, & quō iure, permissum sit.
- IIII. An iure possint, aut debeant vicini
Principes auxilium ferre aliorum
Principum subditis, Religionis pu-
ræ causa afflictis, aut manifesta Ty-
rannide oppressis.

IMP. THEOD. ET
VALENTIN. CAES.
ad Volusianum Præfe-
ctum Prætorio.

DIGNA vox est maiestate regnantis,
legibus adligatum se Principem profite-
ri. Adeo de auctoritate iuris nostra pēdet au-
ctoritas. & re vera maius imperio est, submit-
tere legibus Principatum. Et oraculo præsentis
Edicti, quod nobis licere non patimur, aliis in-
dicamus. Dat. I I I. Id. Iun. Rauennæ, Florē-
tio & Dionysio. Coss.

IUSTINVS LIB. II.
de Lycurgo Legislatore.

NON habētibus Spartanis leges instituit;
non in uentione earum magis, quàm ex-
emplo, clarior. Siquidem nihil lege vlla in alios
sanxit, cuius non ipse primus in se documenta
daret. Populum in obsequia Principum, Prin-
cipes ad iustitiam imperiorum firmavit.

L. SCRIBONIVS SPIN-
ter, Belga, Lectori.

COMPTOR Superum Maculosi no-
mine notus

VELLERIS, Etruscus scurra, Sophista
loquax,

Arte mala, Populi Harpiyas senosq₃ Tyrannos
Instituit, Pestis maxima Christiadum.

Iunius hoc Reges Veros, Proceresq₃, libello
Efformat, Populos & sua iura docet.

Nempe caput magno Ciuili in corpore Reges,
Corporis & Populum cetera membra, facit.

Membra sed vt laeuent, capiti ad versatia: Sanu,
Tusce, erit anne caput, quod sua membra
premit?

Sint igitur Reges Populis re, vt foedere, Leges,
Nominē reque Patres, iustitiaq₃ duces.

Totus ad exemplum Regis componitur Orbis,
Rex quoque sic Populi se sciat esse caput.

Hunc Veteri Reges referat de more triumphum,
Quod Patriae Patres, quod Populo socij.

CONO

*forte Philip.
- Motray.*
CONO SVPERAN-
TIVS VASCO PRIN-
cipibus Reipublicæ, Piis,
Fidelibus.



NON eram nescius, o
viri Principes, cum
has Stephani Iunij
Bruti, de vero Prin-
cipis in Populum, &
Populi in Principē,
iure & potestate,
Quæstiones in vul-
gus emitterem: fore nōnullos, qui me re-
prehenderent. Pugnante enim ex diame-
tro cum Nicolai Machiauellij Florentini,
quem in gubernanda Rep. ducem illi ha-
bent, malis artibus, prauis cōsiliis, & fal-
sa pestiferáque doctrina. Mihi igitur, vt au-
daci, vitio vertent, opinor, quò aliquid ad
calumniam rapiár, quòd ego nulla vobis
nominis fama cognitus, hisce rãtis de re-
bus ad vos, hoc tempore maximè, scribe-
re non vereor. Sed constans in Rempubli-
cam meus amor, & animus, quem in eam
perpetuo defixum gero, hunc mihi metū
excusserunt. Deinde iudicaui, has dispu-
tationes vobis sanè præcipuè deberi. Nec

P R Æ F A T I O.

enim de leuibus rebus habentur, sed longè grauissimis, & in tot Reip. perturbationibus cognitu necessariis. Itaque differunt de vera Principis & Regum, à quibus antiquum ducitis genus, tuenda Maiestate, & de eo Populi conseruando iure, quod optimæ leges, ac gentium probati mores vno omnium consensu constituerunt. Ac certè vestrorum quidam, quo hæc Regis Maiestas, & vetusta Populorum iura in Galliis restituantur in integrum, Imperatores eò exercitum duxerunt, aduersus eam gentem, quæ cælitum & hominū contemptrix, calliditatis & perfidiæ viribus artibusque subnixa, eo ingenium omne contulit, potentiam & robur, vt Gallos natura liberos, & omnis antiquitatis moribus, legibus, & institutis penitus ingenuos, in barbaræ crudelitatis seruitutē redigat. In his autem Quæstionum decursibus veterem illam Regna gubernandi, nimirum perfectam effigiem, tanquā marronam legitimam, castam, integram, nec ullis comptam calamistris, intuebimur, pro qua nobis Machiauelliani illi spuria, fucata, impudicam & improbam, substituere non dubitant. Quæ vetus Provincias, Regna, & imperia administrandi ratio

P R Æ F A T I O.

tio Maiorum vestrorum fuit, eamq; Principes omni Regiarum virtutū genere cumulatifsimi, veluti per manus traditam, quandiu vixerunt, diligēter obseruarunt. Meritò ergo has à vobis Quæstiones oportuit cognosci. Postremò mihi iure persuasi, si vobis has dissertationes inscriberem, fore, vt à multis diligenter ob nominis, ac gentis vestræ celebritatem legerentur. quas alioqui tamen non pauci cupidè propter invidiam & motus discutient, omnes peramāter ob elegantiam doctrinæ, æquitatemque causæ, etiam obviis vlnis excipient. Et quidem ea re studiosius, quòd nulla quemquam insectandi cupiditate, aut vllarum partium gratia scriptę sunt, sed solo veritatis ob oculos ponendæ desiderio, ex Gallicarum calamitatū necessitate, ac ruinis; quò promptum aliquod firmumq; remediū, perpetuumque posteritati quærat, fuerunt diffusius explicatæ. Id quod, qui eas attentè legent, etiam quocunque tempore legent, cuiuscunque partis ij quoq; sint, aut nationis, conditionisve, modò tamen Christianam Religionem, vel quam Pontificiam, vel quam Reformatam appellāt, profiteātur, facile certoque perspicient.

PRÆFATIO.

II Itaque cum de Galliæ calamitatibus mihi multus cum Bruto, erudito, prudenter, nobiliq̃ue viro, sermo esset circiter ab hinc biennium, & vltro citroq̃ue nō pauca de earum originibus, causis, initiis & progressibus percurrissemus, eò tandem ventum est, vt, inter cetera, studio librorū Machiauellij, maximè crederemus acui quorundam ingenia, quo, artes perturbādi Remp. ex eorum auctoritate, qui eam regunt, amplecterentur. Quarum artium fundamenta, eum in iis libris, sparsim pessimis ea de re præceptionibus editis iecisse, satis vtrique constitit. Remedium nullum certius promptiusq̃ue fore, quàm si Principum imperium, ac ius populorum, qui eis subsunt, ad sua legitima certaq̃ue prima principia, referretur, intra certos fines, vtrorumque potestatem, ea ratione conclusum iri, quos vltra citràq̃ue recta Reip. administratio planè non possit consistere; neque tradita à Machiauellio disciplina, nempe ab iis principiis prorsus eversa recipi. Mihi deinde harū Quæstionum librum, in quibus hæc principia continentur, atque probantur, & exponuntur, misit, quo eas ipse legerem, & sententiam de iis meam significarem. Præclare equi-

PRÆFATIO.

equidem Iunius Stephanus, qui nihil antiquius habuit, quàm ut has Quæstiones, publici commodi gratia, Christianæque Religionis farta recta tuendi causa, magnis laboribus studiisque perficeret. Eas ego, ô Principes viri, Machiauellianis & hominibus, & libris, quorum sceleratis consiliis Respublica in tot civiles dissensiones, partes, morusque, dissecta est, opponi posse censeo, tamquam Principia, quæ vocant, firmissima, vel columnas, aut Regulas, eius, hoc præsertim tempore, rectè reformandæ & collapsæ, legitima gubernandi ratione denuo sursum erigendæ, certè piis prudentiaque præstantibus viris summè placituras esse confido.

III Tametsi autem Machiauellianos quosdam, vel Tyrannorum mancipia, in Iunium insurrecturos, nō abs re suspicor; quia tamen id hoc nomine facturi sunt, quod per harum Quæstionum Principes rationes, si vos eas audietis, metuunt malas suas artes in ordinem quasi redactum iri; & se à vobis Regibus Principibusque Populoque detegendos: quid eorum iras Brutus, vir magnanimus, aut clādestinos susurros curet? Lætetur ille, eorum iniustitiam, scelera, rapinas, fraudes, tandem

P R Æ F A T I O.

aliquando ad certissimam Regum Populorumque salutem, in quam vnam rem omnibus viribus incumbendum est, diligentia, curaque sua patefieri. Quod si falsa doceri dicunt, id ostendant, necesse est. Sed id quomodo, quæso, præstabunt? Nam quæcunque in his Quæstionibus adferuntur, ea claris equidem, non verò detortis Sacrarum literarum testimoniis esse certa, demonstrantur; ex Morali, Politicisque scientiæ doctrina, & Naturæ, ac legum iussis, Iurisperitorum responsis, Imperatorumque rescriptis confirmantur; diuersarum Gentium moribus & institutis adstruuntur; in illustribus ac variis variorum Historicorum exemplis, tãquam in speculo, spectanda proponuntur. Ad docendi rationem quod pertinet (Philosophos, ac disputatores alloquor) ille, quo planius & certius rem ostendat, ex effectis & consequentibus causas & Maximas illas propositiones, sive regulas, colligit, ob oculosque ponit, & cognoscendas exhibet, veluti gradibus quibusdam ad summa conscendens: ut Geometrarum more, quos hac in re imitari videtur voluisse, ex puncto lineam ducat, ex linea superficiem, ex superficie corpus cõstituat.

quo

P R Æ F A T I O.

quo genere quidquam ostendendi, vel probandi, quid clarius, aut breuius, quid denique certius firmitusque esse potest? In quibus expendendis summam quandam animi moderationem adtulit, inquirendę diligentęque perscrutandę rei veritati, tanquam in puteum demersę, deditus. Quam erutam ex profundo, & omnium oculis expositam, si qui nolint intueri, planę sunt improbi: si qui, quam vniuersi vident, eam conspiciere nequeunt, planę cęci. Ad hęc ergo modum discussis illis nostris Quęstionibus dilucide necessarioq; consequitur; quodnam Principis in Populum sit munus; & quod Populi in Principem ius & officium, & hęc munera inter se distincta esse, mutua tamen & reciproca. Porro vtriusque certos esse terminos à Deo & Natura, Gentiumque moribus constitutos: qui transibit suos, eum grauius in Deum ac leges, iusque Gentium peccare. his metis transgressis, manere in Republ. rerum confusionem: ab ea, ciuilis humanique fœderis dissolutionem; inde Tyrannidem; ex Tyrannide, immanem seditionem; ex ea, ciuile bellum radices agere. Constituto autem vinculo illo humanę societatis firmo, atque metis illis ac finibus

P R Æ F A T I O.

nibus positis, ut Quæstiones ostendunt,
 & eos veris iustisq; principiis decernunt,
 atque stabiliunt, anne Machiauellij doctrina
 funditus, nulloque negotio, planè cor-
 ruit? & uti futilis, impia, & humano gene-
 ri perniciosissima, radicitus evellitur? Ne
 que fulcra ei sic ruituræ quisquam potest
 subiicere, quæ illam vllò omnino modo
 munire queant. Veruntamen esto liberū
 Machiauellianis in hanc arenam descen-
 dere: prodeant. Illis, quæ diximus, scriptu-
 ræ Sacre, Philosophiæ de moribus ac Rei-
 publicæ, legum, Morum, Gentium, & Ex-
 emplorum veris ac legitimis armis ute-
 mur, pedemque cum iis audacter confere-
 mus. Si se congressuros negant, iam metū
 suum prodent: seque eo victos restabun-
 tur. Si singulare certamen propter arma,
 cum iusta sint tamen, detrectat: quid nos
 cum iis porro pugnemus? Cōfitemur, ne-
 que palam confiteri pudet, nos esse Chri-
 stianos, nec nobis cum ea gente, quæ hæc
 arma repudiet, commerciū vllū, tanquam
 cum iis, quibus sit aqua & igni interdictū,
 esse velle. Iam verò, quoniā, æquitate cau-
 se destituti, nihil equidem sunt, quod ob-
 iiciant, habituri, seditiosas esse Quæstio-
 nes, fortassis exclamabūt, atque, falsa es-
 se ea-

P R Æ F A T I O.

se earum Principia dissertabunt. rationib. non gladiis, agant. Sin autē vera, cur seditiosas appellent? cur Principū manipulos in illas arment? An Princeps id quod verū est, ignoret? in re maximē, quē & sua tanti, & Reip. quidē, interest? Veritas solis sanē Tyrannis, qui omnia nō ex vtilitate publica, sed ex propria libidine metiūtur, quos adeo operosē illi instituūt, seditio esse potest: Sapienti autem, Pioq; ac Fideli Principi; quem Quēstiones istæ docēt, & erudiunt, summa tantū virtus.

IV Sed, vt hæc Quæstionum Principia, & decreta esse scitis, ô Principes Pij, Fideles, multò iustissima: sic etiam, ea vos, re ipsa probare, tot illustres vestræ actiones, perpetuumque vestrum Pacis conciliandæ studium, & tot vestræ demum expeditiones, clarē testantur. Itaque par est, vt, indicato ex his decretis pharmaco, & vero remedio, coniunctis vnā omnes viribus, certē tandem aliquando medicandis huius temporis dissiidiis, & nātis inde malis, salutares manus adhibeatis. Vos equidē Deus Optimus Maximus, iis animis & consiliis erexit, & Imperatoribus armauit, atque tot gentium fauorib. eovsq; beaut, vt & vestram constantiam, nostri
tempo

P R Æ F A T I O.

temporis adulationibus, & vestram fortitudinem nostrorum Gygantū audacię, & huius deniq; sæculi socordię, virtutē inclytę vestrę familię, ac gentis, in tot Gallicis perturbatis negotiis, rebus, provinciis, Proceribusq; viris, opposuerit. Vos igitur harum Quæstionū Principia secuti, iustitiam in Gallia defendendam suscepistis; eo exercitum cōscripsistis, collegistis, duxistis. Demonstrant verò illiæ, vos nō solū id iure potuisse, posseq; facere; verū etiā debere. Nos igitur pro vestra salute vota libēter concipimus, atq; speramus, vos piis victoriis & rebus illustres tandem aliquando cōposita firma pace, contra crudelem illum immanissimū Tyrannum Turcam, diuino beneficio ex cōmuni omnium ordinū (vos omnes compello Christiani Principes) decreto, animum, copias, militarem scientiam, virtutem, auctoritatē, atque fortunā esse conuersuros: quò vobis ducibus, Respublica Christiana de hoste potentissimo, longēque superbissimo ad summā Christi gloriam, Ecclesię salutem, & Reip. quietem triūphet. Id quod Deus Opt. Max. faxit, obtestamur vniuersi, supplicesque poscimus. Valete. Kal. Ian. M. D. LXXVII. Soloduro.

PRIMA QVÆSTIO,

*AN SUBDITI TE-
neantur, aut debeant Principibus
obedire, si quid contra le-
gem Dei imperent?*



IDEBITVR fortas-
se prima fronte hæc
quæstio planè otiosa
& invtilis, qua nem-
pe Christianorum a-
xioma certissimum;
tot Scripturæ sacræ
testimoniis, tot sæcu-

lorum exemplis, tot piorum Martyrum
rogis comprobatum, quasi etiamnū con-
troversum in dubium vocari videatur. Vn-
de etenim, dices, tot tantæque piorum æ-
rumne, si ex vna hac causa, quòd Deo sim-
pliciter & absolutè, Regibus verò, quate-
nus adversus legē Dei nil imperent, obtē-
perandū esse, perpetuò iudicarint? Quor-
sum verò alioqui Apostolorum respon-
sum

sum, Deo magis, quàm hominibus parendum esse? Deinde, cùm sola vnus Dei voluntas perpetuò iusta sit, ceterorum iniusta subinde esse possit; quis ambigat, quin illi vn̄i absque vlla exceptione, his cum aliqua semper exceptione parendum sit? At certè cùm hodie multi Principes existant, etsi Christi nomē ij iactitant, qui immensam potentiam ne ab ipso quidē Deo pendentem sibi audacter arrogant; multi adulatores, qui quasi Deos terrenos eos adorent, multi etiam, qui seu metu occupati, seu alia vi coacti, nulla in re denegādum esse Principibus obsequium aut censeant, aut censere videri velint; & vitium prætereā nostrorum temporū hoc esse videatur, vt nil tam firmum sit, quod non convellatur, nil tam certū, quod non controvertatur, nil tam Sanctū, quod non violetur: vereor sanè, ne cuius rem accuratè perpendenti, non modò non inutilis hæc quæstio, sed planè necessaria, nostro præsertim sæculo, videatur. Mihi certè causam tot tantarumque calamitatū, quibus ab hinc annis aliquot orbis Christianus divexatur, examinanti, succurrit illud Osee Prophetę: Principes Iudæi iis similes fuerunt, qui terminum mouent. itaque

taque iram meā aquæ instar in eos effundam. Ephraim verò conteritur in iudicio, quia impia mandata sequutus est. Peccatum & Principum; & populi, vno verbo hîc habes. Terminos verè mouent ij Principes, qui illa iurisdictione non contenti, quam ipsis tribuit Deus Opt. Maximus, eam, quam sibi supremam in omnes retinuit, vi invadere conantur. quibus, inquā, nō sat est; bonis corporibusque subditorum pro arbitrio & libidine vti, ni etiam miserorum animas, quod Christi merum peculium est, sibi vendicent, qui solo non contenti, cælum etiam ipsum audacter agrediuntur, admotisque scalis invadere conantur: nimirum, vt ait Poeta Ouidius,

Quæ licet, affectant cælum isti. Tempia Quirinus,

Liber & Alcides, & modò Cæsar habent.

Populus verò impia mandata sequitur, qui adversus legem Dei quicquam iubentibus aut assentitur, aut assentatur, qui tãquam diis thura quodāmodo adolet, qui solium Dei affectantibus, cū possit, nō repugnat, qui quæ propriè Dei sunt, Cæsari tribuere non veretur. Nemo verò est, qui hæc non videat. Si quis Principi impia iubenti non obtemperat, cōtinuò re-

bellis, perduellis, Maieſtatis reus habetur. Iis calumniis petebatur Chriſtus, iisdem Apoſtoli & primi omnes Chriſtiani. Si quis. Elſdræ, (4.) aut Nehemię (5. ver. 7.) exemplo; Templum Domini extruere parat, regnum affectat, res novas molitur, in Remp. cuniculos agit. Obſtrepere verò Regibus cōtinuò adulatōres innumeros audias, ſi ſemel reſtauratum fuerit Templum iſtud, actum eſt de regno: non eſt, quòd vlla amplius tributa, aut vectigalia ab iſtis hominibus expectes. Quæ verò iſthæc inſania eſt? Eæ demū Reſpublicæ firmæ cenſendæ ſunt, quatum in medio Templum Dei collocatum eſt, quæ ipſæ Templum Dei ſunt. Ij Principes verè regnant, qui cum Deo regnant, cum omnes omnino per ipſum regnent. At cōtrà quæ κακοφιλία hominum eſt, nec Rempublicam bene cōſtitutam, niſi everſo Templo, nec Regnum, niſi expulſo, ſi fieri poſſit, Deo Opt. Max. tutū firmūque putarit? Hinc verò tot Gigantæi auſus, & Gigātæorum conſimiles exitus, tot Principum exitia, tot Gentium excidia. Quod ſi noſſent ij, quid inter Deum & Cæſarem interſit, inter Regem regum & Regem, inter Dominum & vaſallum, quid ſibi ille à ſubditis tributi

tributi nomine poscat, quid ipsis in subditos permittat: proculdubio neq; tot Principes Regnū Dei turbare conarentur, neque etiam in ipso conatu, iusta Dei iudicis & vindicis ira, proprio regno deturbarentur. Neque verò præterea tot calamitates, direptiones, vastationes Populus pateretur. Interest ergo Principum, scire, quatenus imperare debeāt; subditorum, quatenus parere, ne aut illi alienam iurisdictionem invadendo; aut hi extra iurisdictionem ius dicenti parendo, in pœnam incidant. Hic verò est Quæstionis propositæ scopus, cuius Sacra præcipuè scripturam iudicem faciemus.

Quæritur, An subditi teneantur Regibus obedire, si quid adversus legē Dei imperent? id est, utri potius, Deo an Regi obediendum sit. De Rege, cuius amplissima censetur potestas, si constiterit, de cæteris magistratibus eadem via constabit. Primum docent Sacrae literæ, Deum suapte auctoritate regnare, Reges quasi precario: Deum per se, Reges per Deum: Deum iurisdictione sua uti; Reges delegata tantum. Sequitur itaque, Sapien. 6. Proverb. 8. Job 12. &c. Dei immensam esse iurisdictionem, Regum dimensam: Dei infinitam

potentiam, Regum præfinitam : Dei Regnum nullis limitibus circumscriptum esse, Regum contra certis regionibus regi, certis cancellis terminari. Deinde Deus ex nihilo creauit cælum & terram. Itaque is iure cæli & terræ dominus est, & verè proprietarius. Quicunque verò terram inhabitant, eius tanquam coloni sunt & emphyteutæ: quicunque in terra ius dicunt, & aliqua ratione cæteris præsunt, Dei beneficiarij & clietēs sunt, ab eoque investiturā capere & agnoscere tenentur. Deus denique solus proprietarius est, solus dominus: homines omnino omnes, quo gradu tandem ij sint, coloni, villici, ministri, vasalli, qui quo ampliores fructus percipiunt, eò maiorem censum debent: quò maiori authoritate potiuntur; eò seuerius rationem reddere tenentur, quò clariore honorem consequuti sunt, eò grauiori oneri sunt obnoxij. quod & Scriptura sacra passim docet, & pij omnes, imò præstantissimi quique Ethnici semper agnouerē. Domini, ait David Rex, est terra, & plenitudo eius: ac ne homines suis vomeribus sacrificēt, nil terra ipsa absq; cæli pinguedine proferre solet. Ideò verò Deus sibi à suis omnium frugum primitias cōsecrari poscit

Psal. 24.

poscit. & Ethnici ipsi vltro dicauere, quibus sese colonos, ipsum verè Dominum profiterentur. Cælum Domini solium est, ait rex Salomon, terra subsellium. Itaque cum reges omnes eius pedibus subiecti sint, non mirum, si Deus Rex regum, & Dominus dominantium, Reges verò omnes, ministri regni eius, iuri dicundo constituti, vocitentur. Per me, inquit Dei sapientia, reges regnant, & Principes iudicant terram. At ni faxint, soluo ego baltheum regum, & cingo renes eorum cingulo. ac si diceret: meum est, stabilire reges in solio, aut deturbare pro meo arbitratu. Hinc solium Regum, solium Dei dicitur. Benedictus, ait Regina Sabæ Salomoni, Deus tuus, qui te posuit super solium suum, vt regem loco domini Dei tui, vt facias iudicium & iustitiam. Sic & Salomonem alibi in throno Domini, aut in throno regni Domini collocatum legimus. Eadem ratione Populus ipse, Dei Populus & hereditas perpetuò dicitur: Rex verò administrator eius hæreditatis, & dux populi Dei. quo titulo Dauid, Salomon, Ezechias & cæteri pij Principes nominatim afficiuntur. Cum verò sancitur fœdus inter Deum & Regem, ea conditione san-

Esa. c. 66.

v. 1.

1. Reg. c. 8.

Sap. 6. v. 1.

Prou. 8. vis.

Iob. 12. v. 16

Daniel 2.

vers. 21.

1. Chro. c. 9.

vers. 8.

2. Chro. c. 9

vers. 8.

1. Chron. c.

29. v. 23.

1. Sam. c. 9.

v. 16. c. 10.

vers. 1.

2. Sam. c. 6.

vers. 21.

2. Reg. c. 20.

vers. 5.

2. Chro. c. 1.

v. 9. &c.

2. Reg. c. 11.
2. Chron. c. 33
7. 16.

citur, vt Populus sit, & perpetuò maneat Populus Dei, nempe vt ostendatur, deum sua se proprietate & possessione non exuere, cùm Populum regibus tradit, sed regendum, curandum, pascendum tradere, non secus ac is, qui gregi pastorem eligit, gregis nihilominus dominus manet. Hoc perspicuè agnouerūt pij reges, Dauid, Salomon, Iosaphat & cæteri, qui etsi Deum Regnorum & Gentium Dominum agnoscebant, nihilo tamen minus regnabant: imò eò magis, quò alacrius deo seruiebāt.

2. Chron. c.
20. 7. 6.

1. Chron. c.
29. 7. 11.

Hoc idem Nabuchodonozor ipse, quantumvis Ethnicus & potens Monarcha, tandem profiteretur. quē cùm Daniel Regē regum vocaret, cui Deus cælorum, regum potentiam, & gloriam dedisset: Quinimo, ait, ô Daniel, verè Deus tuus est Deus Deorum, & dominus Regū, qui regna tradit quibuscumq; vult, vel omnium hominum vilissimis. Propterea verò & Xenophon ipse, in inaugurando Cyro, deo imprimis litatum dicit: & passim Ethnici etiam authores Deum Opt. Max. regē sum mum prædicant. Hodie verò in Christianorum Principum inauguratione, ij perpetuò Dei famuli, Populo suo regūdo destinati nuncupantur. Cùm itaque reges,

Dan. c. 2. 7.
37. c. 4. 7.
74.

Dei

Dei vicarij tantum sint, in Dei folio ipso authore constituti, Populusque sit Dei Populus: nec verò vicariis, nisi eorum, quorum personam gerunt, causa honos deferatur; sequitur procul dubio, regibus propter Deum, non adversus Deum, Deo servientibus, non adversantibus, Dei iuramentibus, non invadentibus, obtemperandum.

Hic obiiciant forte nobis Assentatores aulici, Deum suam omnem in reges auctoritatem contulisse, cælum sibi retinuisse, terram agendam ferendamque pro libito regibus tradidisse: Cæsarem denique diuisum cum Ioue imperium habere. Digna sane vox Cleone aliquo impurissimo Alexandri adulatoris, aut Martiale, qui Domitiani edicta, Domini dei que edicta vocare non veretur. Digna & nefandissimo Principe Domitiano, quem Dominum deumque etiam vocari voluisse, Suetonius narrat. At certe & pij Principis auribus & piorum subditorum ore prorsus indigna. Manet semper illa Dei omnipotentis sententia: Non dabo nomen meum alteri, non transferam gloriam meam in alium, id est, non eam cuiquam potentiam tradam, quin summum ius mihi

*Esai. 48.
ver. 11.*

Psal. 2.

Sapient. 6.

perpetuò recipiam, Deus sua se potentia
 & authoritate nunquam exuit, Sceptrum
 in manu tenet, quo frementes reges com-
 pescat & contumaces cõterat. Libram in
 altera, qua ius iniquè distribuẽtes exami-
 net. Supremi verò imperij nulla certiora
 signa dari possunt. Quòd si aut Impera-
 tor, cum Regem aliquem creat, saluo sem-
 per summo imperio id facit, aut rex, puta,
 Franciæ, cum extraneo, vel etiam fratri fi-
 liòve ditionem regendam possidendam-
 ve tradit; casus regios, animadversionem
 Regiam & supremũ dominatũ perpetuò
 recipit, quin & si minus in formula inve-
 stituræ fiduciæve expresserint, ipso iure
 excepisse putatur. Quantò verius Deus in
 omnes Reges, in seruos, inquam, & mini-
 stros, eam sibi authoritatem retinet, à qui-
 bus & rationem eum reposciturũ, & pœ-
 nas de iis sumpturum, si suo officio malè
 fungantur, toties legimus? Reges itaque
 regis regum vasalli sunt, per gladiũ regiæ
 authoritatis insigne, investiti, vt eo gladio
 legem diuinã tueantur, bonos protegant,
 malos perdāt, non secus ac per ensem, scu-
 tum, vexillũ, vasallos à Domino superiori
 feudo investiri videmus, ea lege, vt ei iis-
 dem armis, quandocumque opus fuerit,
 militent.

militent. Vt verò vasallos eos definiamus,
 ita & quæcunque vasallis, regibus, appri-
 mè etiam conveniunt. Vasallus feudum à
 domino superiore accipit, cū munere iu-
 ris dicendi & onere militiæ coniunctum.
 Rex regū à Deo, vt iudicet Populum suū,
 & adversus hostes tueatur. Vasallus legem 1. Sam. c. 8.
 & conditionem à Domino superiori acci- et c. 9. v. 20
 pit. Rex à Deo iubēte, vt legem suam per-
 petuò obseruet, & ante oculos habeat. Si
 fecerit, tum ipsum, tum posteros regnum
 diu possessuros; sin contrà, contrarium ex-
 perturos. Vasallus sese domino superiori
 iureiurando devincit, fidemque & obse-
 quium promittit. Rex pariter ex legis di- Deut. 17.
 uinæ præscripto sese imperaturum iurat.
 Vasallus denique, ni iusiurandum seruet,
 feudum committit, ipsoq; iure sese omni
 prerogatiua priuat. Rex quoque, si Deum
 negligat, si ad eius hostes trās fugiat, si fe-
 loniam adversus Deū committat, & ipso
 iure regnum committit, & ex facto plerū-
 que amittit. Hęc ex fœdere inter Deum &
 regem fieri solito (confœderatorum enim
 nomine seruos suos dignatur Deus) per-
 spicua erunt. Duplex autem fœdus in Re-
 gum inauguratione legimus: primum, in-
 ter Deum & Regem & Populum, vt esset

Populus, Dei Populus. Secundum verò, inter Regem & Populum, vt bene imperanti bene obtemperaretur. De secundo postea videbimus; de primo hîc nobis agendum est.

*Fœdus inter
Deum &
Reges.*

In Ioë inauguratione legimus sanctum fuisse fœdus inter Deum & Regem & Populum, aut, vt alibi dicitur, inter Ioradam summum sacerdotem, & vniuersum Populum & Regem, vt esset Populus Dei.

2 Reg. c. 11.

2. Chro. c. 23

ver. 16.

2. Reg. c. 23.

Similiter Iosiam & vniuersum Populum fœdus iniisse cū Deo. Vnde intelligimus in hoc fœdere faciundo stipulatum fuisse summum sacerdotem Dei nomine, à Rege & Populo, tanquam verbis conceptis, An non curaturi essent, vt Deus purè & ritè in Regno Iudaico coleretur. An nō scilicet ita regnaturus esset Rex, vt populum Deo seruire sineret, inque Dei lege contineret. Deinde, an non ita populus Regi obtemperare vellet, vt nihilo secius Deo in primis obsequeretur. Regē verò & Populum tanquam reos promittendi, in legem Dei iurasse, seseque solenni sacramēto Deo colendo imprimis obligasse. Vnde ex facto, cum primum istud fœdus sanctum est, Iosias & Ioas destruunt idololatriam Baal, & cultum Dei restituūt. Capi-

ta verò

ta verò fœderis hæc erant in summa: Vtrum Rex ipse, tum etiam Populus vniuersus, Deum ex legis suæ præscripto, & singuli colerent, & vniuersi colendum curarent. si facerent, Deū ipsis affuturum, rei q; publicæ illorum præfuturum. Sin minus, missos facturum & disperditurum: quod ex multorum scripturæ locorum collatione apparet. Moses moriturus, eas conditiones fœderis vniuerso Populo recenseret, moxque legem, id est, ipsa pacta conventa Domini, in Arca fœderis asseruari præcipit. Mose vita functo, Iosue constituitur dux Populi Dei. Dominus itaq; ipse eum admonet, si res suas prospere gerere velit, ne à lege latum vnguem recedat. Is verò cum primum Israelitæ terram Chanaan ingressi sunt, vt palam eis faciat, qua conditione in eam possessionem à Deo mittantur, sacrificiis ritè peractis, legem corā vniuerso Populo legit, moxque mira, si iis pactis starent, pollicitus, dira, si negligerent, minatus. In summa, si legē seruarent, prospere rem gesturos: sinsecus, disiectum ac pessundatum iri obtestatur. Idem quoque moriturus, & evidentius quidem. Quotiescunque verò eam deserunt, in manus Chananzæorum traduntur, & Tyrannis

2. Chro. c.
23. ver. 16.
E. 17.

Deu. 29. 30.
31. cap.
Deu. 31.
v. 26.

Iosue c. 1.

Deu. c. 27.
v. vlt.
Ios. c. 5.
Ios. c. 24.

1. Sam. c. 12.

nis mancipantur. Iam idem omnino fœdus, quod inter Deum & Populum sub iudicibus fuit, sub Regibus & cum regibus obtinuit. Postquam Saul vnctus, electus & planè constitutus est, Samuel his verbis Populum affatur; En Regem, quem elegistis, & petiistis. Ecce Deus posuit eū Regem super vos. Obedite & seruite Deo, tã vos, quàm Rex vester, qui est super vos. Alioqui & vos, & Rex vester peribitis. Quasi dicat: Voluistis Regem, Deus hunc vobis Regem dedit. Ne tamen putetis Deum quidquã de suo iure imminui vel- le, velim intelligatis, Regem non secus ac vos, huic legi custodiendæ devinctum esse, ac, ni fecerit, eandem pœnam passurum; denique, Saulem esse Regem quidem vobis datum, qui in bellum, vt cupiistis, vobis præeat, at ea lege, vt legem Dei interim sequatur.

1. Reg. c. 2.
ver. 4.1. Reg. c. 6.
ver. 12.2. Chro. c. 6.
v. 16. c. 7,
ver. 17.

Eiecto Saule, quòd pacto non steterisset, David eadem lege Rex constituitur, vt & Salomō quoque Davidis filius. Si legem meam obseruaris, ait Dominus, ego confirmabo tecum pactum, quod pepigi cum Dauide. Quodnam verò est hoc pactum? Extat in in libro Paralipomenon his verbis: Nūquam avelleretur à facie mea
successor

successor ex tua stirpe in folio Israelis, mo-
 dò filij tui obseruent legem meam tuo ex-
 emplo. Sin verò idolis seruiant, expellam
 vos è terra, quam vobis possidendam de-
 di, &c. Hinc liber Legis tempore Iosif re-
 pertus, vocatur liber fœderis Domini;
 (quem Deus Sacerdotes Regi tradere iu-
 bet, proindeque Samuel Sauli tradit) ex
 cuius præscripto Iosias ipse inicit fœdus co-
 ram Domino. Hinc etiam Lex, quæ in Ar-
 ca seruabatur, vocatur Pactio Domini cū
 filiis Israel. Deniq; Populus seruitute Ba-
 bylonica liberatus, fœdus cum Deo reno-
 uat, & quòd Pactum Domini violasset, tot
 se calamitates meritò passum agnoscit.
 Perspicuum ergo est, Reges, tanquam va-
 sallos in legem Dei tanquam superioris
 omnium Domini, iurare. At verò, quod an-
 tea attigimus, si fidē non seruant, si legem
 violant, vrillos feudum propter feloniā,
 sic hos regnum committere legimus.

Diximus idem esse fœdus inter Deum
 & Reges Iudæorum, quod antè inter Deū
 & populum sub Iosue & iudicibus. Vide-
 mus verò passim populum, si quando le-
 gem neglexit, aut fœdus pepigit cū Baal,
 mancipatum fuisse seruituti Regum Cha-
 naan, Iabini, Eglonis & ceterorum. Vt au-
 tem

2. Reg. c. 23.

ver. 2.

Deut. 17. v.

18.

1. Sam. c. 10.

v. 25.

2. Chro. 6.

v. 11.

Nehem. 9.

Iudic. 9.

v. 33.

Iudic. c. 2. v.

24. c. 4. v.

2. Cor.

1. Sam. c. 13.
v. 13.
1. Sam. c. 15.
v. 26.

tem idem fœdus est, ita eadē est fœdifra-
 gorum pœna. Saul contra quàm lege Dei
 sancitū erat, sacrificia tractare audet, mox
 etiam contra disertum Domini mandatū
 Agagum Regem Amalecitarum seruat.
 Propterea & rebellis vocatur à Samuele,
 & rebellionis demum pœnas luit. Sacri-
 ficasti tu, ait. At præstitisset te obsequutū
 esse Deo. Obsequium enim præstat sacri-
 ficio. Reiecisti Dominum Deum tuum, at
 ipse te reiicit, ne amplius regnes super I-
 sraelem. Adeo verò hoc iuris obtinet, ut
 non secus ac propter Maiestatis, affectatī-
 ve propriè regni crimē filij paterno feudo
 priuantur; non ipsi modo Reges, sed ipso-
 rum adeò liberi easdem ob causas regno
 spolientur. Salomon à vero Deo ad idola
 deficit. Ahias Propheta, Regnum Israeliti-
 cum cōtinuo sub Roboamo filio diuisum
 iri prædicit. Completur denique verbum
 Domini, ac decem Tribus, pars regni po-
 tissima, à Roboamo, ad Ieroboamum e-
 ius seruum deficit. Cur ita verò? Quia, ait
 Dominus, defecerunt à me ad Astaroth
 Deum Sidoniorum, & Chamos Deum
 Moabitarum, &c: disrumpā ego vicissim
 regnum eorum. Ac si diceret Pactum vio-
 larunt, conditionem non impleuerūt: ne-
 que

1. Reg. c. 11.
v. 33.

que ego, itaque amplius teneor. Maieſtatē meam imminuere volunt: ego regnum i-
 pſorum verè imminuam. Cum ſerui mei
 ſint, me è meo regno eiicere ſtudent. At e-
 go per Ieroboamum, per ſeruum, inquā,
 eos regno eiiciam. Quid verò, cum hic idē
 ſeruus veritus, nè Pōpulus Dei colendi
 deſiderio, Hieruſalem reuertatur, vitulos
 in Bethel erigit, & occaſionem peccandi
 Iſraeli offert? cum, inquam, Populum Dei
 à Deo, ſeruū ab hero abalienat & abdu-
 cit? quāenam tandem eſt tam ingrati cliē-
 tis in patronum, tā nefandi plagiarij pœ-
 nā? Moritur ei primū filius, deinde vni-
 uerſa eiſ gēs per Baafæ facinus extirpa-
 tur ad vltimū maſculum vſque, Prophe-
 ta illa idcirco fieri proteſtante, quod à do-
 mino ſuo defeciſſet. Eſt igitur cauſa hæc
 & frequens, & idonea, propter quam Rex
 feudo à Deo accepto priuetur, ſi legē Dei
 oppugnet, & à Deo, ad ipſius hoſtes, ad
 deos, inquam, gentium transfugiat. Et vt
 paria crimina pares pœnæ decent, conſi-
 milēm omnium Regum Iſraelis & Iudæ,
 qui talia patrarunt, exitum, ſummum, in-
 quam, exitium in Sacris literis legimus.
 Tametiſi mutata eſt & Eccleſiæ Iudaicæ,
 & Regni quoque ipſius forma, cum quæ
 prius

prius Iudæa terminabatur, per totum orbem diffusa esse possint: de Regibus tamen Christianis idem prorsus dicendum est. Euangelium successit legi, Reges Christiani Iudaicorum loco sunt. Idem pactum est, eadem conditiones, eadem poenæ, ni impleantur, idem vindex perfidiæ Deus omnipotens. Ut illi denique legi, sic hi Euangelio obseruando, tenentur. cuius propagationem singuli in primis & ante omnia se curaturos spondent, cum inaugurate. Herodes Christi Domini Regnum, quod provehere debuisset, reformidans, Christum ipsum, quasi regni affectati dānat. En verò & miserè perit, & regnum ipse suum perdit. Iulianus à Christo ad Gentiles transfugit. At paulò post idem Galilæi (ita enim Christum probrosè vocabat) vindicem dexteram experitur. Plenæ verò sunt superiorum sæculorum historiæ consimilibus exemplis; quæ nec nostro etiā sæculo nobis desunt. Aliquot ab hinc lustris plerique Reges Babyloniacis poculis inebriati, Christi hosti adversus Christum, Lupò adversus agnum militarunt, ut etiamnum plerique militant. Vidimus verò nonnullos, in flagranti crimine, in ipsoque adeo, quod agitabant, scelere

scelere periisse: quosdam etiam è triūpho
in tumulum elatos fuisse. Nec cæteros me-
lior manet exitus. Stat nempe perpetuò
hæc sententia: Coniurent licet omnes re-
ges terræ adversus Christum, & Agnū no-
strum diripere conentur, necesse est tan-
dem illos manum cedere, pedibus Chri-
sti subiici, & Agnum Regem Regum, &
Dominum Dominantium, velint nolint,
confiteri. Quid verò de Regibus Ethnicis
statuemus? Procul dubio & si ij extrinse-
cus non vnguntur à Deo, sunt tamen e-
ius vasalli, & ab eo vno potentiam suam
acceperunt seu sorte, seu alia quavis for-
ma eligantur. Si suffragio: Deus regit cor-
da hominum, & dirigit quo ipse vult. Si
vel sorte: fors coniiicitur in sinum, inquit
Salomon, & iudicium eius à Domino. Is
perpetuò vnus est, qui pro suo arbitrio
Reges tollit, & statuit, firmat & evertit.
Hac ratione Cyrum vnctum Domini vo-
cat Esaias. Daniel verò Nabuchodonozor
& cæteros à Deo potentiam accepisse ait,
vt & Paulus, omnes omnino magistratus.
Etsi enim Deus legem suam non ita diser-
tè his atq; illis cōmendarit; est tamē quod
agnoscāt, se, quod regnant, Deo supremo
Regi debere. Itaque si tributum eo nomi-

Psal. 2.

Psal. 110.

Apoc. c. 19.

Prov. 16.

Daniel 2.

v. 21.

Esa. c. 45.

Dan. 4.

Rom. 13.

ne Deo persolvere minus curent: saltem quod Deo à subditis debetur, intercipere & avertere ne tētent, aut vlla alia in re diuinam sibi iurisdictionem arrogent. Id verò propriè affectari regni crimen est, quod Deus in ipsos reges Ethnicos grauissimè vltus est. Principes, ne in tam atrox crimē incidant, suam à diuina iurisdictionem in primis distinguāt necesse est, & eò quidē accuratius, quod in eodem solo, in eadem re, in homine, inquam, Deus & Rex, ius suum ambo capiūt. Constat homo ex corpore & anima, Deus corpus finxit & animā quoq; inspirauit. Vtroq; ergo optimo iure vti solus poterat. Quod si liberaliter indulgit Regibus, vt subditorum corporibus bonisq;ue, ad eorundem tamē conseruationem, vti possint: meminisse sanè debent, vsum, non abvsum, cōcedi. In primis verò nil quod animæ, tributū nomine imperent, habere se, qui suā ipsi Deo tributariam profiteri teneantur. Rex capit tributum censumve à corpore, iisq;ue, quæ corporis ministērio acquiruntur colunturve. Deus ab anima præcipuè, quæ suas etiam functiones per corpus exercet. Ad tributū illud pertinent fructus, nūmorum pensitationes, & cætera onera tum realia,

tum

tum personalia. Ad hoc preces, sacrificia, conciones, cultusque adeo diuinus, tum priuatus, tum publicus. Quæ quidem a deo diuersa & distincta sunt, vt neutrum alteri officiat; fiscus Dei Cæsaris fisco nil adimat, sed cuique ius suum constet. Denique cælum terræ misceat, omniaque in antiquum chaos reducere velit, qui hæc confundat. Hæc optimæ distinxit Dauid, qui alios officarios destinauit in rem dei, alios in rem Regis. Sic & Iosaphat alios in iudicium Iehouæ, alios in litem Regis, id est, alios, qui cultum Dei, alios, qui iura Regis tuerentur. Quod si vtrumque tributum sibi vendicat Princeps, perinde ac si Gigantum more, cælum petere & scandere conentur: Regni affectati reus est, & non secus ac vasallus, qui regalia iura invadit, feudum committit, ac eo sæpissimè spoliatur: & eo æquius, quod ea vasalli ad dominum superiorem aliqua: Regis ad Deum, homuncionis ad omnipotentem nulla potest esse proportio. Quotiescunq; enim Princeps aliquis insolenter dicit, Ego scandam cælum, extollam solium meum supra stellas Dei, & ero similis altissimo: At ego contra, Deus inquit, extollam me ipsum, insurgam adversus te, & excindam

1. Chron. 28
ver. 29.

2. Chr. 6. 19

Esa. c. 14.
ver. 22.

Exod.c.5.
& 8. &c.

Dan.c. 4.

Daniel.c.5.
ver. 23.

1.Macha.c.
1.7.43.

nomen tuum ad ultimos nepotes usque. Et tua quidem consilia evanescent; quod verò semel decreui, mutari nō potest, aut in cassum cedere. Dicit Dominus Pharaoni: Dimitte populum meum, ut mihi seruiat, ut mihi sacra faciat. Quia verò fastu-
 rum idus, Deum illum sibi notum non esse responder, præcepit. Nabuchodonozor vult statuum suam coli, sibi que diuinos honores exhiberi. Confestim effrenē miseri homuncionis audaciam reprimit Deus. Qui Deus videri volebat, homo esse desinit, & avia deserta que loca asini instar oberrat, Eo usque dum, ait Daniel, Deum Israelis supremum omnium Dominum agnoscat. Balchasar eius filius, sacris Templi vasis diuino cultui dicatis, ad suam ebrietatem abutitur. En verò quia Deo gloriam non tribuit, cuius in manu anima eius omnesque viæ erant, regno pessundato, eadem nocte trucidatur. Alexáder Magnus adulatorum voce delectabatur, qui Iouis filium eum esse, & adorandum propterea affirmabát. En verò inchoatos quasi de domito orbe triumphos præpropera mors interfecit. Antiochus vniendi regni prætextu, vnumquenque Legem Dei misam facere, & suam sequi iubet. Templum Iudæorum

Iudæorum prophanat, altaria, polluit. At multas calamitates, clades, strages expertus, fractis prostratisq; viribus, animi mœrore tandem conficitur, in eoq; quod Iudæos ad impietatem adigere voluisset, tā graua se pati profitetur. Denique si repetamus, quis Neronis exitus fuerit, qui Christianos vrbis incendio insimulatos sceleratè cōtrucidauit: quis Caligulæ, qui sibi sacrificia instituit: quis Domitiani, qui Dominus Deusque vocari voluit; quis Commodi & eorum omnium, qui honores soli Deo debitos, aut sibi vendicare, aut Deo tollere voluerunt: exitialem eorum perpetuo exitum comperiemus. Cōtrā verò Traiani, Hadriani, Antonini Pij, & cæterorum eiusmodi satis prosperum: qui si minus Deum coluerunt, Christianis saltem suo more colere permiserunt. In summa, vt vasalli rebelles, regnūmve affectantes, & supplicium extremum merentur, & feudum ipso iure committunt: ita & hi, qui aut legem Dei ex pacto obseruare nolunt, aut obseruare volentes inaudita causa persequuntur. Cum itaque videamus eodem ferè modo Reges à Deo regno investiri, quo vasallos à domino superiore, feudo, iisdem de causis eo benefi-

1. Mach. c. 6

cio priuari, eodem ferme loco, hos, quo illos esse, Reges omnes Dei vasallos esse, omnino statuendū est. Hoc verò posito, questio nostra facile finietur. Si enim Deus est Domini superioris loco, Rex vasalli: quis non Domino potius, quam vasallo, obediendū pronunciet? Si Deus hoc præcipit, Rex contra: quis Regi adversus Deū obsequium denegantem, rebellem iudicet? Imo verò quis non rebellionis damnet, si aut Deo segnius pareat, aut Regi ea in re pareat. Denique, si hinc Rex, illinc Deus ad delectū nos vocet: quis Regem, ut Deo militemus, deserendum non statuatur? Ergo non modo non tenemur obedire Regi contra legem Dei quid imperari, verum etiam si obediamus, rebelles sumus, non secus ac si adversus Regem colonus, pro seniore Regis vasallo, arma sumeret, aut edicto superioris, quam inferioris, Vicarij, quam Principis, Ministri, quam Regis obedire mallet. Ac propterea incidimus in execrationem Micheæ Prophetæ, qui Dei voce eos omnes, qui impiis Regum mandatis obsequuntur, detestatur, & diris devouet. Legem Dei quum dicimus, intelligimus duas Legis tabulas Mosi traditas, quibus tanquam limitibus immo-

immobilibus, authoritas Principum omnium circumscribi debet. Prima, Dei cultus, secunda officium erga proximum continetur: prima, inquam, Pietas, secunda Iustitia Charitati coniuncta, quibus Euangelij promulgatio non modo non derogauit, verum etiam authoritatem adiunxit. Prima autem ut ordine, ita & dignitate prima censetur. Si quem innocentem Princeps occidi iubeat, si quem spoliari, si cui vim inferri, nemo cui vel tantillū consciētiae super sit, parere velit. Si scelus suū, adulterium puta, parricidium, aut quid simile, comprobari flagitet, prodibit inter ipsos Ethnicos Papinianus aliquis, qui Caracallam coram reprehendat, & mori, quam parere malit;

Phalaris licet imperet ut sit

Falsus, & admoto dictet periuria Tauro,
 falsum testimonium dicere non sustinebit. Quid verò, si nos Princeps cum idolis commercium habere iubeat? si Christum crucifigere? si Deum eiurare, execrari, & quantum in nobis erit, cælo pellere, an non multò æquius parere detrectabimus? Quin potius quia non satis est abstinere à malo, ni faciamus etiam bonum, non modò idola non colemus, verum Deum eo

modo, quo præcipit, colemus : nec modò Baali non procumbemus, verùm Deo sacra faciemus, qualia à nobis requirit. Etenim Deum quidem colere tenemur propter ipsum : at Principem honorare, vt & proximum amare, propter Deum. Quòd si verò proximum lædere, scelus est, si Principem violare, piaculum censetur: quo tãdem nomine tantum tãque atrox crimen censebimus, quo ipsa supremi omniũ Domini Maiestas petitur? In summa: vt longè grauius est creatorem, quam creaturam, hominem quam imaginem lædere, & in iure grauior est pœna eius, qui Maiestaté Regiam læserit, quam qui statuam ei dicatam fregerit: ita nò dubium est, quin eos, qui primam legis tabulã violant, grauior & atrocior vindicta, quàm qui secundam, maneat (etsi vna ab altera pender) adeoq; cautius adhuc in illa, quam in hac agendum sit. Exempla verò maiorum docere nos possunt, quæ cautela hac in re sit adhibenda. Achabus Rex, Iezabele vxore instigante, Prophetas Dei vnde quaque comprehensos occidi iubet. Abdias nihilominus, Aulæ Magister, eos abscondit & alit. In promptu excusatio est, In omni obligatione, quantumvis stricta, Deus perpetuo

tuo excipitur. Achabus idem, omnes Baali sacrificare iubet: Elias nihilo segnus arguit Regem, arguit Populum, sacerdotes Baal impietatis convictos ad necē poscit. Invito denique Rege vxorio, frementēq; impia vxore cultum veri Dei restituere conatur. Sin Achab obiicit, quod hodierni Principes solent, quod Israelem turbet, quod rebellis, quod seditiosus sit, ut omnium, qui crimine vacant, hoc esse crimen solet: Imò verò, responder, Tu is ipse es, qui Israelem tua rebellione turbas, qui à Domino tuo ad hostes, à Deo vero ad deos alienos transfugeris. Eodem modo Sidrach, Misach & Abdenago, Regi Nabuchodonozor parere nolunt, ut neque Daniel Dario, Eleazar Antiocho, & innumeri alij. Post verò Christi advētum, cum iubentur Apostoli Euangelij prædicationē omittere, Iudicate, aiunt, utrum iustum sit coram Deo, vobis potius, quam Deo obedire. Ita modo mandatum Christi impleant, quid Reges sentiant, susque deque habent. Ipsi denique Iudæi Aquilam argenteam statuamque Caligulae in templo collocari non ferunt. Quid verò Ambrosius, iubente Valentiniano Imperatore, ut basilicam Mediolanensem Arrianis trade-

1. Reg. c. 18.
vers. 17.

Daniel c. 3.
Daniel c. 6.

Act. 4.
v. 19.

Ambr. Epi-
stol. 33.
Euseb.

ret? Cōvenior, inquit, à Comitibus & Tribunis, vt Basilicę fieret matura traditio, dicentibus Imperatorē iure suo vti, eo quod in potestate eius essent omnia: respondi; Si à me peteret, quod meū esset, id est, fundum meum, argentū meum, ius huiusmodi meum non refragaturum. quāquam omnia, quæ mea sunt, essent pauperum: verum ea, quæ sunt diuina, Imperatoris potestati non esse subiecta. Quid verò putamus responsurū eum fuisse, si de viuo Dei tēplo idolis mācipando cōsultus fuisset? Exēpla hæc & innumerorū Martyrū, qui mori, quā parere maluerūt, quibus plenæ sunt Historię, legis disertissime instar esse possint. At sanè ne lex quidē disertis verbis cōcepta nobis deest. Quotiescunq; enim Apostoli Christianos monēt, vt Regibus & Magistratibus pareant, quasi de industria faciant, Deo parendū in primis & ante omnia præmonent: præpoſteri istius obsequij, ad quod adulescentes Principum simplices cohortantur, nusquam ne leue quidem argumentum reperias. Omnis anima, inquit Paulus, superiori potestati subiecta esto; nam nulla est nisi à Deo. (animam omnem dicit, ne conditio vlla excipi videatur.) Satis ex hisce verbis con-

cludi

Paul. c. 13.
ad Rom.

cludi poterat, Deo potius, quam Regi parendum esse. Si enim regi propter Deum, certè non còtra Deum. At ambiguitatem omnem præcidere vult. Princeps (subiungit) minister Dei est, propter bonum nostrum, ad faciendam iustitiam. Sequitur adhuc idem: quia Domino potius, quàm ministro, obtemperandum constat. Necdum tamen satis esse putat. Reddite, ait ille tandem, cui tributũ, tributũ, cui honorem, honorem, cui timorem, timorem: ac si diceret, quod Christus: Reddite quæ *Matth. 22. ver. 21.* sunt Cæsaris, Cæsari; quæ Dei, Deo, Cæsari tributum & honorem, Deo timorem. Consimiliter Petrus, Timete Deũ, Honorate Regem. Serui obedite Dominis etiã *Petr. Epist. 1. cap. 2.* discolis. Hæc eodem, quo dicuntur ordine, facienda sunt. Nempe vt non tenentur dominis serui obedire, si quid adversus Regis mandata imperent: ita nec subditi Regibus, si quid adversus legẽ Dei. Obiiciunt nobis impij: In iis etiam, quæ ad *Obiectio nes.* conscientia pertinent, Regibus obediendum esse, & Petrum Paulumq; nobis, quasi huius impiæ sententiæ authores, obtrudere non verentur. Indèque quancumque *Roman. 13. ver. 5.* legem sanciat Rex, parendum, quancumque *1. Petr. 2. 2.* religionẽ superstitionẽve sectetur, obsequen-

obsequēdum statuunt. Quàm aut ineptè,
aut impiè, nemo est, qui non videat. Aiūr,
ibi diserte obediendum esse Principibus
non propter iram, sed propter conscientiam
erga Deum. Conscientiam cum op-
ponūt iræ, perinde est, ac si dicerent: non
formidine pœnæ, sed Dei amore, non ver-
berum metu, sed verbi diuini reverentia,
parendum esse. Vt pari ratione Paulus, ad
Colossenses, seruos ita heris inservire iu-
bet, vt non heri oculo, aut furcæ, sed ipsi
Deo seruire se putent, nō vt heri gratiam
demereantur, cuius oculos etiam fallere
possunt, sed vt officio satisfaciānt, quod
illis imposuit Deus, quem nemo fallere
possit. Deniq; aliud omnino est, propter
conscientiam obedire, aliud, in iis, quæ ad
conscientiam pertinēt. Neque ij sanè, qui
crucē & tormenta quævis suscipere, quàm
Principibus impia iubentibus parere ma-
luerunt, nos ita docuissent. Eiusdem im-
pudentiæ est, quod idiotis obiicere solēt,
Obsequium præstare sacrificio. Nil enim
est, quod causam ipsorum citius iugulare
possit. Sunt illa verba Samuelis Prophe-
tæ, Saulem Regem reprehendentis, quod
præpostere sacrificando, Dei mandatum
securus non esset, Quod si ipse, quantūvis
Rex

*Colos. c. 3.
ver. 22.*

*1. Sam. c. 15
vers. 22.*

Rex, Deo obsequi tenebatur: sequitur sane, subditos adversus Deum Regi non teneri. In summa: qui Barbarorum Calucuthanorum more, Dei cultum ab hominis arbitrio, Religionem à Rege, tanquàm Telluris Deo pendere volūt, si Scripturæ sacræ, quod opinor, minus tribuunt; discant saltem ab Ethnico Oratore, in omni communitate quosdam esse officiorum gradus, ex quibus quod cuique præster, intelligi possit, ut prima, ait, Diis immortalibus, secunda patriæ, tertiã parentibus, deinceps reliqua reliquis gradatim debeantur. Vt cumque verò crimen læsæ Maiestatis atrox sit; proximum tamen sacrilegio, quod in Deum diuinæque res propriè committitur, à Iureconsultis vocari, adeò ut Templum effringere, quàm vitæ Principis insidiari, gravius putetur. Et hæc quidem cuiusvis homini, modo non prorsus impio, sufficere posse videntur.

Cic. I. Offi.

*L. I. ad Leg.
Iul. Maiest.
digest.*

SECUNDA

SECUNDA QVAE STIO,

*AN LICEAT RESISTERE
Principi, Legem Dei violanti, & Eccle-
siam Dei vastanti: quibus, quo-
modo, & quatenus.*



HÆC Quæstio prima frõ-
te difficilis & ardua vi-
detur, eò quidem ma-
gis, quod cum sub piis
Principibus superva-
cua, sub impiis pericu-
losa videretur, vix quisquam eam, nisi le-
uiusculè attigerit. Ex facto quæritur, Prin-
cipi legem Dei abrogati Ecclesiámve de-
struëti, aut extruendá impediëti, an resiste-
re liceat. Hoc verò, si eius iudicio stamus,
Scriptura sacra nobis definiet. Si enim,
quod ex ea facile probabitur, vniuerso Po-
pulo Iudaico licuit, imò si iniunctum fuit,
nemo, credo, negabit, quin idem de vni-
uerso Populo Christiano alicuius Regni,
idem planè statuendum sit. Consideran-
dum est hic imprimis, Deum electo ex om-
nibus

inibus Populo Israelitico, vt esset sibi peculiaris Populus, fœdus cum eodem pepigisse, vt esset is Populus Dei. Extrat id passim in Deuteronomio. Vis autē huius Pactionis erat hæc, Vt curarent vniuersi, vt Deus à singulis Tribubus & singulorum contribulibus in terra Chanaā purē cole-retur, Ecclesiāque suam in medio eorū perpetuò constitutam haberet. quod tum è multis aliis locis, tum disertè Deuter. 27. apparet. Ibi Moses & Leuitæ, quasi Dei nomine stipulantes, vniuersum Populum congregāt, hīsque verbis affantur. Hodie, ô Israel, Populus Domini Dei tui sis. Obsequere ergo Deo tuo, &c. Cumq; ait Moses, Iordanem transieris, stantibus hinc ad montem Garizim sex Tribubus, illinc ad mōtem Hebal sex reliquis, Leuitæ legem Dei perlegent, ac obseruaturis fausta omnia, violaturis infasta precabuntur. Vniuersus verò Populus respondebit, Amen. Quod à Iosue postea tum terram Chanaā ingresso, tum moribundo obseruatum legimus. Hinc animadvertimus, vniuersum Populum obligatum esse legi Dei curandæ, Ecclesiæque tuendæ, vt è contrario idolis Gentium exterminandis è terra Chanaan. quæ stipulatio ad singulos per-tine-

Deut. c. 7. v.
6. c. 14. v. 2

Deut. 11.
ver. 29.
Iosue c. 24.
desertius.

Iosue 5.
ver 24.

tinere non potest, sed ad vniuersos tātum. Quo etiam & illud pertinere videtur, vt omnes Tribus circa Arcā Domini castrametarentur & tentoria sua figerent: vt quę vniuersorum curę commendata esset, ab vniuersis tegeretur. Vñs verò Pactionis istius demonstrari potest. Ciues Gabaa è Tribu Benjamin Leuitę cuiusdam vxorē vi constuprant ad necem vsque. Leuita in duodecim frustra cōcisam Tribubus duodecim mittit, vt tantum scelus in Israele patratum vniuersi expient. Congregatur vniuersus Populus in Maspha. Postulat à Beniamitis tantis sceleris conscios noxę dedi. Recusant illi. Ac demum Dēo approbante, bellum in Beniamitas communi consilio decernitur. Hoc modo secunda Legis Tabula in Tribum integram, quę peccarat, vindicata. De prima verò habemus exemplum evidentissimum in libro

Iosue c. 22. Iosue: Postquam Rubenitę, Gaditę & Manassei, cis Iordanem ad sua se receperunt, eximium statim altare in Galiloth propē Amnem extruunt. Videbatur hoc contra mandatum Domini, quo non nisi in Chanaan sacrificare licebat. ac propterea suspicio esse poterat, ne alienos deos colere vellent. Re vniuerso Populo, qui trans Iordanem

Num. 2.
Iudic. c. 19.
& 20.

danē habitabat, nūciata, indicūtur Comitia in Siloh, vbi erat Arca Domini. Cōveniunt vniuersi. Mittitur ergo ad illos Phines sacerdos, Eleazaris filius, qui de peccato in legem cōmisso corā agat. Vt verō publica auctoritate hoc agi sciant, eximij quiq; ex vnaquaq; Tribu legati mittūtur, qui cū iis expostulent, cultū Dei corrūpi eo modo, Deū ea rebellione infensum fore, nec ipsis modo, sed Israeli vniuerso, vt quondā in Beelphegor: deniq; ni desistāt, bellū publicē indicant atq; denuncient. Quod proculdubio cōsecutū fuisset, ni tribus illæ protestatē fuissent, se altare illud monumēti tantū instar extruxisse; ex quo Cis Iordanis & Trās Iordanis eādē esse ac perpetuo fuisse religionē appareret. Quotiescunq; verò in cultū Dei vindicādo negligētius se gesserunt, grauissimē afflīctos eos fuisse videmus. Nec alia sanē de causa bis à Beniamitis victi fuisse videntur, quàm quod, dum iniuriā priuato factam vlcisci satagerent, dum stuprum punire, in iure Dei vindicādo adeò segnes essent, ac quotidie etiam adulteria cum idolis impunita sinerēt. Fuit ergo primum hæc Pactio inter Deum & Populum.

Iam ex quo Reges Populo dati sunt, nō

*Fœdus in-
ter Deū &
Populum.*

2. Reg. c. 11.

2. Chro. c. 23

ver. 16.

2. Reg. c. 23.

modo non desit hæc eadem Pactio, verū
etiam perpetuo cōfirmata & repetita fuit.
Diximus in Rege inaugurando duplex
fœdus initum fuisse. Et primum quidem
inter Deum, Regem & Populum, sive in-
ter summum Sacerdotem, Populū & Re-
gem. (Populus enim 11. Chron. primo lo-
co ponitur.) Finem verò eius eum fuisse,
vt Populus esset Populus Dei, id est, vt is
Populus Ecclesia Dei esset. Quorsum san-
ciretur inter Deum & Regem, ostēdimus.
Quorsum inter Deum & vniuersum Po-
pulum, examinandum. Certissimum sanè
est, Deum non frustra hoc egisse. Ni enim
aliqua autoritas & promittendi, & pro-
missa præstandi Populo superfuisset, fœ-
dus planè supervacuum fuisset. Videtur er-
go Deus fecisse, quod in dubiis nominib.
creditores facere solent, vt plures in ean-
dem summam obligentur, vt eiusdem rei
duo pluresve rei promittendi constituan-
tur, à quorum vnoquoque, tāquam princi-
pali reo solidū peti possit. Ecclesiam vni-
co homuncioni cōmittere lubricum erat.
Eam itaque vniuerso Populo commēdat
atque committit. Poterat Rex in tam lu-
brico gradu constitutus, facile in impie-
tatem delabi. Ne itaque collaberetur Ec-
clesia

clesia, Populum intervenire voluit. In ea,
de qua agitur, stipulatione, Deus, vel eius
vice, summus Sacerdos est Reus stipulan-
di; Rex & populus vniuersus, puta Israel,
sunt rei promittēdi, ambo ex vna eadē-
que causa, & quidem ex voluntate coniū-
ctim obligari. Stipulatur Sacerdos, an nō
promittant, Populum fore Populum Dei:
an non operam se daturus, vt Deus Tem-
plum suum Ecclesiam suam in medio eo-
rum perpetuò habeat, vbi ritē colatur?
Spondet Rex, spondet Israel, (vniuersitas
enim hominum vnius personæ vicem su-
stinet) & quidem cōiunctim, nō diuisim,
vt ex ipsis verbis apparet; incontinenti,
non ex intervallo. Constituūtur ergo hic
duo Rei, Rex & Israel, ideoque æqualiter
in solidum obligantur. Quemadmodum
ergo, cum Caius & Titius eandem pecu-
niam Seio stipulanti coniunctim promi-
serunt, singuli ipso iure in solidum tenen-
tur, & ab eorum altervtro solidum peti
potest: ita tenetur Rex per se, Israel itē per
se, curare cauere, ne quid detrimenti Ec-
clesia capiat. Vter verò negligat, Deus ab
altervtro integram rem petere potest, &
eo quidem magis à Populo, quàm à Rege,
quo plures, & difficilius labuntur, & ma-

*L. mortuo.
22. D. de fi-
dei commiss.*

*L. si non sin-
guli. C. si
cert. pet. l.
penul. D. de
duob. reis.
2. C. 3. §.
1. D. cod.*

gis soluendo sunt, quam vnus. Item vt in duobus correis, præsertim Fiscalis Tributi, vnus ita in solidum tenetur, vt beneficio diuisionis per nouellam constitutionem Iustiniani concessio vt nequeat : ita Rege & Israele, tributum Deo Regi Regū promittentibus, vterque in solidum tenetur. Demū, quemadmodum in duobus reis promittendi, in iis præcipue contractibus, quorum obligatio ratione culpæ committitur, (qualis est hic) vnus culpa nocet alteri; ita si Israel Deū deserat, Rex verò negligenter ferat, tenetur culpa Israelis. Consimiliter, si Rex ad alienos Deos transfugiat, nec transfugiat modo, sed alios etiam secum abducat: denique quovis modo Ecclesiam perdere conetur: ni Israel eum quasi è fuga retrahat, aut etiam coerceat, eius culpa tenebitur. Breuiter: non secus ac si periculum sit, ne vnus è reis promittendi, sua bona prodigendo, soluendo esse desinat, alteri datur in eum utilis actio; ne correi culpa damnum patiatur: ita & Israeli in regē, Regi in Israëlē, sese idolis mancipantē, aut quovis modo fœdus rumpentē, ne aut huius ille, aut vicissim hic illius culpam luat. Quod verò ea stipulatio, de qua agimus, eius gene

ris

*L. cum poss.
D. de censib.
& ibi Do-
ctores.*

*L. cū appa-
rebit. D. lo-
cati. l. si di-
uisa. C. eod.*

ris sit, ex aliis scripturæ locis apparet. Saul
 le Rege Israelis constituto, Samuel Sacer-
 dos & Propheta Domini, his verbis Israe-
 lem affatur: Tam vos, quã Rex vester, qui 1. Sam. c. 12.
v. 14. & 25.
 est super vos, sequimini dominum Deum
 vestrum. quod si perseueraueritis in mali-
 tia, (malitiam vocat, quod hominum im-
 perium, quàm Dei maluissent) tam vos,
 quam Rex vester peribitis. Addit verò ra-
 tionem: quia placuit deo, vos facere Popu-
 lum suum. Hic vides duos reos manife-
 stè coniungi in eiusdem pœnæ stipulatio-
 ne. Sic Asa, Rex Iuda, Azariæ Prophetæ
 hortatu, vniuersum Populum, Iudã nem-
 pe & Benjamin, in Hierusalem convocat,
 fœdus cum deo percutiendi causa. Inter-
 erāt & multi ex Ephraim, Manasse, & Si-
 meon, q̃ dei pure colendi causa eò se rece-
 perant. Tum verò, sacrificiis ritè peractis,
 sancitur fœdus, his tanquam conceptis
 verbis: Quicumque non invocauerit Do-
 minum deum Israel, seu minimus, seu ma-
 ximus, morte moriatur. Cum maximum
 dicit, ne Regem quidem ipsum huic pœ-
 næ eximi vides. Quis verò hãc à Rege pœ-
 nam reposcere possit (de temporali enim
 hic agitur) nisi vniuersus populus, cui ipse
 iurat, non secus ac Populus ipsi? Eodẽ mo

2. Chro. c. 15
v. 13.

do legimus, Iosiam Regem, viginti quinque annis maiorem, vniuersumque Populum fœdus cum domino sanxisse, promittentibus ambobus, se legem & statuta domini custodituros, continuòq; quasi implendi, aliqua ex parte, fœderis causa, Baalis idololatriam destructâ fuisse. Et plura forte accuratius legenti testimonia succurrerent. Cur verò velimus vniuersi Populi consensum requiri, cur Israelem Iudamve ad legis diuinæ obseruationem astringi, cur sanctè promittere, se perpetuò Populum dei fore, nisi velimus pariter, auctoritatem facultatémve ei concessam, qua tum se à periurio, tum Ecclesiam à vastitate vindicet? Quorsum enim fœdus cum Populo, vt sit Populus dei, si sese ad alienos deos per Reges abduci patitur, aut pati tenetur? Vt deus purè colatur, si Populus serui loco est, quo cum nulla obligatio esse possit? Si denique non licet ei operam dare, vt id, quod promissit, præstetur, Deus ne cum eo fœdus sanxit, qui neque promittendi, neq; rem promissam præstandi ius habuit? An verius, fœdus cum Populo sanciendo, remque eam fieri stipulando, ius ei esse, & rem promittendi, & præstandi, & præstandam curandi, eui-

2. Reg. c. 23.

7. 2.

2. Chron. c.

4. 7. 29.

L. quod at-
tinet. 32. D.
de reg. iur.

denter

dent ostendere voluit? Si ridemus enim & actione summuemus, qui cum seruo filiove familias contraxerit: an non impudentes simus, qui tale quid Deo tribuere velimus? Hinc verò est, quod Regibus fœdus violantibus, Prophetę Iudam, domũ Iacob, Samariam perpetuo alloquuntur, vt eos officij sui admoneant. Nec id tantũ, *Ierem. c. 17. ver. 20. & passim.* ne Baali sacrificent, sed vt Baalem etiam, eiusque Sacerdotes, Rege invito & reclamante, derubent & exterminent. Sic cũ Achab occidisset Prophetas Dei, Elias Propheta congregat Populum, & quasi Concilium indicit, corripit, coarguit, convincit. Populus verò eius hortatu, Sacerdotes Baal morte mulctat. Nempe officiũ suum deferente Rege, est quod suo fungatur Israel; nec tumultuariè aut temere, sed publica authoritate, Concilio habito, causa ordine cognita. At contra quotiescunque Regi, cultum Dei violanti, non obstitit Israel, quod diximus de duobus reis, quorum vnus culpa alteri nocet, vsu venisse videmus. Vt enim Rex Idololatrię & perfidię suę, ita Israel negligentię, cõniuetię, socordię pœnas dedit: & eo quidem sæpius hoc, quàm illud accidit, quod Regis plerunq; exẽplum Principes, Prin-

1. Reg. c. 18. v. 19.

1. Sam. c. 31.

Genes 18.
v. 25.Deut. 24.
v. 16.2. Reg. c. 14.
Ezech. 18.

2. Sam c. 22

cipum Populus sequatur, & vnus exem-
 plo vniuersi potius peccent, quàm vni-
 uersorum vnus resipiscat. Exemplis res
 dilucidior fiet. Cur, quæso, fustum dele-
 tumq; Israelis exercitum, vnà cum Saule
 Rege putemus? An Deus vlciscitur pecca-
 ta Principis in Populum? an Patris, in fi-
 lium? Acerbum est, aiunt Iurisconsulti,
 parentis scelera, filiorum pœnis lui. Alie-
 ni sceleris quenquam pœnas pati, iura nō
 sinunt. Absit vero, vt is, qui vniuersam ter-
 ram iudicat, inquit Abraham, perdat iustū
 cum impio. Quinimo, ait Dominus, vt pa-
 tris, ita & filij anima mea est. Nec pater fi-
 lij, nec patris filius culpa patietur. Anima,
 quæ peccauerit, morietur. An nō ergo po-
 tius, quia Populus Sauli legem Dei vio-
 lanti non resistebat, & pios impiè perse-
 quenti, Dauidem scilicet & Sacerdotes
 domini, applaudebat? E multis pauca si-
 milia proferemus. Saul idem, vt tribus Iu-
 dæ possessiones amplificet, fidem publi-
 cam, iam inde ab ingressu Chanaan Ga-
 baonitis datam frangit, ipsosq; adeo Ga-
 baonitas, quantum quidem potest, è me-
 dio tollit. Violabatur eo facto tertium le-
 gis præceptū. Deus enim testis eiusce Pa-
 ctionis fuerat. Quin & sextum, innocuos
 enim

enim iniuste interficiebat. Vtraque legis Tabula vindicanda erat. Et Saul eiusque familia quidem ea scelera perpetrasse dicuntur. Interea tamen, Saule iam è viuis sublato, Dauidèque Rege constituto, consultus dominus respondet, tertium iam annum, propter idem scelus, terram Israelis vniuersam fame laborare. Nec ea prius desinit, quam septem è familia Saulis, Gabaonitis tanquam noxę dederentur. Cur verò hic, cum vnusquisque ex suo admisso sorti subiiciatur, nec alieni criminis successor constituatur quisquam, vniuersum Israelem sceleris huius teneri dicas, ipso reo iam vita functo, & actione cū reo quasi extincta: nisi, quia cum deberet & posset publico & manifesto sceleri sese opponere, negligenter tulit? Cur pœnam irrogari vis, quæ nemini absque culpa iure infligitur, nisi peccarit? Qua vero peccarunt, nisi quatenus peccatum tolerarunt? Eodem modo, cum Dauid mandat Ioabo & præfectis Populi Israelitici, vt Populū recenseant, graue eo ipso crimen commisisse dicitur. Nempe vt Israel dei iram provocarat, cum Regem peteret, quòd in eius peritia salutem suam collocare videretur: ita hoc facinore Dauid, qui ex multitudine

*L. crimē. 26.
D. de pœnis*

*L. sancimus
C. de pœnis.*

1. Sam. c. 8.

*Abacuc 1.
ver. 16.*

ne victoriam expectabat. Id enim propriè est, quod Propheta vocat, sacrificare retibus, & hamis thura adolere: quæ species idololatriæ est. Præfecti quidem, quia prævidebant id Israeli exitiale futurum, primum paulisper refragantur: deinde etiam dicis causa & perfunctoriè censum agunt.

2. Samu. 6.

ult.

2. Chro. 6. 21

At populus vniuersus plectitur. Nec Dauid modò, sed & seniores Israelis, qui vniuersitatem representant, saccum induunt, seseque cinere conspergunt. quod tamen propter Dauidis parricidiû adulterio cummulatum neutiquam accidit. Hic quis nõ videt, vniuersos & peccasse, & pœnitere debuisse, & pœnas denique luisse? Dauidem nempe impia præcipiendo, Deum provocasse: præfectos Populi, quos tamquam imperij Consortes & Assessores, Israelis nomine, reclamare oportuit, aut conuiuendo, aut segnius repugnâdo, vniuersos denique ad eum quasi delectû comparendo? Deum verò, non secus ac imperatorem, legionis vniuersæ delictum, vniuersali terrore, particulari quorûdam supplicio, quadam quasi decimatione castigasse? Cur verò tandem, Manasse Rege Templum Dei pollute, Deum non ipsum modo Manassem, sed vniuersum

2. Chro. 33.

ver. 16.

Populum

Populum alloquutum esse legimus; nisi
 vt Israelem, tanquam alterum promitten-
 di reum admoneret, ni Regem in officio
 contineret, suo damno futurum? Ecquid
 enim illud alioqui apud Ieremiam, do-
 mum Iuda propter impietatem & crude-
 litatem Manassis Assyriis mancipatā fuisse,
 nisi eo ipso, quod sceleri non restitit, sce-
 leris ream fuisse statuamus? Propterea Au-
 gustinus & Ambrosius: Herodes & Pila-
 tus condemnant Christū, Sacerdotes ne-
 ci tradūt: Populus ferè illachrymatur. vni-
 uersi tamen puniuntur. Cur ita? Quia, quē
 è manibus impiorum magistratuū eripere
 poterant, quia non fecerunt, occiderunt.
 Plura verò in hanc sententiam ex omnis
 generis Authoribus addi possent, ni Chri-
 stianis Sacrae scripturae testimonia suffice-
 re deberent. Cæterum quia boni legisla-
 toris est, non tam curare, vt delicta puniā-
 tur, quàm ne vlla committantur, cauere:
 vt boni Medici diætā præscribere potius,
 quæ morbos arceat, quàm remedia, qui-
 bus coerceantur: pius certe Populus, non
 modo coercebit Principem Legem Dei
 impiè abrogantem, verum etiam in pri-
 mis cauebit, ne quidquam eius culpa ne-
 gligentiæve sensim introducatur, quod
 rem-

2. Reg. c. 24.
 v. 4.
 Iere. 15. v. 4.

August. 12.
 Psal. 32.
 Ambr. 10.
 offic.

temporis tractu, purum Dei cultum cor-
rumpere possit, nec crimina in diuinam
Maiestatem publicè commissa, non tole-
rabit modo, verum etiam criminum occa-
siones diligenter auferet. Quod in cōfrin-
gendo æneo serpente, Ezechiam Regem,
in expostulâdo cum Cis Iordanis, de alta-
ri erecto, Israelê, convocato Concilio pu-
blico, fecisse legimus. Itaque licet Israeli,
si Rex legem Dei Ecclesiâ mve evertat, re-
sistere; nec id modo: verum, ni fecerit, eiuf-
dem criminis tenebitur, & eandem pœ-
nam luet. Resistet verò verbo, si verbo op-
pugnabitur; vi, si vi; arte, inquam, & Mar-
te. Quin & dolo bono, si dolo: cum nihil
interfit, vbi iustum bellum suscepêris, v-
trum aperte pugnes, an ex insidiis. ita ta-
men, vt perpetuo dolum à perfidia, quæ
nusquam licita est, accuratè distinguat.
Verum video iam, quid hic opponi possit.
Quid, inquires? An verò vniuersam mul-
titudinem, belluam, in quâ, illam innume-
rorum capitum, cumultuari & concurre-
re in eâ rem, quasi agmine factò oportebit?
Quis verò in ea turba ordo esse queat?
quæ Consilij, quæ rerum gerendarum spe-
cies? Cum de vniuerso Populo loquimur,
intelligimus eos, qui à Populo authorita-
tem

*August. in
Ios. 2m. 23.
q. 2. dome-
nus. l. 1. D.
de dolo ma-
le.*

tem acceperunt, magistratus, nempe, Rege inferiores, à Populo delectos, aut alia ratione cōstitutos, quasi imperij Confortes & Regum Ephoros, qui vniuersum Populi cœtum representant. Intelligimus etiam Comitiam, quæ nil aliud sunt, quàm Regni cuiusque Epitome, ad quæ publica omnia negotia referuntur. Eiusmodi erat septuaginta in Regno Israelitico, quibus quodāmodo præerat summus Sacerdos, qui de rebus summis iudicabāt, è LXX. familiis, quæ in Ægyptum descenderant, seni primū electi. Tum Duces, seu Principes Tribuum, in singulis singuli. Demum Iudices & Præfecti singularum vrbium, id est, Chiliarchæ, Centuriones & ceteri, qui totidem familiis præerant. Denique fortes, Purpurati, & ceteri, è quibus cōstabatur Concilium publicum, quod sæpissimè indictum legimus, his verbis: Et congregati sunt seniores in Rama, vt in electione Saulis. Et cōgregatus est vniuersus Israel, aut vniuersus Iuda, & Bēiamin, &c. cum vniuersam turbam eo convenisse, verisimile non sit.

1. Sam. c. 22.

1. Chr. c. 27.

c. 28.

1. Chr. c. 23.

Eius generis sunt in omni Regno benè constituto, officarij Regni, Principes, Patres, Patritij, Optimates, & cæteri ab ordinibus

nibus delegati, è quibus cōflatur aut Cōcilium ordinarium, aut Concilium extra ordinem, Parlamentum, Diēta, cæteri que conventus, in diuersis regionibus diuersa nomina sortiti; in quibus ne quid aut Respubl. aut Ecclesia detrimenti capiat, providendum est. Illi verò vt singuli Rege inferiores sunt, ita vniuersi superiores. Vt enim rectè Basiliensis & Cōstantiensis Synodi, Synodum Oecumenicam Pontifice superiorem esse statuerunt, vt Capitulum Episcopo, Vniuersitatem Actore, Curiam decurione, eum denique, qui ab aliquo cœtu authoritatem accepit, eo cœtu inferiorem esse, etsi singulis superiorem; ita dubium esse non potest, quin Israel, qui Regem petiuit & cōstituit, quasi Actorem publicum, Saule superior sit, Israele postulante, Israelisque gratia constituto, vt pluribus postea ostēdetur. Itaque cum rebus benè gerendis, ordine opus sit, qui in tanta turba seruari nequit: ea verò sæpe accidunt, quæ multitudinī absque publico periculo ac discrimine dici nō possint: quicquid vniuerso Populo concedi aut committi diximus, officiariis Regni; quicquid Israeli, Principibus & Senioribus Israelis cōcessum commissumque dicimus, quod
& vsus

& vsus ipse cōprobauit. Athalia Regina, 2. Chro. 23.
 Ochozia filio Rege Iudę mortuo, vniuer-
 sam ferē stirpem Regiam delendam curat.
 Vix puer vnicus Ioas, in cunis adhuc va-
 giēs, Iosabæ amitæ prudētia simul & pie-
 tate, superest. Illa verò rerum summam in-
 vadit, & sex annos in Iuda regnat. Mussa-
 bat tum fortē Populus: nec enim promē-
 re, quicquid animo premebat, tutum erat.
 Tandem Ioiadas summus Sacerdos, vir
 Iosabæ, consilio cum Principibus Israelis
 clanculū inito, coniurationēque ritē per-
 acta, Ioam septimo anno ætatis vngendū
 coronandumque curat. Matrem verò non
 modò ē folio exturbat, verum etiam ē me-
 dio tollit, Baalisque idololatriā continuò
 destruit. Probatur Ioiadæ facinus, & me-
 ritò. Iusta causa mouebatur. Tyrannidem
 enim, non regnum oppugnabat. Tyran-
 nidem, inquam, primum sine titulo, vt lo-
 quuntur Iurecōsulti neoterici. Lex enim Bartol. de
Tyrannid.
Deut. 17.
 Regni Iudaici mulieres ad sceptrum non
 vocabat. Deinde etiam exercitiò. Invasē-
 rat enim nepotum regnum summo scele-
 re, & scelera innumera cōmittebat. quod
 verò caput scelerum erat, neglecto Deo ve-
 ro, Baalē adorabat, adorarique iubebat.
 Iustē verò, & ab eo, cuius munus erat, vin-
 dica-

dicabatur. Ioiadas enim non erat priuatus, sed Pontifex summus, ad quem rerū etiam ciuiliū cognitio tum pertinebat. Deinde, habebat affeclas Principes Iudæ & Leuitas, denique erat affinis Regis. Quod verò non indicit de more comitia in Mizpah, non culpatur, vt neq; etiam, quod furtiuè consilia iniret, & clanculum coniuraret. Alioqui enim res minimè successisset, & in incassum cessisset. Coniuratio autem bona malæ est, vt bonum, malumve finem spectat, & ab iis, quorum est, aut secus, initur. Rectè ergo Principes Iuda fecerūt; malè verò, si secus se gessissent. Vt enim tutor cauere debet, ne pupilli bona depereant; ac, ni faciat, actione tutelæ tenetur: ita & hi Populi salutem tueri, qui se totum ipsorum curæ tradidit, & credidit, suāsque in ipsos actiones omnes quodammodo transtulit. In summa: vt licet vniuerso Populo repugnare, ita & Principibus Regni, qui vniuersum repræsentāt, non secus ac decurionibus pro corporis vtilitate, contrahere. Vt verò refertur ad vniuersos, quod publicè per maiorem partem geritur: ita, quod maior pars Principum seu optimatum fecerit, omnes; quod omnes, vniuersus Populus fecisse dicetur.

Verum

Bartol. in
Tract. de
Guelph. &
Gibel.

Vlp. l. 160.
D. de reg. iur.
85715-

Verum hic alia nobis exoritur quæstio.

Statuamus iam Regem aliquem, legem Dei Ecclesiâmvē abolere: Vniuersitatem consentire, aut maiorem saltem eius partem, Principes aut omnes, aut plures conuiere: partem interim aliquantulam Populi; vnum, inquam, aliquem ex Principibus Magistratibusque legem Dei retinere, Deumque rite colere velle: quid licere putes, si Rex aut eam partem ad impia sacra cogere, aut ei piis sacris interdicare velit? Hic de singulis, seu priuatis, nō loquimur, qui vniuersitatis partes non censentur, vt neque tabulæ, clauis, papilli, nauis: aut lapides, trabes, cimenta, domus. Sed de aliqua Provincia vrbeue; quæ regni partem faciat, vt prora, puppis, carina, nauis; testum, parietes, fundamentum, domum facere dicuntur. & de aliquo Magistratu, qui eius Provinciæ; vrbsive curam gerat. Equidem si exemplis certandū est, etsi ea propter assuetam hominum, in cultu Dei defendendo, desidiā, rariusculā sunt: tamen nō prorsus desunt. L OBNA, vrbs Sacerdotalis; sese subducit Ioramō Regi Iuda, ab eoque quodammodo deficit, quia defecerat à Deo patrum suorum, à quo ipsa deficere nolebat: & forte vere-

An pars Regni resistere possit.

Iosue c. 21.

ver. 13.

1. Chro. c. 6.

ver. 57.

2. Chr. c. 21.

ver. 10.

E

batur, ne Baali sacra facere cogeretur. Cō-
 similiter Antiocho iubente, vt Iudæi vni-
 uersi, legem ipsius sequerentur, suamque
 à Deo acceptam desererent: respódet Ma-
 thathias: Non obtemperabimus, vt transi-
 grediamur nostram Religionem. Nec ve-
 rò id modò; verùm Zelo Phinees corre-
 ptus, eò ipso, qui ad impia sacrificia con-
 ciues suos adigebat, sua manu interfecto;
 arma capit, in mótes sese recipit, manum
 colligit. Denique pro Religione & patria,
 pro aris, inquam, & focis, aduersus Antio-
 chum adeò prospere, Deo fauente bellum
 gerit; vt Hierusalem recuperet, & armis
 Gentilium, in Ecclesiæ perniciem coniur-
 atis, fractis, & debilitatis, purum Dei cul-
 tum restituat. Quod si spectemus, quis il-
 le esset, erat Mathathias Machabæorum
 parens, ex Tribu Leui. Itaque non licebat
 ei iure sanguinis, Regnum à Tyrannide
 vindicare. Qui verò cum illo, initio mon-
 tigenæ, incolæ Modin, quibus vicini, aut
 ij etiam ex vniuersa Iudæa, qui Ecclesiam
 restitui cupiebant, sese adiunxerant. Cæ-
 terum vniuersi ferè, & maximi quiq; An-
 tiocho obtemperabant, eiúsque imperiũ
 vltro patiebantur; adeò vt eius exercitu
 penè profligato, ipsoque demum misere
 mortuo

*1. Mach. 2.1.
 ver. 43. 1.2.
 ver. 22. 6. 3.
 7. 43.*

mortuo, cum excutiendi iugi perpulchra daretur occasio, filium ipsius Regem ac dominum non modo non inviti agnoscerent, verum etiam ad Regnum capessendum invitarent. Possem etiam huc adducere exemplum Debora. Deus mancipavit Israel Iabino Regi Chanaan, iamque vicesimum annum ei serviebat. Itaque tanto tempore ius regni quodammodo praescripserat, Israel ferè uniuersus Deos alienos colebat. Praecipuè quæque Tribus, Ruben, Ephraim, Benjamin, Dan, Aser, & cæteræ, quarum maiores erant vires, Iabino adhærebant. Nihilominus Debora Prophetissa, quæ ius dicebat Israeli, excitat ad arma Tribus Zabulon, Nephtali, & Isachar, vel saltem quosdam ex illis tribubus, Duce Barac, Sisaram magistrum militiæ Iabini fundit, Israelémque tandè iugo Chanaanorum, invitum, & tantum non renitentem non liberat modò, verum etià cultum Dei veri restituit. Verum quia extraordinario motu Debora excitata videtur, nec disertis verbis Scriptura probat Lobnensium factum, etsi tacèdo consentire videatur, ut neque etiam libri Machabæorum usque adeo magna fuit in primitia Ecclesia authoritas, ac præterea legi-

1. Machab.
6. v. 21. c.
7. & passim

Judic. c. 4.
& 5.

bus magis, quam exemplis, disceptādum vulgo dicant: ex factō, quid iuris statuendū sit, examinabimus.

Diximus, Rēgem iurasse in legem Dei, Ecclesiæque conseruationem, quatenus fieri posset, spondisse. Vniuersum item Israelē, tanquam vnum aliquem, idē stipulante Deo, promississe. Iam verò dicimus, singulas etiā vrbes, singularumque urbium, quę Regni partem faciebant, magistratus, idē sigillatim quatenus sua interesset, diserte spopōdisse. quod & vrbes & societates omnes Christianas tacitē fecisse consequitur. Iosue senio confectus, & morti proximus, congregat vniuersum Israelē in Sichē ad pręsentiam Dei. Erat enim in Sichem Arca fœderis Domini. Eò dicuntur conuenisse Seniores Israel, Principes Tribuum, Iudices & pręfecti, atque ij adeo omnes, qui publicam authoritatē in singulis Israelis urbibus obtinebant, & iurasse in Legem Domini, vltroque & spōte Dei omnipotētis iugum elegisse. Vnde euidenter apparet, singulos Magistratus, Urbium, à quibus mittebantur, nomine spopōdisse se curaturos & operā daturōs, vt Deus ex Legis pręscripto in medio sui coleretur. Iosue verò tum fœdere inter
Deum

Iosue 24.

Deum & Populum sanctè percusso, tabulisque fœderis ritè consignatis, in perpetuam rei memoriam, lapidem illico erexit. Itaque si Arca Domini accersenda est, convocantur omnium regionū Urbiumq; Principes, Chiliarchi, Centuriones, Præfecti, & cæteri, Daudis & Synagogæ Israeliticæ decreto & mandato. Si Templum Domino extruendum, idem prorsus observatur. Ac ne quidquā Regibus creatis immutatum putetur, fœderi sub Ioa, inter Deum & Populū, itemq; sub Iosia sanciendo, iidem omnes inter sunt, iidem omnes sigillatim astringuntur. Itaque non Rex modo, sed Regnum, nec Regnum modo uniuersum, sed Regni partes omnes Deo sigillatim fidem & obsequiū promittunt. Non, inquam, Rex modo, sed Israel, nec Israel tantum, sed singulæ Israelis vrbes, earumque præfecti, se sanctè Deo devinciūt, & quodā quasi hominio ligio in perpetuum adversus quemlibet adstringūt. Exemplum ex iis, quæ hodie in usu sunt, desumptum, rem luculentiorē faciet. In Imperio Germanico, cum Imperator inaugurādus est, adsunt Electores & Principes, tum Ecclesiastici, tum laici, aut ipsi, aut per legatos. Item Prælati, Comites, Ba

Iosue 24.
ver. 15.

1. Chro. c. 13.
2. Chr. c. 5.
1. Reg. c. 7.
1. Chr. c. 28.

2. Reg. c. 11.
2. Reg. c. 23.
2. Chro. c. 23

rones denique omnium vrbium imperia-
 lium legati, cum mandato in eam rem
 speciali, ac sese, eosque, quorum vicem
 gerunt, certis sub conditionibus, Impera-
 tori submitunt ac subiiciunt. Iam, esto a-
 liquis, qui Imperatorem ultro agnitum,
 de gradu eo deiicere conetur, qui ipse
 imperium affectet, Principes verò & Baro-
 nes auxilia debita, & tributa consueta Cę-
 sari denegent, quin non conniueant mo-
 do ipsi, sed etiam cum adversario perfidi-
 cę colludant: an non, putas, Argentora-
 tenses fortè, aut Norimbergenses, qui fi-
 dem legitimo Imperatori promiserunt,
 prædonem illum iure optimo arcere &
 excludere posse? Imò verò ni fecerint, ni
 laborāti Imperatori succurrerint, an fidei
 præstitæ satisfecisse censebis? cum præser-
 tim is, qui præpositum suum nō protexit,
 cum posset, in pari causa factori habendus
 sit. Quod si ita est (viri revera in cōfesso est)
 an non idem Lobnensibus, aut Modinen-
 sibus, & licet, & ex officio competit, si
 Deum, cuius obsequio sese in primis de-
 vinctos sciunt, cæteri Regni ordines de-
 seruerint? Existat ergo Ioramus, aut An-
 tiochus aliquis, qui cultum veri Dei tol-
 lat, qui sese supra Deum extollat: conni-
 ueat

L. 3. l. omne
 delictū. §.
 ult. D. de
 verulit.

ueat, aut colludat Israel: quid ei vrbi, quæ Deum purè colere cupit, faciendum dicemus? Primum, dicat cum Iosue, Vos quidem vniuersi eligite, vtrum malitis obedire Deo vero, an diis Amorrhæorum. At ego saltem & familia mea seruiemus Domino. Eligite, inquam, vtrum huic, alienū imperiū nullo iure invadenti, ea in re parere velitis: ego sanè cui fidē præstiti, quoquo eventu seruabo. Nec vllatenus sanè dubito, quin Iosue omni conatu suo, cultum Dei veri, in Thamnath Serath vrbe Ephraim, quæ eius possessio & familia erat, retinuisset, etiamsi vniuersi Israelitæ, Deum Amorrhæorum in terra Chanaan coli voluissent. Quid si verò Rex vltius pergat, Præfectos mittat, qui nos ad impia sacra adigant, Deum denique è medio nostri expellere iubeat? an nō Regi Regiisque portam, si possumus, occludemus potius, quam Deum Regem Regum vrbe nostra excludamus? Advertant hic Municipales, Ciuésve & municipiorū ciuitatūque Populi Dei præfecti, duplex se fœdus iniisse, duplex iusiurandum præstitisse. Primum & antiquissimum Deo, vti Populus sit Populus Dei: secundum, & proximum, Regi, vti Populus obsequatur Regi, tan-

Iosue c. 24.
ver. 15.

Iosue c. 15.
v. 50.

10. Collat.
de forma
fid. & c. 1.
de noua fi-
de l. form.

quam duci Populi Dei. Itaque vt Vice Re-
gi, aduersus Imperatorem Regemve tuum
coniuranti, quantumvis magnam antè au-
thoritatem accepisset, si in vrbe nostra ob-
fessum dedi posceret, parèdum non foret,
imò ex ipsa fidelitatis formula omni mo-
do resistendum. Eodem pacto, summum
scelus, ac vix vlllo modo expiandum arbi-
tremur, si Deum in medio nostri habitan-
tem, iubente Principe, vasallo, inquam &
ministro Dei, aut expellamus, aut in ma-
nus hostium, quatenus in nobis situm est,
prodamus. Dices tu fortè: Verùm vrbes ad
Principem pertinent. itaque aditum iure
denegare non possis. At, inquam ego, vr-
bes non consistunt in lapidum coacerua-
tione, sed in Populo. Populus verò, est Po-
pulus Dei, qui deo primum, dein Regi te-
neretur. Quantum verò ad ipsas vrbes perti-
net, etsi ad Reges vrbium potestas, ad mu-
nicipes tamen pertinet dominium. Sunt
etenim vniuersa in Regis imperio, non in
patrimonio. Deus verò vnus est omnium
vere proprietarius dominus, à quò & ille
imperium, & hic patrimonium habet. Er-
go, ais, licebit subditis, Religionis causa à
Rege deficere? An nò verò, si semel hoc sta-
tuatur, quam rebellionis fenestrâ aperias,
vides?

Seneca li. 7.
de benef. c.
6. 7. & c.

vides? Attende verò hic patienter, & rem accurate considera. Possem ego vnico verbo respondere, cum optio altervtrius datur, à Rege magis, quam à Deo deficiendū esse, aut ex Augustino, vbi non est iustitia, ibi non esse Rempublicam. Iustitiam verò non esse, vbi homo ipsum hominem Deo vero tollit, & immūdis dæmonibus subdit, cum iustitia ea virtus sit, quæ sua cuiq; distribuit. Itaque qui eiusmodi dominiis sese subtrahunt, dæmoniis sese subtrahere, & latronum multitudinem potius, quā Rempublicam deferere. Verum, vt altius rem repetam, videntur, qui eo modo se gerent, quo diximus, defectorum loco non esse. Deficiunt à Rege vel Republ. qui hostili animo, Regis Reipublicæ ve imperio sese subtrahunt, Itaque & inter hostes numerantur, & plerunque quibusvis hostibus periculosiores existunt. Hi verò, de quibus agimus, nil simile habent. Primum imperata facere non recusant, modo ea imperentur, quæ iure possunt, aut saltem Deo iniuriam non faciunt. Tributa, vectigalia, munera, oneræque consueverunt non detrectant, modo id tributi, quod Deo debent, non intervertatur. Cæsari Cæsarem agenti parent: Cæsari fines

August. c. 28
li. 19. de Ci-
uit. Dei, &
lib. 4. c. 4.

L. 5. D. de
cap. minut.

suos excedenti, alienum imperium affectanti, Dei solium invadenti, superiorem amborum Dominum bello petenti, parere, iniustum putant. Deinde hostiliter se propriè non gerunt. Hostium est laceßere, provocare, ultro impressiones facere. Hi demum laceßiti, armis insidiisque petiti, vix tandem imminente vndequaque morte, arma capiunt, seseque adversus illatam vim tuentur. Ac propterea cum hostibus non quotiescunque velis, pacem habeas. Neque enim quotiescumque arma depones, aut laceßere desines, deponant illi cõtinuo, & otium capeßant. Cum his, quotiescũque optaris, præsto est. Desine cædere, cedunt: desine Deum oppugnare, desinent propugnare. Arma si velis iis è manibus excutere, satis est, modo ne percutias. Quia enim non inferunt, sed excipiunt ictus, ubi enssem reposueris, statim clypeum abiiciunt, ac propterea plærunq; insidiis & perfidiæ patent. quod exempla recentia satis ostendunt. Ut verò fugitiuum eum servum nõ dixeris, qui vulnus intentanti Domino manum opponit, qui furenti sese subducit persequenti, cellulae suæ ianuam, interea dũ furor deferuescit, occludit, multo minus hos defectores cedere

fere queas, (cū sanè seruorū nomine & loco non censeantur) qui pari aut etiā vehemēiori furore percito Principi, portas vr-
bis claudant, vbi resipuerit, & ad se redie-
rit, imperata facere parati. In eo genere est
Dauid dux exercitū Israelis, sub Saule fu-
ribūdo rege, qui sepe & calūniis vexatus,
& ex insidiis petirus, montiū asperitate se
se tuetur, quin & Ceilam quoq; vrbē fur-
ri regis opponere parat. Is enim quoscun-
que potest, ad se allicit quidē, verum non
vt Saulis viram, quod evidenter apparuit,
petat, sed vt propriam tueatur. Itaque Io-
nathan Saulis filius, non veretur cum Da-
uide fœdus percutere, & identidē renoua-
re. quod fœdus Dei Iehouæ vocatur. Abi-
gail verò diserte ait, Dauidē iniquè petitū
gerere bellū Dei. In eo genere sunt & Ma-
chabeï, qui oblatā ab Antiocho pacē, salua
Religione, tum cum bellum commodissi-
mè geri poterat, recipiūt tum à Demetrio
Rege, tum etiā ab aliis. Nostro verò etiam
tēpore meminimus eos, qui pro vera reli-
gione, adversus impietatem in Germa-
nia Galliaque pugnarunt, quotiescunque
Dei purè colendi potestas facta est, arma
vltro deposuisse, & plærunque aded, cum
aut Saulem Philistini arma aliò vertere
coge-

2 Sam. c. 21.
ver. 22.

2 Sam. c. 25.
ver. 28.

1. Mach. c. 6
v. 60. 66.

cogerent, aut Antiochum vicinorū impetus revocarent, aut aliàs bello continuando opportuna essent omnia. Eiusmodi ergo signis possint hi à defectoribus facile distingui. Est verò & aliud manifestissimum, si ita secedant, vt quotiescunque secessionis causa sublata fuerit, ni extrema necessitas impediatur, redeundum statuunt. Tum enim non à Rege, sed à Ioramo vel Antiocho, non, inquam, à Republ. sed à priuata vnius aut plurium Tyrannide secedere putantur. Hanc nos distinctionem Theologorum Parisiensium cœtus (Sorbonam vocant) sæpius docuit. Anno circiter CIO CCC. Bonifacius octauus Pontifex, Regalia, quæ ad Regem Francorum pertinent, sibi vendicabat. Philippus Pulcher, Rex Francorū, eū per literas acerrimè obiurgauit. initiū erat, PHILIPPVS, &c. BONIFACIO, sese pro summo Pontifice gerenti, &c. Ac tum quidem vniuersi agnoscebant Pontificem esse vicarium Dei in terra, & Ecclesiæ vniuersæ caput. Itaque quod vulgo dicunt, communis error, iuris loco erat. Nihilominus tamen convocata Sorbona respondit, Regem Regnūque, absq; vlla Schismatis culpa, eiusmodi Pōtificis obsequio sese

*Annales
Franciæ.
Archidia Ca
mera Rati
scinorum
Lutetia.*

*L. Barbar.
Philip. D. de
Senat.*

seſe ſubtrahere poſſe. Schiſma enim non ſeparationem, ſed cauſam facere. Quod ſi iuſta cauſa ſub eſſet, ſeparationem à Pontiſice, non ab Eccleſia, & à Bonifacio quidẽ propriẽ, non à Pontifice fore, eoſq; dum bonus aliquis ſedem Pontificiã teneret. In quã verò diſcrimina vniuerſi Regni animas ab Eccleſia, ni hæc diſtinctio vera ſit, ſeparatas coniicerẽt, nemo eſt, qui nõ facile diiudicet. An non verò, rege iura Dei Opt. Max. invadẽte, animãq; hominum, quas Chriſtus ſanguine ſuo liberauit, duriffima ſeruitutẽ opprimente, multò æquius ea diſtinctione vti licebit? Conſimiliter anno CIƆ. CCCC VIII. Benedicto decimo tertio Eccleſiã Gallicanã tributis & exactionib. grauante, Clerus Gallicanus à Carolo ſexto cõvocatus ſtatuit, Regẽ & Regni incolas Benedicto obtemperare non debere, nèpe hæretico, Schiſmatico, ea dignitate prorfus indigno. quod & ordines Regni probarũt, & Senatus Luterianus Areſto cõprobauit. Quin & quos Benedictus decimus tertius, tanquã Eccleſiæ hoſtes & defeſtores anathemate perculerat, protinus abſoluẽdos cẽſuit, & ipſo iure Eccleſiæ cõmunionẽ non excluſos fuiſſe iudicauit, & vt aliàs sæpẽ
in

*Annales
Car. 6. Mon
ſtreletus.*

in Gallia, & alibi quoq; factitatū passim legimus. Nēpe vt evidenter ostenderēt, si is, qui Principē locū obtinet, sese male gerat, ab eo sine defectionis crimine secedi posse, & aliud omnino esse, à malo Pōtifice, aliud ab Ecclesia, aliud à Rege impio aliud à regno secedere. In ea verò causā Lobnēses fuisse vidētur, quos restituto in integrū dei cultu, inter Ezechie subditos an numerari legimus. Quod si verò hec distinctio obtinet, cum Papa Principis alicuius (qui eū superiorē agnoscit) iura invadit: an non longe iustius, si Princeps, si vassallus, inquam, Regalia Dei iura ad se rapere conetur? Statuendum ergo tandē, vniuersum Populum, Principem impia iubentē, aut pia vetantē, authoribus iis, qui Populi authoritatem penes se habent, aut pluribus coercere posse & debere. Deinde vniuersos, aut saltē potiores in singulis regionibus vrbibusve, authorib. præcipuis magistratibus, tāquam à Deo primū, dein à Principe constitutis, impia sacra à suis mœnibus arcere iure posse, piāque iisdem tueri: quin & Ecclesiæ, quæ vna omnino est, pomœria dilatare posse; ac ni fecerint, diuinæ Maiestatis, si saltem potuerint, reos esse:

Superest

2. Reg. c. 19.
v. 8.

Extrav. ed
maio. & o.
bed.

Supereſt modo , vt de ſingulis agamus, qui priuati dicuntur. Primum ex fœdere inter Deum & vniuerſum Populum; vt ſit Populus Dei, ſinguli non tenentur. Vt enim quod vniuerſitati debetur, ſingulis non debetur : ita nec quod debet vniuerſitas, ſinguli debent. Deinde, non tenentur ex officio. Tenetur enim quiſque Deo inſeruire in eo munere, ad quod vocatus eſt. Priuati verò non habent poteſtatē, non funguntur magiſtratu, non habent Imperium, nō ullū ius gladij. Itaq; vt gladiū priuatis nō tradidit Deus: ita nec vſum gladij ab iis repoſcit. Priuatis dicitur: Mitte gladium tuum in vaginam. At magiſtratibus: Non geritis gladiū fruſtra. Illis, ſi ſtringant, culpæ datur: his, ni cum opus eſt, ſtringant, magna negligentia culpæ loco eſt. Quid vero? dices. An non ſingulis fœdus eſt cum Deo, vt vniuerſis? idiotis, vt magiſtratibus? Quorſum ergo circumciſio, quorſum Baptiſmus? quorſum illa toties repetita tota Scriptura ſacri fœderis mentio? Eſt ſanè omnino: ſed longè diuerſiſſimū. Vt enim omnes omnino ſubditi iuſti Principis, cuiuſcunq; tandem gradus ſint, tenentur ei obedire: quidam verò, peculiari quadā obligatio-

ne;

An priuati
repugnare
a. m. p. p. f.
ſi. t.

L. ſunt 7. 5.
i. D. quod
cumſq. e. v.
muerſ.

Math. 23.
Rom. 13.

ne, vt magistratus, curare præterea, vt cæteri obediant: ita omnes omnino homines, Deo quidem inferuire tenentur: at quidam, vnà cum maiori munere, maius onus acceperunt, adeò vt de cæterorum culpa, si negligent, quodammodo teneantur. Curare debent Reges, vniuersi, quique ab vniuersis gladium habent, Magistratus, vt Ecclesiæ corpus ritè gubernetur: singuli, vt eius tantum Ecclesię membra sint. Illi, ne Templum Domini polluat, ne collabatur, sed aduersus omnem corruptionem internam, iniuriãve externam tutum sit. Hi, ne corpus suũ, quod Templum Dei est, impurum sit, vt in eo spiritus Dei inhabitet. Qui enim vastabit Templum Dei, quod vos estis, ait Paulus, Deus quoque eum vastabit. Illis ea de causa commissus est gladius, quo extrinsecus accinguntur. His commendatus tantum gladius spiritus, verbum nempe Domini, quo Paulus Christianos omnes aduersus Diaboli impetum accingit. Qui ergo facient, si Rex ipsos ad impia sacrificia adigere velit? Si, qui ab vniuerso Populo authoritatem habent, Optimates sese opponant, aut sui saltè magistratus, pareant obsequantur, & omni conatu, omni indu-

1. Corin. c. 3.
4. 17. & c. 6.
7. 19.

Eph. 6. v. 17

stri

stria, tanquam Deo ipsi militantes, pios
piorum conatus adiuuent? Habent exem-
plum inter alia Céturionum & militum,
qui Principibus Iuda, Ioiadæ hortatu, Ec-
clesiam ab idololatria, Regnumque à Ty-
rannide Athaliæ Reginæ vindicantibus,
alacriter paruerunt. Sin optimates & ma-
gistratus furioso Regi applaudunt, aut sal-
tem non resistunt, præsto est consilium
Christi; in aliam ciuitatem se recipiât. Ha-
bent exemplum piorum è decem Tribu-
bus Israel, qui veri Dei cultu per Ieroboam-
mū sublato, vniuersis conuiuentibus, ad
Regem Iuda, apud quem cultus Dei re-
manserat, sese recipiunt. Sin alio fugere
non datur, vitæ potius, quàm Deo renun-
cient, crucifigantur potius, quàm Christū,
vt Apostolus loquitur, denuo crucifigant.
Nolite, ait Dominus noster, timere eos,
qui corpus tantum occidere possunt. Ita
verò & ipsius & Apostolorum, & innume-
rorum piorum Martyrum exemplo edo-
cti sumus. Ergo nemini priuato licebit ar-
mis resistere? Quid ergo de Mose statue-
mus, qui Israelem, invito Pharaone Rege,
abduxit? De Ehod, qui decimo octauo re-
gni demum anno, quo Regnum vsucaptū
videri poterat, Eglonem regem Moab in-

Matth. 10.
ver. 23.

2. Chr. c. 11.
v. 13. c. 15.
ver. 9.

Hebr. c. 6.
ver. 6.
Matth 10.
ver. 28.

Exod. 12.
etc.
lu. c. 3. v. 16

2. Reg. c. 9.

terfecit, Israelemque Moabitarum iugo liberauit? De Iehu denique, qui Ioramum Regem, cui ipse militabat, interfecit, Achabi stirpem deleuit, Baalitas ad inter-
 necionem omnes excidit? An non erant illi omnes priuati? Certè si ipsos per se spectes, quia ordinariè constituti non erant, priuatos dicere queas. At ex quo extra ordinem vocatos scimus, ipso quasi Deo, suo illos gladio evidenter accingente, nò modo priuatos non censebimus, verum quibusvis ordinariis potiores. Mosis vocatio & expresso Dei verbo, & signis evidentissimis comprobatur. Ehod dicitur à Deo excitatus; qui Tyrànum occidendo, saluum faceret Israelem. Iehu, iussu Elizei Prophetæ vnctus, qui stirpem Achabi deleret, etsi præcipui quique, Regè eum, antequam rem aggrederetur, salutarant. Idè de cæteris, qui ex sacra Scriptura adduci possint, ostendi possit. Iam verò cum neque Deus ore suo, neque extra ordinem per Prophetas loquatur, est, quod hac in re sobrij in primis & circumspecti simus. Si quis enim eam sibi authoritatem, quasi diuino spiritu afflatus, arroget, videat sanè, ne arrogantia inflatus sit, ne sibi ipse Deus sit, ne sibi ex se magnos illos spiritus sumat

sumat. ne itaque concipiat vanitatem & pariat mendacium. Videat verò etiam Populus, ne dum sub signis Christi militare cupit, Theudæ forte Galilæo alicui, aut Barlozbæ (quod non ita pridem in Germania Muncerianis accidit) magno sub malo militet. Nec eo quidē id dico, quod idem ille Deus, qui nobis nostro hoc sæculo Pharaones & Achabos immittit, liberatores etiam aliquando aliquos extra ordinem non exciret. Certè ipsius neque iustitiæ, neque misericordiæ quidquam ullo tempore decedit. At fanè si minus exteriora illa signa adsunt, interiora saltē hæc agnoscamus ex effectibus oportet, mentē ab omni ambitione vacuam, verum & feruidum zelum, conscientiam denique & sciētiam, ne aut errore ductus, alienis diis, aut furore ambitionis percitus, sibi magis, quam vero Deo seruiat.

Porro ne quid scrupuli superfit, respondendum iis videtur omnino, qui Ecclesiā armis defendi non posse aut censent, aut certè, quod verisimilius est, censere videri volunt. Aiunt hi, non sine magno mysterio Deum veruisse in Lege, ne altare ferro poliretur. Consimiliter eò, quod in extruendo Salomonis Téplo nullus ferræ mal-

*An arma iis
stē pro Reli-
gione capi-
antur.*

Exod. 20.

ver. 25.

Deut. 27.

Iosue 4.

1. Reg. c. 6.

ver. 7.

leive ferrei strepitus auditus sit; Ecclesiā, quæ viuum Templum Dei est, armis nō esse instaurandam, innui volunt, quasi lapides ipsi ex lapidicinis, absq; ferro excisi fuerint: quod ipse Scripturæ textus falsum esse, arguit. Quod si speciosæ isti allegoriæ opponamus, quod Nehemiæ quarto capite legimus, partem Populi cæmentum, partem ensem, quosdam etiam vtrūque in extruendo secundo Templo gestasse, ne nouum opus ab impiis turbaretur, nempe, non vt gladio extruerent; sed ne destrueretur, cauerent: eodemque modo Ecclesiam non propagari armis quidem, sed aduersus hostes, qui propagationem eius impedire conantur, propugnari. Deniq; pios Reges & Principes innumeros, cultū Dei aduersus Ethnicos, armis, quod tota Scriptura adparet, vindicasse. Obiiciunt illi continuo; illa quidem locum habuisse sub lege: at ex quo Christus gratiā attulit, nec phalerato quidem equo, sed a fello vectus Hierusalem ingredi voluit, omnino desisse videri. Primum, in confesso apud omnes est, Christum, quandiu in terris egit, non iudicis, sed rei, non Regis, sed priuati partes egisse. Itaque quod arma non tractarit, ad rem nō pertinere. Verum

rum hos iam rogatos velim: An per advē-
 tum Christi, ius gladij magistratibus ab-
 latum putent? Si aiunt: obstat Paulus, qui
 magistratus non frustra gestare gladium
 dicit, & adversus plebis imperum opem
 eorum non recusat. Sin contra: cur ius
 gladij habere eos velint, nisi vt bonos ser-
 uando, malos male perdendo, Deo, qui i-
 plos gladio accinxit, inseruiant? Qua verò
 magis in re, quam in Ecclesia, quæ ei dica-
 ta est, adversus impios tuenda? in peculio
 Christi adversus prædones asserendo? Ro-
 garim deinde, an militiam omnem inter
 Christianos exauctoratam putent. Si aiūt:
 Cur ergo Iesus Cēturionis orationem ex-
 audit? Cur milites Ioannes stipēdio con-
 tentos esse, neminem concutere iubet, mi-
 litiam deferere nō iubet? Cur Cornelium
 Centurionem, primitias, inquam, Gentiū
 Petrus baptizat? nec tamen ad cingulum
 militiæ deponendum hortatur? Quod si
 verò militia iusta est, quæ tandem illa iu-
 stior esse possit, quæ superioris iussu, pro
 Ecclesiæ defensione, proque piorum salu-
 te suscipitur? An enim aut vlla maior Ty-
 rannis est, quam quæ in animam exerce-
 tur? aut laudabilior militia, quàm qua ex-
 trema Tyrannis coercetur? Rogarim de-

Rom. 13.
Acto. 23.

Matth 8.
Luc. 3. v. 14.

Act. 10.

mum, an vlla Christianis bella gerere liceat. Si negant: cur ergo milites, Centuriones, Tribuni militum in Ecclesiam recipiuntur, quorum vnum id munus est, vt bello inseruiant? Cur integras legiones è Christianis conflatas legimus, Melitésem, inquam, victoria tantopere ab antiquis Doctoribus & Historiographis decantata insignem, Mauritianamque martyrio decoratam? Quod si verò licet, vt fortè tuendis finibus, arcendisque hostibus licere fatebuntur; an non multò equius, tuendis piis, arcendis impiis, propugnandis denique Regni Christi, Ecclesiæ, inquam, finibus? Ecce enim alioqui meretricem Babyloniam decem Regum, quos ipsa fascinarit, armis exterminatū tandem iri Ioānes prædicit? Ad hæc, quid aliàs, de bello Constantini in Maxentium, Liciniumq; tot panegyricis celebrato, tot doctorum calculis cōprobato? quid denique de Principum Christianorum in Turcas & Sarcenos expeditionibus statuemus? quorū vnus omniū finis aut fuit, aut esse debuit, ne Templum Domini aut extructum destruerent, aut extruendū turbarent? Ergo Ecclesia etsi armis non propagatur, armis tamen iustè propugnari potest. Quin non

*Apocal. c. 17
ver. 16.*

minus

minus martyres sunt, qui in sacro illo bello moriuntur, quam qui crucem Religionis causa patiuntur. Imò sane eo videntur potiores, quòd illi oblatam quidem mortem non recusant, hi verò ultro scientes prudentesq; suscipere videantur. Propagare conantur Turcæ suam opinionem armis, qui quancunque provinciam armis subegerint, Mahumetis impia dogmata, sola violentia nixi, inducunt, qui arma in Alcorano suo tantopere commendavit, ut illac recta ad superos iri, dicere non vereatur: etsi neminem ipsi interea cogunt. At multo magis adhuc is Religionis Christi que hostis, & ij Reges, quos ipse fascinauit, qui luci Euāgelij flammæ, verbo Dei verbera, gladio spiritus acies instructas opponunt, omnesque, quantum in iis est, ad impia sacra, oblati tormentis adigunt. qui quam suam fidem vocant, perfidia, & traditiones suas assiduis proditionibus defendere, & asserere non verentur. Propugnant verò contra pij Principes & magistratus; qui propagatā propagandamve Christi vineam, ne ab apris vastetur, sæpe circundant & muniunt, qui prædicatione verbi ad puram religionem conversos scuto suo protegunt, gladioque

tuentur. qui templum Dei, è viuis lapidibus extructum, dum ad fastigium vsq; adfurgat, aduersus violentos impiorū impetus, vallo, fossa, aggere, omni industria cōmuniūt. Hæc hætenus, ne quis in ea quæstione hæreat. Sciant itaque vniuersi, aut qui ab iis constituti sunt, Regni officarij, eorūve plures, aut singuli, ni Regem Legem Dei corrumpentem, restituīve prohibentem, intra fines suos contineant; ex fœdere cum Deo inito grauitè peccare. Ciuēs Provincialēsve, qui Regni alicuius aliquantulam partem faciunt, ni impietate à suis saltem finibus arceant, quā Rex intrudere velit, aut piam doctrinam quibuscunque modis, etiam si ad tempus secedendum sit, retineant, consimiliter pœnæ obnoxios esse. Priuati demum, si impia iubēti pareant, nullo modo excusari. Cæterū ni extra ordinem ad id munus vocatos euidenter appareat, suapte autoritate arma se capere nullo iure posse. Et ea quidem omnia ex Scriptura sacra constare videntur.

TERTIA

TERTIA QVAE- STIO.

*AN, ET QVATENVS PRIN-
cipi rempublicam aut opprimenti, aut perden-
ti, resistere liceat. Item, quibus id, & quo
modo, & quo iure permissum sit.*



QUAE nobis hîc de legiti-
ma Principis authorita-
te agendum est, non e-
quidê dubito, quin Ty-
rannis & malis Princi-
pibus hæc quæstio odio-

sa futura sit. Qui enim quodcunque li-
bet, sibi licere putant; non mirum, si ratio-
nis & legis vocem sustinere nullo modo
possint. At bonis saltem Principibus gra-
tam eam fore spero, qui magistratum, qua
tandem authoritate potiarur, nil nisi ani-
maram legem esse sciunt. Nec verò si quid
in illos acrius dicatur, ægrius hi ferent,
quasi sua vllatenus interfit. Tyranni Regi-
bus, iniusti Principes iustis, è diametro op-
ponuntur. Itaque tantum abest, vt quod
in Tyrannos dicitur, quidquam Regibus

detrahat, vt contra quo plus illis detrahitur, eò plus gloriæ his accrescat, nec illi quidem vituperari possint, quin hi laudentur. Illi sanè quid sentiant, susque deque habeo. Neque enim ipsis, sed in ipsos scribo. Hi quin consentiant, vix dubitare queam, qui non secus ac Pastores lupos, Medici veneficos, Prophetæ Pseudoprophetas, Tyrannos & iniquos Principes odisse debent. Quod enim odium natura canibus in feras iniecit, ratio certè Regibus in Tyrannos ingeneret omnino necesse est: cum illi rapto viuunt, hi rapinæ coercendæ nati & dati sint. Adulatores Tyrannorum frontem forte, si quam habent, contrahent, quos erubescere convenientius esset. Amici Regū, scio, nō modo assentientur & annuent, verum etiam ad stipulari non verebūtur. Vt quis ergo hæc legendo, aut studio, aut ira mouebitur, ita se mente affectum putet. Ad rem itaque adgrediamur.

Ostendimus antea, Deum Reges instituere, Regna Regibus dare, Reges eligere. Dicimus iam, Populum Reges cōstituere, Regna tradere, electionem suo suffragio comprobare. Quod quidem ita fieri voluit Deus, vt quantancunque authoritatē & po-

Reges à Populo.

& potestatem haberent, Populo, secundū ipsum, acceptam ferrent. Itaque omnem suam curam, cogitationem, industriam in utilitatem Populi conferrent. Nec verò se, ob aliquam naturæ præstantiam cæteris hominibus, non secus ac homines gregibus aut armentis, præesse arbitrarentur. Verum eadem omnino cum cæteris sorte natos, suffragiis & tanquam humeris Populi, ex humo in eum gradū sublato meminissent, in quorum postea humeros reipublicæ onus, magna ex parte, recuberet.

Aliquot ante sæculis, quàm Populus Israeliticus Regem à Deo peteret, Deus legem Regni sanxerat, quæ extat Deuteronomij xviii. Cum perveneris in terram, quam dominus Deus tuus tibi possidendam dedit, in eaq; habitaueris, ait Moyses, tu dices, Cōstituam Regem super me, ut cæteræ gentes, quæ sunt in circuitu; tum verò, eum Regem constituēs, quem Dominus tuus elegerit è medio fratrum tuorum, &c. Hic vides electionem Regis tribui Deo, constitutionem Populo. Postquam verò eò ventum fuit, ita prorsus observatum legimus. Seniores Populi Israelitici, qui Populum vniuersum repræsentabant, (eo enim nomine comprehēduntur

duntur, ut pafsim, Chiliarchi, Centuriones, Quinquagenarii, Decuriones, Iudices & præfecti omnium Tribuum Israel, tum verò maximè Principes & Capita tribuum) conveniunt in Rama ad Samuelè, & partim filiorum Samuelis, qui inique ius dicebant, pertæsi, partim bella eò melius gestum iri rati, Regem à Samuele postulant. Consulèti Samueli reteggit Deus, se Saulem elegisse, qui Populum regeret. Samuel itaque Saulem vngit. quæ omnia ad Electionem Regis postulante Populo factam pertinēt. Ac satis fortè fuisse videretur, si Samuel electum à Deo Regem Populo adduxisset, & ei parendum esse, monuisset. Nihilominus tamen quo se Rex à Populo constitutum sciat, Samuel indicit Comititia in Maspha, ibique quasi re adhuc plane integra & infecta, quasi, inquam, nondum constaret Saulis Electio, fors iacitur, quæ à Tribubus Tribum Benjamin, è gentibus gentem Metri, è gente Metri, Saulem. cum ipsum, quem Deus elegerat, feligit. Tum verò demum, Populo uniuerso acclamante, Saul Rex nominatus dicitur. At tandē, ne sorti omnia tribuat, postquam liberatis Ammonitarum obsidione Iabezanis, suæ virtutis specimē quodammodo

g. Samu. 8.
ver. 5.

g. Sam. c. 9.
ver. 16.

g. Sam. c. 10.
v. 17 & seq.

g. Sam. c. 11.
ver. 14.

modo edidit, nequicquam secedentibus quibusdam è Populo, ab vniuersis in Galgal, coram Domino rex confirmatur. Hic vides, eum, quem Deus ipse elegerat, quē fors à reliquis selegerat, suffragiis Populi Regem constitui. Quid verò Dauid? Evidentius adhuc, Saule reprobato, Samuel Dei iussu Dauidem, quem Deus elegerat, in Regē Israel vngit. quo facto, Spiritus Domini agit in Dauide, Saulē verò continuo deserit. Regnatne verò Dauid propterea? imò errat, vagatur, exulat, extrema sæpe experitur. nec prius Rex existit, quàm, mortuo Saule, vniuersi Populi Iehudæ suffragiis, Rex Iudæ primum, septem verò post annis vniuersi Israelis cōsensu, Rex Israel in Hebron vngatur. Itaq; bis vngitur, primum à Propheta, Dei iussu in Electionis signum; deinde, iussu Populi, dum Rex constituitur. quo semper recordetur Reges, se à Deo quidem, sed per Populum, & propter Populum regnare; nec verò Deo tantum & gladio, vt loquuntur, regnum acceptum ferant, qui gladio ipso, per Populum primum accincti fuerint. Idem prorsus in Salomone obseruatur: etsi is filius Dauidis erat. Deus elegerat Salomonem, vt sederet super solium Regū

1. Sam. c. 16.

2. Sam. c. 2.

2. *Samu.* 7. Regni sui, & disertè Dauidi pollicitus e-
 rat, se illi tāquam Patrem filio affuturum.
 7. 13.
 1. *Reg.* 5. Dauid ipse Salomonem Regni successorē
 1. *Chro.* c. designarat quibusdam ex Aulæ præcipuis
 28. 7. 5. præsentibus. Nec tamen id satis fuit. Ita-
 que convocat Dauid in Hierusalem Prin-
 1. *Reg.* 1. 7. cipes Israel, Principes Tribuum, Princi-
 32. pes earum turmarum, quæ statis quæque
 temporibus Regi ministrabant, Chiliar-
 1. *Chr.* c. 28 chos & Centuriones singularum vrbium,
 7. 1. & c. 29 Præfectos dominij Regij, filios suos, quin
 7. 22. & 24. & purpuratos omnes, & egregios quosq;
 viros, qui de Electione statuerent. Ac in eo
 cœtu, Dei nomine invocato, ab vniuerso I-
 sraelis agmine Salomon rex proclamatus,
 in Regē vngitur, inque Israelis solio (ita
 enim legitur) collocatur. Tum primū ve-
 rò Principes, Optimates, atque ipsi adeò
 fratres, ei sese iureiurando publicè de-
 vinciunt. Ne verò id in ambigua tantum
 fratrum successionē factum putes, eodem
 omnino modo alios passim constitutos
 legimus. Mortuo Salomone populus cō-
 venisse dicitur, ad constituendum Roboa-
 2. *Reg.* c. 10. mum. Cæso Amasia, Ozias filius eius vni-
 2. *Chron.* c. cus, ab vniuerso Populo Rex constitui-
 16. c. 36. c. tur. Post Ioramū, Ochozias, post Iosiam
 22. Ioacham filius, cui patris alioqui pietas
 non

non parum patrocinari potuisset. Quo
 pertinet & illud Chusai ad Absalom: Se- 2. Sa. c. 16.
v. 18.
 quar, ait, eum Regem, quem Deus, Popu-
 lus & vniuersi ex Israele elegerint, id est
 Regem legitimè & ritè constitutum. Ita-
 que etsi Deus lucernam Populo suo è stir-
 pe Dauidis perpetuam promiserat, etsi,
 inquam, Regū Israelis successio ipso Dei Psal. 132.
 verbo comprobata erat, nihilo minus ta-
 men, cum Reges non prius regnasse vi-
 deamus, quàm à Populo ritè constituti
 fuissent; concludere licet, Regnum Israe-
 lis, si stirpem spectas, hæreditarium certè
 fuisse: at sane si personas, omnino Electi-
 uum. Quorsum verò hæc, si de Electione
 constabat, vt in confesso est, nisi vt tan-
 tæ dignitatis à Populo collatæ recorda-
 tio ipsos sui officij perpetuò memores fa-
 ceret?

Ita verò Ethnicos etiam Reges à Popu-
 lo constitutos legimus. Nempe cum aut
 foris bellum, aut domi lites essent, vnus a-
 liquis, cuius de fortitudine & iustitia ma-
 gna erat multitudinis opinio, communi
 cōsensu in Regē assumebatur. Et apud Me-
 dos, inquit Cicero, Deioces ex arbitro iu-
 dex, è Iudice Rex creatus, & apud Roma-
 nos primi Reges. Itaq; cū Romulo sublato

Hero. lib. 1.
Cice. lib. 1.
Offic.

Liuij lib. 1.

centū Senatorum interregnum Quiritibus minus gratum esset, convenit, ut postea Reges suffragiis Populi, comprobante Senatu deligerentur. Tarquinius verò Superbus ideo Tyrannus habetur, quòd neque à Populo, neque à Senatu creatus, sola vi & potentia nixus, imperium tene-
ret. Propterea Cæsar etsi imperiū vi invaserat, tamen ut aliquo saltē iuris prætextu imponeret, imperium à populo Senatuq; accepisse videri volebat. Augustus verò etsi à Cæsare adoptatus, hæredem se imperij nunquam, quasi ex testamēto, gessit. Quin potius Senatui Populoque acceptū tulit, ut & Caligula, Tiberius, Claudius. Nero verò, qui primus vi ac scelere invasit imperium, nullo iuris colore fretus, à Senatu damnatus fuit. Omnino cum nemo Rex nascatur, nemo per se Rex esse, nemo absque Populo regnare possit: Populus verò contra & per se esse queat, & Rege prior tempore sit: Reges omnes à Populo primū constitutos fuisse, certissimè constat. Etsi verò, ex quo virtutē patrum imitati filij, nepotēsve, Regna sibi quasi hæreditaria fecisse videntur, in quibusdam regionibus Electionis libera facultas desuisse quodammodo videatur; mansit tamen
perpetuo

perpetuò in omnibus Regnis bene constitutis ea consuetudo, vt demortuis non prius succederent liberi, quam à Populo; quasi de nouo constituerentur, nec tamquam sui hæredes Patribus agnascerentur, sed tum demum Reges censerentur, cum ab iis, qui Populi maiestatem repræsentarent, Regni investituram, quasi per sceptrum & diadema accepissent. In Regnis Christianis, quæ hodie per successionem deferri dicuntur, huiusce rei vestigia evidentissima extant. Reges etenim Franciæ, Hispaniæ, Angliæ & cæteri, ab Ordinibus Regni, Paribus, Patriitiis, Magnatibus, qui vniuersitatē Populi repræsentant, inaugurari solent, & quasi in Regni possessionem mitti: non secus ac Imperatores Germaniæ ab Electoribus, & Reges Poloniæ à Vayvodis seu Palatinis, vbi ius suum Electio integrum obtinet. Nec verò illis Regius honos in vrbibus Regni prius exhibetur, quàm ritè inaugurati fuerint. Vt neque etiam olim Regni tempus, nisi à die inaugurationis, quod in Gallia accuratè obtinuit, computabatur. Ac ne ob continuatam aliquot successionum seriem hallucinemur, in illis iisdē Regnis, sæpe filio agnatum, primo-

*Annales
Gillij.*

genito secundogenitum Ordines Regni
prætulerūt. vt in Francico, Roberto Drui-
darum Comiti, Ludoicum fratrem; item
Roberto Capeti, nepoti, Henricum fratrē
secundogenitū, & cæteros aliis. Quin &
Regnū idē Populi autoritate, de gēte in
gentem, extantibus legitimis hæredibus,
translarum fuit, à Merouingiis ad Carlin-
gos, à Carlingis ad Capetanos. Quod &
in cæteris factū, è verissimis historiis satis
cōstat. Ne verò à Francico, quod cæterorū
exēplar semper habitū fuit, in quo, inquā,
successio plurimū obtinere videtur, rece-
damus, Pharamundū anno CCCCXIX
electū legimus: Pipinum, D CCL I Pipinū
filios, Carolū Magnum, & Carolomanum
DCC LXVIII non habita patris ratione
Sublato demū DCC LXXI Caroloma-
no, non accreuit continuò Carolo Magni
fratris portio, vt in hæreditatibus fieri so-
let, sed Populo & Concilio publico decer-
nente. Eodē auctore Ludouicus Pius, an-
no DCCC XII quamvis Caroli Magni fi-
lius, eligitur. In ipso verò Caroli testamē-
to, quod apud Nauclerum extat, rogat Po-
pulū, è suis Nepotibus per Conciliū Re-
gni publicū, quē voluerit, eligat, patruo
verò acquiescere Populi decretō iubet. Vt
d

Nauclerus.

de Carolus Caluus, è Ludouico Pio, & Iuditha nepos, se se apud Aimoinū Historiographū, Regē electū profitetur. In summa: omnes omnino Reges, ab initio electi fuerunt. Et qui hodie per successionē Regnū adire videntur, prius à Populo constituantur necesse est. Deniq; etsi Populus ob egregia quædā merita ex aliqua stirpe Reges sibi deligere, in quibusdā regionibus solet; stirpē ipsam, nō surculū deligit; nec ita deligit, qn si degeneret, aliā eligere nō possit. Qui verò ex ea stirpe etiā proximi sunt, nō tā Reges nascuntur, quàm fiūt; nō tā Reges, quàm Regū Candidati habētur.

Iā verò, cum Reges à Populo cōstituantur, omnino sequi videtur, Populū vniuersum Rege potiorē esse. Ea enim vis verbi est, vt qui ab aliquo constituitur, eo minor habeatur; qui ab aliquo auctoritatem accepit, suo authore inferior sit. Putiphar Ægyptius constituit Iosephū super familiā suam: Nabuchodonozor Danielelem super Babylonicam Provinciā. Darius Præsides centum & viginti super Regnū. Nēpe domini seruos, Reges ministros constituere dicuntur. Sic etiam Populus Regem, tanquam ministrū Reip. constituit. Quod nomē boni reges nō aspernati sunt; mali etiā

Populus potior Rege:

Genes. 39.

ver. 4.

Dan c. 2. v. 2.

48. c. 6.

v. 1.

affectarunt, adeò vt aliquot sæculorum
spacio, ex imperatoribus Romanis nemo,
nisi manifestè Tyrānus, quales Nero, Do-
mitianus, Caligula, dominus vocari vo-
luerit. Deinde Reges Populi causā institu-
tos constat. Neque enim propter centum
plus minus homūciones, cæteris plerūq;
longè peiores & inferiores, vniuersos crea-
tos potius, quam illos horum causā, dixe-
ris. Ratio verò postulat, vt is, cuius ratio-
ne alius extitit, eodem potior censeatur.
Sic naus causā, gubernator à domino
naus instituitur, qui, ne ipsa ad cautes
frangatur, aut malè cursum teneat, ad cla-
uum sedeat. Et ei quidem in eam rem in-
cumbenti, cæteri inseruiunt, ac dominus
ipse paret: est tamen ipse naus seruus, vt
mediastinus quilibet, nec à mediastino
genere, sed specie tantum differt. In Re-
publ. quæ naui comparari solet, Rex gu-
bernatoris, Populus domini loco est. Illi i-
taq; publicam salutem curanti, Populus
ipse paret & obtemperat: cum tamen non
minus sit & censeri debeat ipse Reipub.
seruus, ac iudex aut Tribunus quilibet,
nec ab his alia re differat, quàm quod ma-
iōra onera ferre, & plura pericula obire
teneatur. Propterea verò quæcumq; Rex
aut

aut bello acquirit, aut cum finitima occupatiure belli, aut iure dicundo, ut quæ in fiscum rediguntur, acquirit ipse Regno, non sibi; Populo, inquam, qui Regnum constituit, non secus ac seruus domino, nec vlla cum illo, nisi authore Populo, obligatio contrahi potest.

Præterea viuunt innumeri Populi absq; Rege: Regē absq; Populo, ne mente quidē concipere possis. Nec ideo Regiam dignitatem quidam adepti sunt, quod à cæteris hominibus specie differrent, iisq; tamquā Pastores gregibus, quadā naturæ præstantia præesse deberent. Quin potius ex eadē massa cretos, in eum gradum Populus extulit, ut si quam authoritatē, si quā potentiā haberent, illi acceptam ferrent, ac tanquā precariā possiderent. quod Francorū antiquus ritus aptè ostēdit, qui in clypeo sublatū Regem proclamabant. Curenim, quæso, dicuntur Reges innumeros habere oculos, innumeras aures, lōgas manus, celerrimos pedes? An, quod Argo, Gerioni, Midæ, aut iis, quos fabulæ finxerūt, similes sint? Minime verò. At sanè, quia Populus, cuius interest, vniuersus suos Regi oculos, suas aures, suas vires ac facultates in Reip. vsum commodat. Recedat à Rege

Populus: qui modò oculatus, auritus, robustus & vegetus videbatur, cæcutiet, obsurdescet, repente cõcider: qui modò magnificè triumphabat, vno momento apud omnes vilescet: qui modò diuinis propè honoribus afficiebatur, ludimagistrum Corinthi agere cogetur. Subrue istius Gigantææ molis, ac tanquam Rhodiani Colossi imam tantum basim; corruat, ac in frustra comminuat necesse est. Cum itaque Rex per populum & propter Populum existat, nec absque Populo consistere possit; cui mirum videatur, si Populū Rege potiorē esse concludamus?

Populus vniuersus representatur per Regni Officiarios ordinariē, per Ordinum cõuentus extraordinē, aut annuatim.

Porro, quod de vniuerso Populo dicimus, de iis etiam, vt in secunda Quæstione, dictum volumus, qui Populum vniuersum in omni Regno, vrbeue legitimè representant. qui quidem vulgo, Regni, nō Regis Officiarij censentur. Regis Officiarij à Rege pro arbitrio creantur, aut exauctorantur. quin & eo mortuo nullo loco sunt, & quodāmodo mortui habentur. Regni Officiarij contrā à Populo, in Concilio nempe publico, authoritatem capiūt, aut saltem olim capere solebant, nec absque eodem exauctorari possunt. Itaque pendent illi à Rege; hi à Regno: illi à supremo

premo Regni officario, qui Rex ipse est: hi à supremo dominio Populi, à quo ipse Rex, non secus ac illi, pendere debet. Illorum munus est, Regem curare: horum, ne quid detrimenti Respublica usquam capiat. Illorum, ut Regi, tanquam domino cuilibet domestici, adesse ac inferuire: horum, Populi iura & Priuilegia tueri, & ne quid Princeps ipse in illius perniciem committat, omittatve, diligenter providere. Denique sunt illi Regis ministri, serui, domestici, ad obsequium tantummodo instituti: hi contra Regis in iure dicundo veluti Assessores, Regij imperij consortes, adeo ut omnes quidem illi Rempubl. administrare teneantur non secus ac Rex; is tamen inter eos quasi Præses, primum tantum locum teneat. Ut verò Populus vniuersus Rege superior est; ita etiam hi, etsi singuli Rege inferiores sint, vniuersi tamen superiores censendi sunt. Primorum ferè Regum quàm lata potestas fuerit, ex eo satis apparet, quod Ephron Rex Hethæorum, ius sepulchri Abrahamo, inconsulto Populo, concedere non audet: neque Hemor Hæuius Rex Sichem, fœdus cū Iacobo ferre: nepe grauiora negotia ad Populū re-

Genes. 23.

Gen. 34.

Regni Offi-
ciarij in
Regno I-
srael.

ferri solita. Et in iis quidem imperiis, quæ
tunc temporis vna ferè vrbe circumscri-
bebantur, facile id fuit. At ex quo Reges
fines suos amplificare cœperūt, nec Popu-
lus vniuersus in vnum locum convenire
absq; confusione potuit; Regni Officia-
rij, qui Populi iura ordinariè tuerentur, in-
stituti fuerunt, ita tamē, vt si quando opus
esset, aut Populus vniuersus, aut eius saltē
quædā quasi Epirome, extra ordinē con-
vocaretur. In Regno Israelitico, quod o-
mniū ferè Politicorū iudicio, optimè cōsti-
tutū erat, eum ordinē fuisse videmus. Ha-
bebat Rex suos pincernas, dapiferos, cu-
bicularios, magistros domus, siue œcono-
mos, qui familiæ suæ prospicerēt. Habe-
bat & Regnum suos, vnū & septuaginta
seniores, & duces ex singulis Tribubus e-
lectos, qui Remp. siue pacis, siue belli tem-
pore curarent: suos deniq; in singulis mu-
nicipiis Magistratus, qui vt illi vniuersum
Regnū, suas singuli vrbes tuerentur. Hi si
quando de re maxima deliberandū erat,
cōueniebant, nec iis incōsultis, quidquā,
quod ad summā Reip. pertineret, decerni
poterat. Hos itaq; convocat Dauid, quan-
do Salomonē investiri Regno cupit, quā-
do Politiam à se restitutam examinari &

probari; quando reducenda est Arca, &c. Quia verò vniuersum Populum repræsentant, vniuersus tum Populus convenisse dicitur. Idem denique Jonathan, Saulis Regis sententia damnatū, morti eximunt, ex quo à Rege ad Populum appellacionem fuisse apparet. Ex quo verò Regnum propter Roboami superbiā scissum fuit, Synedrium Hierosolymitanum Septuaginta & vnus virorū, ea authoritate fuisse videtur, vt non secus ac Rex singulos, hi Regem iudicare possent. Huic autē præerat Dux domus Iuda, id est, Primarius quisque, ex tribu Iuda electus, vt vrbi Hierosolymitanæ Primarius ex tribu Benjamin. Exéplis res dilucidior fiet. Ieremias missus à Deo, qui vrbi Hierosolymitanæ excidium nunciaret, ea propter damnatur primum à sacerdotibus & Prophetis, id est, à Iudicio seu Senatu Ecclesiastico. Demū ab vniuerso populo vrbis, hoc est, ab ordinariis vrbis iudicibus, Chiliarchis nempe & Centurionibus. tandem à Principibus Iehuda; id est LXXI. viris assidentibus ad nouam portam Templi, causa cognita absoluitur. Ij verò, in eo ipso iudicio disertè damnant Regem Iehorabin, qui Vriam Prophetam paulo antè si-

1. Chron. 6.
29. v. 1.
1. Chro. 13.
v. 1.
1. Sam. c. 14.
ver. 45.

2. Chron. c.
19. ver. 1.
Nehe. 11.
ver. 9.

Ieremi. 26.
ver. 9. & 17.

Ierem. 37.

C. 38.

Esther 1.

Aristot. lib.

5. Pol. c. 11.

C. 7.

lib. 3.

milia comminantem crudelissimè trucidasset. Alibi verò legimus, Sedechiam huius Synedrij authoritatem adeò reveritū esse, vt Ieremiam à LXXI. viris, in tetrum carcerē detrusum non modo nō liberare, verū etiam vix in mitiorem transferre auderet. Suadētibus autē illis, vt in Ieremiæ mortem consentiret, respondet, eum in ipsorū manibus esse, seque ipsis contradicere nulla in re posse. Quin & veritus idē, ne in sermones, quos cū Propheta habuerat, inquirerent, quasi rationem eorū, quæ dixisset, redditurus, mendaciū cōminiscitur. Ergo erāt in hoc regno, regni officiorij rege superiores, in hoc, inquam, quod nō à Platone aut Aristotele, sed à Deo ipso omnis ordinis authore, omnis Monarchiæ sumō institutore, institutū & ordinatum fuerat. Tales erāt in Persico imperio septem Magi seu Sapientes, item *ἀμύτιμοι*, quasi honoris regij consortes, & qui regū aures & oculi nuncupabantur, quorū iudicio reges acquieuisse legimus. In Spartano Ephori, ad quos à rege appellabatur; quique ipsos etiā reges iudicabant, vt est apud Aristotelem. In Ægyptiaco ministri publici regi per Populū eligi tradique soliti, eò tantū ne adversus leges quidquam

com-

cōmitterēt. Vt verò Aristoteles reges, quibus eiusmodi officarij adiunguntur, legitimos passim vocat, ita etiā non veretur dicere, vbi ij desint, non Monarchiā esse, sed aut planè barbaricā Tyrannidē, aut Tyrānidi quāproximā dominationem. In Romano hunc locū obtinebāt Senatores & Magistratus per Populū creati soliti, Tribunus Celerū, Præfectus vrbi, & cæteri, adeò vt à rege ad populum provocatio esset. quod Seneca è libris Ciceronis de Repub. citat, & historia Horatij tergemini, ob cēdē sororis à regiis iudicibus damnati, & à Populo absoluti, satis indicat. Sub Imperatoribus verò, Senatus, Consules, Prætores, Præfecti Prætorio, Præsides Provinciarū, quæ Populo Senatuque tribuebātur, qui propterea omnes Magistratus Populi Romani vocabantur. Itaque cum decreto Senatus, Maximinus Imperator, hostis Reipublicæ iudicatus esset, inque eum Maximus & Albinus à Senatu Imperatores creati essent, milites iurarūt, se fideliter obsequuturos Populo Romano, Senatui & Imperatori, vtcumque sub Tyrannide hoc ius violaretur. Ad hodierna verò imperia quod attinet, (Turcicū, Moschicū, & alia huius generis, magna la

*Herod. lib. 8
in orat. Ma-
ximi & Al-
bini ad mi-
lites.*

trocinia, magis, quā imperia sunt) nullū
 omnino est, quod si nō hoc tēpore, saltem
 olim non ita administratū fuerit. Quod si
 verò illorū culpa & desidia factū est, vt qui
 busdā locis deteriorē Rēpublicā posteri
 acceperint, tenentur nihilo minus, qui eū
 locū hodie obtinent, ad antiquum statum
 omnia, quantū in se est, revocare. In Ger-
 manico, quod per Electionem confertur,
 sunt Electores & Principes tum Laici, tū
 Clerici, Comites, Barones, Ciuitates, Ci-
 uitarūque Legati, qui vt suis quique lo-
 cis Rempublicam curant, ita etiam in Co-
 mitiis, vniuersi Imperij Maiestaté, quan-
 do opus est, repræsentant. vbi, nequid Res-
 publ. ex priuatis Cæsaris studiis odiūve
 detrimenti capiat, prospicere tenentur.
 Itaque alius est imperij, alius Imperatoris
 Cancellarius, alij atque alij huius & illius
 officarij, diuersa æraria, diuersi quæsto-
 res. Et adeo quidem vulgatum est, Impe-
 rium Imperatori anteferri, vt Imperator
 imperio hominum præstare passim di-
 catur. Consimiliter in Polonico eum lo-
 cum obtinent Episcopi, Palatini, Castel-
 lani, Nobiles, Ciuitatum regionūque
 Legati extra ordinem cōvocati, quorum
 in cœtu tantum nouæ cōstitutiones fiunt,

*Speculum
 Saxonici.*

&

& bella decernuntur. Ordinariè verò Regni Polonici Cōsiliarij, Cancellarius Reipubl. Polonicæ, &c. etsi suos interea Rex cubicularios, œconomos, ministros & domesticos habet. Apud Polonos verò, qui disputet, vter potior sit, Rex, an vniuersus Regni populus per optimates repræsentatus, perinde faciat, ac qui Venetiis disputet, vtrum dux Republica superior sit. Quid autem de iis Regnis dicemus, quæ per successionem deferri dicuntur? Nihilò sanè secius res se habet. Regnum Francicum, quod cæteris non ita pridem legū & ordinū præstantia anteponebatur, ita olim constitutum fuit. Etsi verò qui eum locum tenent, suo officio minus satisfaciunt; non eò tamen minus tenentur. Habet quidē Rex suum magnum magistrū, seu Archiœconomum, suos cubicularios, venatores, scutarios, pincernas & cæteros, quorum officia olim à Rege ad eò pendebant, vt eo vita functo, suo ipsi officio planè defuncti viderentur. Vnde etiam nū post finem luctus Regij, magnus Magister seu Archiœconomus, quædam quasi concepta verba pronunciare solet, quibus familiam Regiam dimittit, ac sibi quemque prospicere iubet. At nihilominus suos ha

*Aimonius
lib. 5. c. 26.
in Carolo
Caluo.*

bet Regnum Francicū officarios, Maiores Palatij, qui postea Comes stabuli nominatus fuit, Marefchallos, Amiralium, Cancellariū seu magnum Referendariū, Secretarios, Quæstores & cæteros: qui quidem olim non nisi in cōcilio publico trium ordinū Cleri, Nobilitatis & populi creabantur. ex quo verò Parlamentū Lutetianum statarium factum est, non prius in eo gradu constituti censentur, quam à Senatu Lutetiano recepti & comprobati sint, & neque etiam absque eiusdem consensu & authoritate destitui possunt. Isti verò omnes, primū Regno, id est, vniuerso populo, deinde Regi, tamquam eius curatori fidem dant. quod vel ex ipsa iurisiurandi formula perspicuum est. Comes stabuli verò in primis, quando Ense liliato per Regem accingitur, (vt ex verbis, quæ Rex ipse pronunciat, apparet) eo accingitur, vt Rempub. tueatur atque defendat. Habet præterea Regnum Francicum suos sive Pares, tamquam Regis cōsortes, sive Patricios, tamquam Reipubl. Patres, singulos à singulis Regni Provinciis denominatos, quibus Rex inaugurandus, tamquam vniuerso Regno, fidem dare solet. Ex quo, illos Rege superiores esse, li-

se, li-

*§ filius fā.
Instit. qui-
bus mod. ius
patriæ pot.
soluitur.*

se, liquet. Hi verò vicissim iurant, se non Regem, sed Regium diadema ruituros, Rempubl. consilio adiuturos; sacro Principis cōsilio in eam rem, pacis bellive tēpore, affuturos, vt ex formula Patriciatus liquidò patet. Itaque non secus ac Pares Curiae Longobardico iure, in sententiis ferendis, feudi domino non modò assidebāt, verū etiam inter ipsum sæpe superioris feudi dominum & vasallum cognoscebāt. Videmus etiā hosce Franciæ Patricios, inter Regē & subditos sæpe diiudicasse; adeo quidē, vt cum Carolus VI. in Ducē Britanniae sententiam ferre vellet, obstant illi, dicerētque, nō Regis, sed Pariū esse eiusmodi iudicium, quorum auctoritati nil derogare posset. Hinc etiam hodie Senatus Luterianus, qui curia parium seu Patriciorū nuncupatur, quasi Iudex inter Regem & populum quadamtenus cōstitutus, imò inter Regem & priuatū quemlibet, singulos aduersus Regis procuratorem asserere, si quid cōtra ius invadat, quasi obligatione tenetur. Præterea si quid Rex domi statuatur edicātve, si quid cū vicinis Principibus paciscatur, si quod bellū gerendū est, si quæ pax, vt nuper cū Carolo V. facienda, authorem senatum fieri o-

*Renat.
Choppin
lib. 3.*

portet, & in eius acta omnia, quæ ad Rempublicam pertinent, referri. Quæ quidem non prius rata sunt, quam ab eo comprobata fuerint. Ne verò Regem metuerent Senatores, neque olim in eum gradum, nisi à Senatu nominati cooprabantur, neque absque eiusdem auctoritate, legitima de causa exactorari poterant. Denique & literæ Regis, ni à Secretario Regni subsciebantur, & rescripta ni à Cancellario (qui cancellandi potestatem habet) obsignentur, nullam auctoritatem habent. Sunt & Duces, Marchiones, Comites, Vicecomites, Barones, Castellani, item in Urbibus Maiores, Vicarii, Consules, Sindici, Scabini, & cæteri, quibus aliqua sigillatim aut Regio, aut urbs cõmendata est, ut populum tueantur, quatenus eorum iurisdicção patet, etsi quædam ex illis dignitatibus hereditariæ hoc tempore habentur. Et hæc quidem ordinariè. At præter hæc, quotannis olim, post verò aliquantò, quotiescunque saltem necessitas postulabat, habebatur trium ordinum conventus, quo regiones urbesq; omnes alicuius nominis suos Legatos mittebant, & quidem Plebei, nobiles, Ecclesiastici in vnaquaque sigillatim, ubi de his, quæ ad Rempubl.

Asmoius.

perti-

pertinebant, publicè statuebatur. Eius vero conventus ea fuit perpetuò authoritates, vt non modo, quæ ibi statuta forent, sacra sanctaq; haberentur, seu pax facienda, seu bellum gerendum, siue Regni Procuratio cuiquam deferenda, siue vestigal imperádum esset: verum etiam reges luxus, desidiæ, tyrannidíve causa in cœnobía detruderentur, eoq; authore, vniuersæ adeo stirpes regni successionē priuaretur, nō secus ac primum, Populo authore, ad regnum vocatæ fuerant. Nempe quos cōsensus extulerat, dissensus exturbabat: quos virtutum paternarum imitatio, in eam quasi hereditatem vocarat, degener & ingratus animus, vt incapaces & indignos fecerat, ita & exhæredes faciebat. Ex quo sanè liquet, successionem tolleratam quidem ad vitandū ambitum, secessionem, interregnum, & alia Electionis incommoda. At sane vbi grauiora damna cōsequebantur, vbi regnū Tyrannis, vbi regis solium Tyrannus invaderet: Populi legitimū conventum, & Tyrāni regisve ignaui expellendi, adve agnatos deducendi, & boni regis in eius locum adsciscendi, auctoritatem sibi perpetuo retinuisse. Nimirū habebant fortè hoc à Gallis Franci, autho

*Cæs. lib. 5.
& 7. de bel
Gallico.*

re Cæsare lib. V. de bello Gallico. Fateretur enim Ambiorix Rex Eburonum, ea fuisse tum regum Galliæ imperia, ut non minus Populus ritè convocatus, in regem, quam rex in Populū, authoritatis haberet. Quod etiam in Vercingetorige apparet, qui corā Populi cœtu causam suam agit. In regnis Hispaniæ, præsertim Aragonum, Valentino, Catalanico, ita etiam sese habet. Est enim penes Iustitiam Aragonicam, quam vocant, summa regni authoritas. Itaque non verentur magnates, qui populum repræsentant, regem his verbis tum in ipsa inauguratione, tum tertio quoque anno in conventu publico disertè compellare: **TANTVM** valemus nos, quantum vos: at super nos ambos est, (Iustitiam Aragonicam intelligūt) qui magis imperat, quam vos. Sæpe verò, quæ rex rogauit, Iustitia illa abrogat; quæ edixit, vetat. Tributum verò indicare nullum vsquam absque eius conventus authoritate ausit. In Anglico & Scotico penes Parlamentum, quotannis ferè haberi solitum, summa rerum est. Parlamentū verò vocant, Ordinum regni conventum, ubi Episcopi, Comites, Barones, Ciuitatū, Regionūve legati communi suffragio de republ. statuūt. Cuius vsq;
adeò

adeò sacrosancta est authoritas, vt, quæ semel sanxerit, regi abrogare sit nefas. Omnes verò regni officarij ab eo conventu fasces accipere solent, quique ordinariè regi reginæve in consilio assident. In summa: cætera regna Christiana, Hungaricū, Bohemicum, Danicum, Suedicum, & reliqua, suos regni officarios regiivè imperij consortes habent, quos sua authoritate aliquādo vfos esse, vel in regibus ipsis exauctorandis, aut historiæ docent, aut recens memoria satis ostendit. Nec verò est, quòd iccirco potentiam regiam minui putemus, regesve quasi capitis diminutionē passos. Deum certè non eo minus potentem censemus, quòd per se peccare non possit, neque eius imperium angustius, quòd ruere & pessum ire nequeat. Neque ergo regem, si, qui per se peccare posset, aliena ope sustinetur; si quod fortè imperiū sua negligentia culpave amisisset, aliena prudentia diutissimè retineat. An enim eo minus sanum aliquē putes, quòd Medici ei assideāt, qui ipsum ab intēperie dehortētur, qui noxiorū ciborū esu interdīcāt, qui etiā invitū sepe ac renitentē purgent? An verò medicos illos, qui illius salutem curant, an adultores, qui insalubria

quæque obtrudunt, magis amicos putes? Hæc itaque distinctio omnino adhibenda est. Alij sunt amici Regis, alij Cæsaris. Amici Cæsaris sunt, qui Cæsari inseruiūt, amici regis imperatorisve, qui Regno. Cum enim quis regni causa, rex dicatur, regnūque in Populo consistat, regno verò perduto, labefactatove, aut omnino rex esse desinat, aut minus saltem rex sit: qui sanè regni vtilitati student, regis verè amici sunt; qui regni vtilitatem negligunt aut evertunt, verè hostes. Ac vt neq; regnum à Populo, neque regē à regno; ita nec amicos regis à Populi regnīque amicis separare vlllo modo possis. Imo verò cum, qui verè Cæsarem amant, regē eū, quàm priuatū malint: regem verò absque regno habere non possint: iidem sanè regni, qui & Cæsaris amici erunt, qui verò Cæsaris magis, quā regni, sive Populi amici videri volent, adulescentes verè & hostes perniciosissimi censendi erunt. Quod si verò illi verè amici sunt, an non regē eo potentiorē & stabiliore fore manifestū est, vt Theopompus Ephoris institutis dicebat, quo plures & potentiores erunt ij, quibus Populi regnīve vtilitas cōmēdata cōmissaq; fuerit? Dices verò fortasse; Tu mihi Patritios, opti-

optimates, regni officarios narras. Ego *An præscri-
ptio obstat.*
vero contrà, nil præter larvas, & antiqua,
tanquã in Tragœdiis, paludamenta video:
antiquę verò libertatis & authoritatis vix
vlla vsquã vestigia cerno. Denique, pleros-
que paſsim ſua curare, regibus aſſentari,
Populo illudere videas: vix vsquam, qui
Populi eviſcerati miſereatur, nedum qui
miſero opẽ ferat, invenire poſſis. Quod ſi
qui verò eo animo aut ſunt, aut eſſe putan-
tur, rebelles & perduelles iudicantur, ex-
ulant, ac tantum non victum quẽritare co-
guntur. Quid? ita res ſe habet. Tanta ferẽ
ſemper, & ubique locorum fuiſſe videtur
aut regum audacia, aut optimatũ partim
prævaricatio, partim ignavia, vt reges qui
dem eam, qua hodie plerique inſoleſcunt,
licentiam, quadam quaſi longi temporis
præſcriptione uſucepiſſe: Populi verò au-
thoritatem ſuam aut tacitẽ ceſſiſſe, aut nõ
vtendo amiſſiſſe videantur. Sic nempe
plærumque accidit, vt quod omnes cura-
re tenẽtur, curet nemo; quod omnibus cõ-
miſſum eſt, nemo ſibi commendatum pu-
tet. Nihilominus tamen adverſus Populũ
neque præſcriptio, neque prævaricatio iſta
quidquam facit. Vulgatum eſt, nullam fi-
ſco præſcriptionem nocere; multò verò

minus Populo vniuerso, qui rege potior est, cuiusque gratia Princeps id priuilegium habet. Curenim alioqui, cum fisci Princeps administrator tantum sit, Populus verò, ut inferius probabitur, verè proprietarius? Deinde: an non scitum est illud; libertati nulla, ne diutissima quidem seruitute, violentia præscribi posse? Quod si verò reges à populo constitutos fuisse, qui ante D. fortè annos viuebat, non ab eo, qui hodie extat, obiciias: at, inquam ego, etsi moriuntur reges, populus interim, ut neque vlla alia Vniuersitas, nunquam moritur. Ut enim perennem fluuium fluxus; ita & populum immortalem ortus & interitus vicissitudo facit. Itaque ut idem est, qui ante mille annos, Rhenus, Sequana, Tyberis; idem etiam est populus Germanicus, Gallicus, Romanus; (nisi fortè coloniæ intervenerint) nec autaque fluxu, aut indiuiduorum mutatione, ius eorum vllatenus immutari potuit. Præterea si non populo, sed patri regnum acceptum ferunt, hic verò auo, & ita deinceps; an plus iuris potuit ille ad alium transferre, quàm ipse habuerit? Quod si verò non potuit; (ut certè non potuit)

an

L. propone-
batur. 76.
D. de iudi-
ciis, l. qui
res suas. 98.
S. ult. de so-
lution. l. in-
ter stipul. 83
S. sacram.
D. de verb.
oblig.

Ulpian. de
reg. iuris, l.
54.

an non manifestum est, quicquid præter-
 ea sibi arrogarit, non magis eum, quàm
 prædonem quemlibet vlturpare posse?
 Populum verò contrà perpetuæ evictio-
 nis ius integrum habere? Ergo, quòd in
 aliquo regno Optimates aliquamdiu op-
 pressi fuerint, populo præiudicare non
 potest: quin potius, vt non audiretur ser-
 uus, qui, quòd dominum diutissime ca-
 ptium detinisset, non modò se li-
 berum iactaret, verùm etiam necis vi-
 tæque potestatem sibi in dominum ar-
 rogaret; neque prædo, qui quòd aut
 XXX. annos prædatus, aut prædonis
 filius esset, sese extra culpam esse puta-
 ret; imò verò, quò diutius, eò gra-
 uiùs puniretur: ita sanè minimè audien-
 dus princeps, ferendùsve fuerit, qui,
 quòd Tyranno successit, populùmve,
 à quo ipse regnum accepit, mancipij lo-
 co diu habuerit, aut optimatibus vim fe-
 cerit, quidquid libuerit, sibi licere, aut iu-
 re concedi putet. Neque enim demunt
 anni quidquam iuri populi, sed addunt
 iniuriæ Regis. Quid verò, si optimates
 ipsi cum principe collusere? quid, si pro-
 dita causa, Populum vinctum quasi, in

manus Tyranni prodidere? Istāne prævaricatione proditiōe authoritas Populi in Regem planè translata vidēbitur? An, inquā, eo facto quicquam aut libertari Populi demitur, aut Principis licentiæ adiungitur? Sibi ipsi imputēt, dices, qui eiusmodi hominū perfidā fidem elegerint. At enim sunt isti, tanquam Patroni, qui vtilitati publicæ, Populique salutis & libertati patrocinentur. Itaque non secus ac Patronus cum clientis adversario de quota litis, ut loquuntur, pactus, si clientis causam prodidisset, ei minimè noceret: nō potest sanè ista quasi Magnatum, in damnum necemque Populi inita conspiratio, quidquam eius iuri detrahare. Verum & illi in pœnam legis, quæ in prævaricatores lata est, incident, & his, ac si res omnino integra esset, & patronum aliū eligere, & ius suum denuo persequi, lex permittet. Et enim si Populus Romanus Imperatores suos noxæ dedit, qui ad Furcas Caudinas indecorè cum hostibus pepigerant, coacti licet, & in summas angustias redacti, nec ea se pactione ullatenus teneri iudicavit; an non multò minus tenebitur Populus id iugum pati, quod non vi, sed ultro, non mortis metu, sed lucris cupidine, aut si, qui

excu-

excutere debebant, imposuerint, aut qui poterant, tolerarint.

Iam verò cum à Populo reges constituti sint, iisque quidam quasi imperij consortes adiuncti, qui ipsos in officio continent, & singuli quidem rege inferiores, vniuersi verò superiores: sequitur, vt videamus, cur primū constituti fuerint, & quod sit ipsorum maxime officium. Iustum enim demum quid ac bonum cēsetur, cum eum finem attingit, ad quem institutum est. Primum sanè palam est, homines natura liberos, seruitutis impatientes, & ad imperandum magis, quàm ad parendum natos, nō nisi magnæ cuiusdam vtilitatis causa imperium alienum vltro elegisse, & suæ quasi naturæ legi, vt alienam ferrent, renunciaſſe. Neq; enim, ait Æſopus, equus liberè antea vagari solitus, frenum sessorémve vnquam, nisi Tauri vincēdi spe, admisisset. Non itaque existimemus, electos fuisse reges, vt bona multorū sudore parata, in proprios vsus converterent: quisque enim sua amat, suāque sequitur. neque, vt publica potentia ad suam libidinem abuterentur: quisque enim ferè potentiores aut odio, aut invidia prosequi solet. At sanè, vt tum singulos à mutuis, tum vniuer-

Quis sit Regum iuris.

*August lib.
19. de Civi.
Dei, c. 15.*

fos ab externis iniuriis, seu iure dicundo, seu vim vi repellendo, defenderent. Propterea, inquit Augustinus, qui aliorum utilitati consulunt, imperare dicuntur, ut vir vxori, parentes filiis: ij verò, quibus consulitur, obedire. etsi qui ita imperant, iis verè inseruiunt, quibus imperare dicuntur. quia, ut ait idem, dominandi cupiditate non imperant, sed officio consulendi; nec principandi superbia, sed providendi misericordia. Seneca verò epistola XCI, Penes sapientes, ait, aureo seculo regnum erat. Hi continebant manus, & inferiores à validioribus tuebantur. Suadebant, dissuadebantque, & utilia atque inutilia monstrabant. Horum prudentia, ne quid deesset, suis providebat. Fortitudo arcebat pericula, beneficiis augebat ornabatque subiectos. Officium erat imperare, non regnum. Nemo quantum posset adversus eos, experiebatur, per quos caperet posse, &c. Imperare ergo nihil aliud est, quàm consulere: Imperij finis vnicus, populi utilitas. Imperatorum regumque officium vnum, ut populo consulant. Regia verò dignitas non est propriè honos, sed onus; non immunitas, sed munus

munus; non vacatio, sed vocatio; non licentia, sed publica seruitus; quæ ideò honore afficitur, quòd primis illis temporibus molestias illas, nisi honore quasi conditas, vix quisquam degustare voluisset. Ut nihil eo verius sit, quod ille dicere solebat: Si, quantis molestiis diadema regium involutum esset, omnes cognoscerent, qui vel in via repertum capiti imponere vellet, inventum iri neminem. Cùm igitur MEVM illud, & TVVM, orbem invasissent, ac de rerum dominio inter ciues, mox verò etiam de finibus inter finitimos bella exorirentur: populus ad vnum aliquem confugere cœpit, qui tum, ne tenuiores à diuitibus; tum, ne vniuersi à finitimis vim paterentur, iustè fortiterque provideret. Ut verò aut lites, aut bella magis ingruebant, is etiam eligebatur, cuius de fortitudine, aut de industria, magna erat omnium opinio. Itaque reges olim creati sunt, ut domus dicerent, foris verò exercitum ducerent: nec modò hostium excursiones, agrorum depopulationes, cæterasque corporis calamitates depellerent; verum multò magis flagitia, scelera, vitia arcerent à republica, aut coercerent: quorum

alterum bello, alterum iure perficitur. Id verò ex omnibus tum sacris, tum prophanis Scriptoribus planū esse potest. Populus Dei primū Regem alium non habebat, quā deum. Quia enim in medio Populi versabatur, & respōsa inter Cherubim in grauioribus causis edebat, & duces belli extra ordinem iudicēsque designabat: vicariis opus esse apud eos nō videbatur, qui summi regis, præsētia perpetuò fruerentur. Ethnicī verò, qui tantis beneficiis carebant, in eum finem reges instituerūt. Itaque cum Populus Dei, iniustitiæ filiorum Samuelis pertæsus, & senectuti Samuelis minus confidens, regem exemplo cæterarum Gentium, id est Ethnicorum, postulat: Da nobis, inquit, regem, qui nos iudicet, qualem cæteræ gentes habent. vbi primum & præcipuum regis munus attingit. Paulo verò pōst, vtrumque. Quin imo habebimus, ait, Regem super nos, vt cæteræ Gentes. Rex noster nos iudicabit, & exhibit ante nos, & acies nostras instruet. At illud semper primo loco, quia ordinarium & perpetuum est: hoc non nisi extra ordinem, &, vt loquuntur, in casu. Hinc Aristoteles, temporibus Heroicis, reges omnes, iudices & duces belli fuisse, ait.

1. Sam. c. 8.

v. 5. & 20.

ait. Lacedæmoniorum verò reges, suo etiã tempore in exercitu tantum (nec tamen sine scytala, id est mandato Ephororũ) absolute imperasse. Similiter cum Mediper effrænem licentiam mutuis sese iniuriis perpetuò vexarent, Deiocem tandẽ, cuius in arbitrationibus spectata fuerat iustitia, primũ Iudicem, mox & Regem elegerunt, satellitẽsque ipsi, quo facilius potentiores quosque reprimere posset, attribuerunt. Cicero verò omnes olim Reges fruendæ iustitiæ causa cõstitutos fuisse, ait, eandẽmq; omnino Regum constituendorum, quæ Legũ, rationem fuisse, quò nempe ius omnibus æquabile foret. Quæ vel ex ipsa vocum vi, in omnibus ferè linguis, manifesta esse possunt. Reges, à regẽdo. regebant enim fines rùm publicos, tũ priuatos. Imperatores, duces exercitus, Principes, qui primi in acie; vnde principia apud Liuium. Græcis βασιλῆς, columna populi, ἀρχαὶ, Principes, ἡγεμόνες duces exercitus. Hebræis, Iudices, qui & Reges aliquoties in libro Iudicum. Germanis Kõnigen/ Reges, siue à fortitudine, siue à prudentia: Hertzogen/ Duces, qui acies educunt; Comites, Grauen/ quos ex antiquis Alemanorum legibus Iudices

Arist. in Politic. II. lib. 3. lib.

Herod. lib.

Home.lib.1
Iliad.

Ouid.lib.6.
Metam.

ces fuisse constat. In summa: cùm Ho-
merus vocat reges *Διπασπέλας*, aut de-
scribit Agamemnonem, *Αμφότερον βασιλέα
τ' ἄγαθον, κρατερὸν τ' αἰχμητὴν*: & Ovidius Erich-
teum,

Iustitiâ dubium, validisne potentior armis;

exactissimè duobus verbis, regum o-
mnium principumque officium definiis-
se videntur. Hæc de Ethnicorum regi-
bus, quorum quidem exemplo Iudæi
reges & petiuerunt, & constituerunt.
Itaque Regina Saba Salomoni dicit, i-
psam à Deo constitutum esse, ut iudi-
cium & iustitiam faciat. Ipse verò; Tu me
Domine elegisti in Regem populi tui, &
iudicem filiorum filiarumque tuarum.
Propterea boni reges, quales David, Io-
saphat, & cæteri, quia omnibus ius ipsi
dicere non potuissent, (etsi in grauiori-
bus causis, ut è Samuele apparet, supre-
mum sibi iudicium recipiebant) nil prius,
neque antiquius habuerunt, quàm ut iudi-
ces bonos, & peritos ubique locorum cō-
stituerēt, remque iudiciariam sollicitè cu-
rarēt, seque gladio magis ad ciues impios
coërcēdos, quàm ad hostes arcēdos, accin-
ctos esse putauerunt. In summa: Princeps,
ait Apostolus, est minister Dei, in bonum
&

2 Chro. c. 9
ver. 8.

Sapient. 9.
ver. 7.

2. Sam. c. 15.
ver. 2.

1. Chro. 23.
v 4. & c. 26
ver. 29.

2. Chron. c.
19. ver. 1.
Rom, 13.

& commodum subditorum institutus, gladioq; tuendis bonis adversus improbos accinctus; cui in eam rem incumbens honor debetur. Cum itaque reges in commodum subditorum à Deo instituti, & à Populo constituti sint, commodum verò illud duabus maximè in rebus cernatur; iustitia inter ciues, fortitudine adversus hostes: eum sanè principem, qui suæ tantum utilitati, libidinè inferuit, qui iura omnia negligit & pervertit, qui in Populum quovis hoste sævior & truculentior est, Tyrannum propriè dici posse: quæ verò ita administrantur imperia, utcumque lata sint, non nisi magna latrocinia esse, consequitur.

Hic nobis ulterius paulò progrediendum est: an etenim Rex, quia iuri dicundo præest, ex arbitrio suo ius dicit? Réxne, inquam, à lege, an Lex à rege pendebit? Philonidas: οὐ γὰρ ἔστιν ἀλλὰ ὁ δειδωμένος νόμος, πρὸς τοὺς πολέμους δὲ γὰρ αὐτοῦ καὶ κρίσις. ὑπὸ δὲ δικαίου γὰρ ὑπάρχει καλόν. Respóderet Paulsanias Spartanus vnico verbo: Legibus in homines, non hominibus in Leges auctoritatem convenire. Quin & Agesilaus ipse Spartæ rex, Imperatorem Legum imperata facere oportere affirmat.

August. lib.
4. c. 4. & 6
de Civit.
Dei.
Vtrum præ-
stet Rex
Legi.

*Cicer. lib. 2.
Off.*

Verum est, quod rem ipsam altiusculè re-
petamus. Certè cum Populus ius æquabi-
le quæreret, id si ab vno iusto & bono vi-
ro consequeretur, eo contentus erat. At
quia vix id fieri poterat, & rarò continge-
bat: sæpè verò, dum arbitria Regum, legū
instar essent, eveniebat, ut alia aliis loque-
rentur: Leges tum, quæ cum omnibus
vna eadēque voce loquuntur, à pru-
dentioribus, & cæteris Magistratibus pro-
ximè inventæ fuerunt. Regibus verò
id præcipuè muneris commendatum, ut
legum custodes, ministri & conservatores
essent. Interdū etiam, quia lex in omnem
eventum prospicere non potuerat, quæ-
dam ex eadem æquitate naturali supple-
rent. Ne verò legi vim facerent, optima-
tes, de quibus antea, subinde regibus à Po-
pulo adiuncti fuerunt. Itaque est, quod
reges legi ipsi pareant, eamque tanquam
reginam agnoscant, & impotētiam illam
muliebrem magis, quàm potentiam, de-
qua Satyricus: Sic volo, si ciubeo, sit pre-
ratione volūtas, à se alienissimam esse de-
bere putent. Nec verò eò se minus impe-
rare sentiant, quod legi obsequatur. Cum
enim lex quoddam quasi organum sit, di-
vinitus datum, quo societates humanæ
regan-

Iuvenalis.

regan-

regantur optimè & ad beatum finem dirigantur; perinde ridiculi fuerint reges, qui legi obsequi turpe duxerint, ac Geometra foret, qui regula, gnomone, cæterisque organis, quæ à peritissimis quibusque ad agrimentionē adhiberi solent, vti absurdum & indecorum putaret: aut nau-
 ta, qui phantasia sua duce, temere errare & vagari, quàm ad versoriam, seu pixidem nauticā cursum navis rectè dirigere mal-
 let. Quis verò ambigat, quin legi, quàm regi parère, id est homini, vtilius & honestius sit? Lex est boni regis anima: per hanc mouetur, sentit, viuit. Rex Legis organū,
 & quasi corpus, p quod illa suas vires ex-
 erit, sua munera obit, sua sensa eloquitur. Animæ verò, quàm corpori, parère, iustius est. Lex est multorum prudētum in vnum collecta ratio & sapientia. Plures autem
 oculatiores & perspicaciores sunt, quàm vnus. Tutius itaque est Legem, quàm ho-
 minem, quantumvis perspicacem, ducem sequi. Lex est ratio siue mēs, ab omni per-
 turbatione vacua, non ira, non cupiditate,
 non odio, non studio mouetur, non preci-
 bus, non minis flectitur. Homo contrā,
 quantumvis rationis particeps sit, ira, vin-
 dicta, alióve subinde appetitu vincitur, ra-

piturque. & ita variis affectibus perturbatur, ut sui ipse compos non sit: nempe quia ex appetitu & ratione constat, quin hic interdum vincat, fieri nequit. Itaque Valentinianus, imperator bonus alioqui, quia duas vxores simul habere voluit, idē singulis lege permisit. Cambyfes Cyri filius, nuptias cum germana sorore, quia sororem deperibat, licitas esse voluit. Chabades Persarum rex, adulteriorum pœnā sustulit. Tales verò subinde leges expectemus oportet, si legem regi subiectam esse volumus. Denique lex est mens, vel potius mentiū congregata multitudo: mens verò diuinę aurę particula, ut qui legi pareretur, deo parere, deumque arbitrum quodammodo facere videatur. Contrà verò quia homo ex mente diuina, & anima illa belluina constans, sibi sæpe non constat, sæpe dementat & insanit; cū verò ita afficitur, non iam homo, sed bellua est: qui Regi parere mauult, quàm Legi, belluæ, quàm dei imperium malle videretur. Itaque, ait Aristoteles, Alexandri licet præceptor, Diuinitatem cum nulla re aptius, quàm cum antiqua lege Societatis humanæ bene constitutæ conferre queas. Eam qui Reipub. præficit, Deum præficit: qui homi-

*Aristot. lib.
de Mundo,
& lib. 3. Po-
lit. c. 7.*

hominem, verè belluam. Quò etiam
 Prophetæ alludere videntur, qui imma-
 nia illa, imperia, belluarum rapacium
 nomine passim depingunt. An non ve-
 rò planè bellua erit, qui cæcum, quàm
 oculatum; amentem, quàm mentis com-
 potem; belluam, quàm Deum, ducem
 sequi malit? Inde verò factum est, inquit
 idem, vt cum primis temporibus reges
 absolutè imperarent, quorum arbitrium
 legerat, paulo pòst inter politiores & ci-
 uiliores passim legitimi fierent, id est,
 Legibus seruandis custodiendisque ob-
 ligarentur: absoluta verò illa potestas,
 penes Barbarorum reges tantum ma-
 neret. Et eam quidem tyrannidi proxi-
 mam idem ille vocat, tyrannidè que
 absolutè vocasset, nì à belluis illis spon-
 tè recepta fuisset. At non est forè re-
 gium, dices, voluntatem legibus alliga-
 tam habere. Imò, inquam, nil magis re-
 gium, quàm legum vinculis coërcere libi-
 dinem. Miserum est, non facere omnia,
 quæ velis: miserius verè, velle, quod non
 licet: miserrimum, posse facere, quod
 ita velis. Videor mihi audire Durionium
 Tribunum plebis, aduersus legem Sum-
 ptuariam his verbis intercedentem: Frèni

sunt iniecti vobis, Quirites, alligati & constricti estis durissimo seruitutis vinculo. Periiit libertas. Lex data est vobis, quæ vos frugi esse iubet. Quid verò opus est libertate, si volentibus luxu perire, nō licet? Idem ferè hodie reges plærique regumque adulatores: Periiit regia dignitas, nisi regnū nobis perdere liceat. Perierunt reges, si leges conseruantur. Miserum fortè est viuere, ni quotiescunque infania vexaris, tibi manus conscire conceditur. Quid enim, quæso, aliud faciunt reges, qui legibus vim faciunt, sine quibus nulla vnquam non modò imperia, verum etiam latrocinia consistere potuerunt? Valeant ergo Aulicorum assentatorum impia nugamenta, qui reges numina, regum respōsa oracula vocant; nec verò verentur regibus suadere, nil per se iustum esse, sed ut rex ita vel secus iusserit, iustum iniustumve fieri; quasi deus ipse sit, qui peccare nullo modo possit. Certè iustū est, quicquid Deus vult, eò tantum, quia vult. At quidquid rex vult, iustū prius esse debet, quàm ipse velit. Neque enim quid iustum est, quia rex sanxit: sed iustus est rex, qui quæ per se iusta sunt, sancta esse iubet. Itaque non dicemus, quod Anaxarchus Alexandro

*Cice. lib. 2.
off.*

dro, de Clyti, quem interfecerat, nece vehementer anxio: Them in atque Iustitiam absidere regi, non secus ac Ioui, quæ quicquid ei cordi fuerit, confestim sanciant. Quin potius regnis præsidere, quæ, si reges legum maiestatem violent, lædantve, pœnas ab illis grauissimas reposcat. Non, quod Thrasymachus ille Chalcedonius, Principum vtilitate & libidine ius omne definiri: quin imò Principum vtilitatem iure terminari, libidinē legibus coerceri. Non, quod mater Antonino Caracallæ, quod libet, licere: verum, quod per leges licet, collibescere debere. Non denique, quod ipse Caracalla, Imperatores leges dare, non accipere. Quin potius in omnibus regnis bene constitutis, regem à populo leges, quas tueatur, quasque intueatur, accipere. quod si quid cōtra eas, in earum fraudem faciat, iniustum iudicari. Hæc exemplis demonstrari possunt. Antequam rex esset in Israele, Deus illi Legē per Mosē præscripserat, tum Sacram, tū Ciuilem, quam perpetuò ante oculos haberet. Vbi verò Saul electus est & à populo constitutus, Samuel eam ipsi descriptā tradit, quam diligenter custodiat. nec prius cæteri reges, quàm in ipsius verba

Reges à Populo leges accipiunt.

Deut. 17.

1. Sam. c. 10
ver. 25. &
passim.

1. Chro. c. 11.
ver. 3.

2. Reg. c. 11.
ver 17.

& 12

Xenoph. li.

8. Pædias.

Xenoph. de
Reb. Laced.

iurati, recipiuntur. Ritus verò erat hic, ut
vnà cum diademate testimonium (quod
Legem Dei doctissimi quique interpre-
tantur) regum capiti imponeretur. Cyrus,
si quis leges patrias rumpere tentet, tanquàm
legum custos, legibus auxiliũ promittit,
seque, cum inauguratur, iisdem colendis
obnoxium facit, utcumque Cambyſi, filio
Cyri, adulatores quidvis licere obſtrepe-
rent. Reges Spartæ, quos legitimos vocat
Aristoteles, iureiurando singulis menſi-
bus renouari solito, Ephoris regni nomi-
ne ſtipulantibus, ſe iuxta Leges patriæ à
Lycurgo latas, regnatos iurabant. Hinc
Archidamus, Zeuxidami filius, rogatus,
quinam eſſent Spartanę ciuitatis præfecti?
Leges, ait, & legitimi magistratus. Ne ve-
rò leges contemptui eſſent, diuinitus in-
ſpiratas, vel potiùs à deo ipſo cęlitus ac-
ceptas iactabant, quò non ab hominibus
homines, ſed à Deo Opt. Maximo ſe iudi-
cari putarent. Ægyptiorum reges omnia
agebant iuxta Legum decreta, ſeque legi-
bus parendo beatos fore profitebantur.
Romulus Romanum regnum inſtituens,
cum Senatu ita paciſcitur, ut Populus Le-
ges ferat, ipſe ne rumpantur, provideat,
legumque custos habeatur, Antiochus

Dionys. Ha-
lic. lib. 1.

III. Asiæ rex, omnibus regni sui vrbibus scripsit: Si quid in literis, quæ eius nomine scriberetur, legibus repugnaret, crederet, se ignaro scriptas fuisse, & propterea non parerent. Et si verò lureconsulti quidā dicunt, Cæsare Octavianū Senatus decreto solutū fuisse legibus; Theodosius tamen, & omnes iusti Imperatores sese legibus al ligatos esse professi sunt, ne, quod vi extortum fuerat, iuris locū haberet. Nimirū armis & potentia Cæsaris prostrata respublica, nil aliud poterat liberè dicere, nisi se libertatem amisisse. Quia verò Cæsarem, Tyrannum nominare non audebat, legibus solutum, quod idem erat, ac planè ex legem prædicabat. Idem verò us in omnibus orbis Christiani benè moratis imperiis perpetuò obtinuit. Neque enim Imperator, Rex Franciæ, reges Hispaniæ, Angliæ, Poloniæ, Hungariæ, & omnes omnino legitimi principes, Archidux Austriæ, Dux Brabantiae, Comes Flandriæ, Hollandiæ, & reliqui prius in principatū recipiuntur, quàm Electoribus, Palatinis, Patriciis, Paribus, Optimatibus, Baronibus, se secundum leges patrias ius cuique suum reddituros, promiserint. Et hæc quidē adeo, ut provinciarū, imò ne

*Fulgos. lib.
c. 5. 6.*

vrbiũ singularũ quidẽ municipalia iura, in consultis provinciis municipiisve ipsis, vllatenus immutare possint. Sin fecerint, non minus crimen Maiestatis in leges committant, quàm populus in ipsos, si secundum leges imperantibus parere recuset. In summa: Principes legitimi, leges à Populo accipiunt, diadema verò, honoris; sceptrũ, potestatis insigne, vt & acceptas tueatur, & ex earum præcipuè tutela gloriam sibi quærant.

*An Princeps
nouas leges
ferre possit.*

Quid ergo est? An non licebit principi nouas leges ferre, veteresve abrogare? Sanè, quia regis est, advertere non modò, ne quid contra, inue fraudem legũ fiat, verũ etiam, ne quid in ipsis defit, aut redvndet, ne vetustate obsolescant, ne obliuione sepeliantur: si quid abrogandũ, surrogandũ, derogandũ putabit, populũ, populivè Optimates aut Ordinarios, aut extra ordinẽ convocatos admonebit, legemque rogabit. At sanè non prius iubebit, quàm ab iisdem ritè expensa comprobataque fuerit. Vbi verò iusserit, nõ est amplius pœnitentiæ locus, eidem omnino parere tenetur. Quia enim plus exempla, quàm verba mouent; quam tulerit, ipse ferat oportet, cum frustra sanè & iniquè quodammodo

Prin-

Princeps à subditis postulare videatur, ut leges curent, qui quas custodire tenentur, ipse negligit. Neque enim reges à subditis impunitate, sed equitate & iustitia differre cōvenit. Propterea Augustus, etsi decreto Senatus legibus solutus dicebatur; cum adolescentem repræhenderet, quod in legem Iuliam de adulteriis peccaret; ac ille eandem ab Augusto, qui legē tulisset, violari obiiceret, erratū agnouit, ac præ mœrore cibo abstinuit. Adeo nil magis naturę convenit, quàm ut, quod verbo doces, exemplo ipse doceas. Solebat legislator Solon leges conferre cum numismatis, quia illę societatem hominum, ut hæc cōmercium conseruant. nec ineptè. Quod si verò semel probata mutare, aut extenuare reges iure non possunt, absque Reip. consensu; an non multo minus leges fingere, & refigere, sine quibus neque reges, neque homines vsquam esse possunt, sed ferarū instar, aut per sylvas vagantur, aut in antris delitescunt? Itaque in imperio Germanico, si quam legem necessariam esse putet Imperator, rogat primū in Comitiiis. Si probatur: Principes, Barones, Ciuitatum legati subsignant, ac demū lex rata esse solet. Iurat verò, se & leges

*Demoslh. in
Orat. cōtra
Timocratē.*

*Innoc. 3. ad
Regē Tar-
rac. in c.
quando.
de iure iu-
rando.*

Renouata
anno 1454.
1538.

latas seruaturum, & nouas non nisi de comuni consensu, vllas laturū. In regno Polonico lex est, ne vllæ nouæ constitutiones fiant, præterquam de publico consensu, aut alibi, quàm in Comitiiis. In Franco, vbi tamen amplissima vulgò censetur regum authoritas, ferebantur olim Leges in trium Ordinum conventu, regiòve consilio ambulatorio. Ex quo verò Parlamentum statarium est, frustra sunt omnia regum edicta, ni Senatus ille comprobet, cū tamen Senatus seu Parlamenti Aresta, si lex desit, legis vim passim obtineant. Et in Anglico, Hispanico, Hungarico, & cæteris idem iuris est, vt & in antiquis quoque fuit. Etenim si à legum conseruatione regna pendent; leges verò ipsæ ab homuncionis libidine: an non certissimum est, nullius vnquam imperij statum stabilem futurum? An non, si, quod quibusdam accidit, aut continenter, aut per intervalla mente titubet; regnum etiam titubare, breuique ruere necesse erit? Quòd si verò, vt ostendimus, leges regibus potiores sunt, si reges legibus, vt serui dominis, parère tenentur; quis non legi, quàm regi parère malit? quis regi legem violanti obsequatur?

tur? quis violatæ auxilium ferre recuset?

Iam cum Princeps legum dominus minimè sit; in aliis quatenus dominus cenferi debeat, videndum est. Adulatorum aulicorum axioma percelebre est, Principes in subditos eam, quam domini olim in seruos potestatem, vitæ, inquam, & necis habere. Adeo verò istis nugis principibus imposuerunt, vt plærique, etsi ea sæuitiâ non vtantur, non eo minus tamen sibi licere putent, sed de suo iure quodammodo cedere videantur. Dicimus verò nos contrà, Principē tamquā legis ministrum & executorem, in eos tantum, quos Lex iusserit, gladiū stringere posse. Sin fecerit, non regem amplius, sed tyrannum; non iudicem, sed prædonem; non legis custodem, sed violatorem esse. Hîc considerandum est, in primis certissimum totius huiusce disputationis fundamentum, quo reges vtilitatis publicæ causâ constitutos fuisse statuimus. Eo enim posito tota lis finita est. Quid enim? An regem quæsisse homines verisimile est, qui, quotiescumque collibitum esset, quos veller, temerè necare posset? qui, vt ira vindictæ corripere, obvios quosque ad mortē raperet? qui in

*An Princeps
vitæ necisq;
potestatem
in subditos
habeat.*

linguæ

linguæ acie, vt inquit Sapiens, mortem circumferret? Minimè omnium. Nemo est, qui salutem suâ ab alieno arbitrio vltro pendere velit. vix quisquâ amico, vix fratri vitam suam concedere aufit. Multò minus itaq; extraneo, quamvis præstantissimo, cum Athamas in filios, Ajax in amicos, æmulatione, odio, furore correptus interdum desæuiat. Sin verò quilibet, vt vitam suam diligit, ita maximè cōseruatam cupit; quam, quæso, securitatem putes, si mucro tenui de filo suspensus, ceruici tuæ perpetuò immineat? quas dapes non fastidias, si iste metus adsit? Quod verò tenuius filum deligere queas, quàm si homuncioni in dies, in horas, in momenta mutari solito, millies quotidie frænum rationis, vt variis perturbationibus rapitur, excutienti, vitam, salutemque tuam commiseris? Quæ, quæso, spes hunc metum, quæ vtilitas hoc damnū periculūque compensare vllo pacto queat? In nocentes ergo tantū, quos Legis vox damnarit, gladium stringere possunt. An nō verò fortè, quia vitæ causa fauorabilior est, quos lex damnarit, absoluerè saltē rex poterit? Nihilo sanè magis. Quid enim? Grassatores, prædones, sicarios, raptores, vene-

veneficos, magos fortè, & alias humani generis pestes, quod tyrannos passim fecisse legimus, & facere etiam nū videmus, præpostera ista clementia foueret. Itaque quod vnum lex violata perfugium habet, Asylū sceleratorum omniū foret. Qui vindicando sceleri gladium à Lege accepit, scelus ipsum adversus legē armaret: lupos denique in ouile accerferet, qui arcessere deberet. At certè, quia interdum ea accidere possunt, in quibus lex muta, lege loquente, legis ratio, regis oratione, quasi interprete, opus habet, cū quis nempe in legis verba magis, quàm in ipsius sententiam incidit, licebit regi, ne summum ius summa iniuria fiat, adhibita in consilium ratione, quæ legis anima ipsa est, Legem interpretari: nimirum, quia, quod ex Legis sententia est, ex lege ipsa esse iudicatur. Ne tamē perturbatio vlla sedē rationis occupet, inconsultis Sapientibus, quod Alexandrum Seuerum imperatorem Romanum solitum facere legimus, nil planè definiendum putabit. Hoc modo homicidam quidem seuerè puniet: ei tamen indulgebis, qui excussa è manibus securi, transeuntem fortè aliquē occiderit. Grassatorem morte mulctabit: qui grassatorē,

*L. nominis
et rei. §. ver-
bum ex le-
ge. D. de
ver. signif.*

vim vi repellendo, interfecerit, absoluet. In cæteris denique casum à dolo, bonam fidem à stricto iure, quodā quasi boni viri arbitrio distinguet: dolo, aut malæ fidei nunquam patrociniabitur. Nec verò propterea minus poterit clementis nomen assequi. Clementior certè est pastor, qui lupum necat, quàm qui seruat: rex, qui fontem carnifici tradit, quàm qui eripit. Si necas, vnus nece innocentes multos morti eripis: sin parcis, quia & istum sua impunitate, & alios paris impunitatis spe ad quodvis scelus patrandum audaciores facis, innocuos postea innumeros illorum manibus interficis. nempe quosdam necare, clementia est; quosdam seruare, crudelitas. Itaque vt regi, tanquam custodi Legis, verba interpretari interdum licet; ita & Senatui, in omnibus regnis bene constitutis, iniunctum est, & ex officio convenit, tum interpretationem regis examinare, tum etiam eiusdem seueritati clementiæve modum adhibere. Quòd si verò hominum corruptela factum est, vt hæc minus re ipsa obseruentur; idem tamen perpetuò ius est, quod in libertatem vindicari oportet. Ne plura exempla in re tā manifesta accumulemus, in Francico regno

regno ita obseruatum fuit. Quos enim rex absoluerat, capite plecti; quos occisos voluerat, absolui sepe vidimus. Interdum etiam scelera, teste rege commissa, impunita fuerunt: quia plures testes non succurrebant. quod sub Henrico II. in cuiusdam extranei, grauissimi criminis à rege ipso accusati, persona accidit. Cum quis verò reus amicorum precibus venià à rege impetrauit, Cancellarius, causa cognita, recusare potest. Sin & hîc conuiet, ad iudices nihilominus veniat oportet. qui quidem nō modò, an obreptitia venia sit, sed etiā an ciuilis & legitima, diligenter examinare debet. Reus verò, qui codicillos illos veniales impetrauit, nō prius iis uti & niti potest, quàm sese coram iudicibus stiterit, capite aperto, genibus flexis, carcèresque vltro subierit, interim dum causæ, quæ regem impulerunt, pensitantur. Hæ si minus idoneæ sunt, mulctatur reus, perinde ac si rex non condonarit. Si contrà; est sanè, quòd non regi, sed legi eiúsque æquitati, vitam acceptā ferat. Hæc partim, ne reges aut priuata odia, publica potentia freti, exercean, aut publicas iniurias authoritate propria remittant; partim etiam, ne subditi reges aduersus leges

exorari posse putent, rectissimè instituta fuerunt. Quæ si hoc sæculo malè obseruatur; manet tamè id perpetuò rarum, quod dicimus, Leges in regni incolas, vitæ necisque potestatem habere, non reges, qui legum tantum ministri & custodes sunt.

*Subditi
sunt regis
fratres, non
serui.*

Enimverò subditi regis serui, ut vulgo dicitur, minimè sunt. neque enim aut bello capti sunt, aut precio empti. Quin potius, ut vniuersi domini, quod antea probauimus, ita singuli fratrum, seu agnatorum & consanguineorum loco censendi sunt.

Deu. 17.

Ne quis miretur: hæc est vox Dei, legē regibus præscribētis: Ne cor suum super fratres suos extollant, equorum medio delecti sunt. è qua Bartolus ipse, licet in sæculo tyrannorum feracinarus, non veretur elicere, subditos non esse regis seruos, sed fratres, & fratrum loco & conditione etiā habendos. Itaque Dauidem subditos eo nomine compellare non pudet. Prisci

*1 Chr. c. 28.
Bartol in
tract. de regim. Ciuit.*

verò reges vocabantur Abimelech, quod Hebraicè sonat Pater meus rex. Nimirum Deus opt. maximus, cuius quotidie clementiam, rarò seueritatē, etsi iustissimam, semperque cum misericordia coniūctam experimur, Principes vicarios suos docere voluit, non metu, sed amore subditos re-

tinen-

tinendos esse. Nec verò nobis ipsi succenseant, quasi eo pacto quid regiae dominationi detrahatur. Verè eò amplior est, quò diuturnior. Malus verò, inquit ille; diuturnitatis custos metus, cùm oderint, quem metuant; &, quem quisque odit, periisse expetatur. At contrà; cùm ad opes tuendas nil aptius sit, quàm diligi; benevolentia vel ad perpetuitatem fidelis est. Itaque qui subditos fratrum loco habet, in mediis periculis tutus videatur; qui seruorū, in eo metu versetur necesse est, in quo procul dubio dominus esset, qui in medio seruorū agmine, solus in aliqua sylua relinqueretur. Quot enim quis seruos, tot & hostes habet. quod omnes ferè tyranni, à subditis cæsi, experti sunt: cùm bonorum regū contrà subditi non minus de illorū, quàm de propria salute solliciti sint. Huc pertinet, quod passim apud Aristotelem legitur, & ab Agasicle rege Spartæ pronunciatum fuit, Reges imperare tanquam patres filiis; tyrannos tanquam dominos seruis. Quod ita accipiendum est, vt patriam potestatem non in atrocitate, sed in pietate, vt ait Martianus Iurisconsultus, consistere intelligamus. Quod enim sub glandibus obtinuit, vt patri filium manci-

*Cic. lib. 2.
Off.*

*Plato lib. 8.
de Repub.
Seneca.*

*Aliud est
seruire, aliud
obedi-
re: aliud li-
bertas, aliud
licetia.*

*L. 5. D. de
parricid.*

pare, & occidere impunè liceret, non modò inter Christianos locum non habet, sed inter Ethnicos bene moratos etiam erga seruos iampridem obsoleuit. Itaque & pater inauditum filium occidere nequit, quin in Corneliam de sicariis incidat: & lege Pompeia de parricidiis, non minus teneretur pater, qui filium, quàm filius, qui patrem occiderit; adeo vt Hadrianus imperator patrem, qui filium suum in venatione necauerat, quia nouerçã adulterare dicebatur, tanquam latronem, in insulam deportari iusserit. Ad seruos verò quod attinet, admonemur in Sacris literis, eos tanquam fratres tractare: in prophanis, saltem vt mercenarios quosque: iure verò ciuili tum Ægyptiorum, tum Romanorum, ex Antoninorum constitutione, non secus in eum, qui proprium seruum occiderit, pœna dicitur, quàm qui alienum. Quin & seruus, cui dominus ægrotanti non prospexerit, quémve esurire patiatur, liberatur eius potestate: & libertus, cui patronus atrocem iniuriam intulerit, potest actionem criminis ei intendere. Quòd si verò longè interest inter seruos & filios, inter dominos & patres, nec tamen

*l. 2. ad leg.
Corn. de si-
cariis. ubi
Vlt. leg. 1.
C. de parricid.*

*Ecclesiast. 33
Cic. lib. 3
Off.*

*Diod. Sic.
lib. 2, c. 2.*

*L. 1. D. de
his, qui sunt
sui, vel al.
iuris.*

olim

olim apud Ethnicos dominis in seruos
 fœuire licuit: quid, quæso, de eo patre
 dicemus, qui cum Atreo tragicè excla-
 mabit, Natis sepulchrum ipse est pa-
 rens; de eo principe, qui subditorum in-
 auditorum cæde adeò recreatur, vt ali-
 quot millia vno die interficiat, qui cruo-
 re nunquam satiatur, qui Caligulæ, qui
 propterea orbis Phaëton vocitabatur,
 exemplo, vnâ populo teruicem, quam
 vnico ictu amputare possit, subindè
 exoptat? An non aduersus hanc rabiem
 legis auxilium implorare, & eum gla-
 dium, quem legi custodiendæ, tuen-
 disque bonis acceptum, in bonorum
 necem, legisque contemptum strin-
 git, tamquam tyranno extorquere li-
 cebit?

Sequitur iam, vt videamus, si minùs *An omnia*
 vitæ, an bonorum saltem dominus di- *sint Regis?*
 ci possit? ac primùm in bonis cuiusque
 priuatis dispiciendum est. Nulla fere hodie
 in principum Comitatu vox crebrior
 est, quam eorum, qui regis omnia esse, di-
 cunt: Itaque quod ipse à subditis capiat,
 nō auferre, verùm quod nō auferat, vtē-
 dum donare; adeoque pervasit hæc opinio

quorundam principum mentes, ut miser
 ros subditos, non secus ac boues arato-
 rios, quicquid arant, quidquid terant, sibi
 arare terereq; dicere non vereantur. Et qui-
 dem ita ex facto sese habet, etsi ius plan-
 contrarium sit. Meminerimus hic perpe-
 ruo, Reges in utilitatem populi creatos
 esse, & qui populi commodis student, re-
 ges; qui suis, quod ait Aristoteles, tyranni
 nos verè censeri. Cum igitur sua quisque
 amet, plerique etiam aliena appetant, a-
 verisimile est homines aliquem quaesivisse
 se, cui omnia sua magno labore conqui-
 sta, ultro donarent; an potius, qui, ut su-
 cuique; diuiti æquè ac pauperi constarent
 operam daret; qui sibi cuncta attribueret
 an potius, qui sua cuique æquabili iur-
 tribueret; qui tanquam fucus inutilis, a-
 pù labores exhauriret; an potius, qui mel-
 la conseruaret; qui denique propria cu-
 iusque invaderet; an qui ne ab hostibus
 invaderentur, prospiceret? Quid, quæso
 mea refert, dicat Agricola, hostis, an re-
 mea mihi rapiat, si æquè fame pereo? pere-
 grinus, an ciuis horreum meum evertat
 cellam exhauriat, domum diruat, si æqu-
 esurio, cõtabesco, compluor? barbari mi-
 litis, an Romani manu cadam, si æquè, oc-
 cido

cido? Cur hostis, dicet ille, barbarus, si tu
 ciuis? Cur tyrannus ille, si tu rex? Imò ve-
 rò quò homicidio parricidiū grauius est,
 eò scelus regis scelere hostium in pari
 damno superat. Quòd si verò homines re-
 gem creando sua quique regibus non do-
 narunt, sed conseruanda commendarunt;
 quo tandem, nisi prædonum titulo, ea sibi
 vendicare queant? Propterea Pharaones
 Egyptiorum, rerum priuatarum cuiusq;
 pso iure domini non erant, sed tum demū
 uisse dicuntur, cum sua quique frumento *Genes. 45.*
 commutassent. Etsi de eius contractus vi
 disputari sanè & ambigi potest. Non po-
 terat etiam Achabus rex Israel Nabothum *1. Reg. 22.*
 cogere, vt vineam suam venderet; quin
 potius etiam si voluisset vendere, ex lege
 liuina non poterat. Imperatores Roma-
 ni, quorum immensa iactatur authoritas, *L. venditor.*
 nihilo plus iuris habuerunt. Hodie verò *13. D. decō.*
 nullum regnum est, in quo non liceat sin- *præd. diuid.*
 gulis, etiam vilissimis, aduersus regem a-
 pud Iudices ius suū persequi, ita vt sæpius
 ex, quàm priuatus causa cadat: vbi verò
 cecidit, legi parère æquè teneatur. Nec
 obstat, quòd quidam ex imperatorum fa-
 miliaribus scripsère, Iure ciuili omnia re- *Seneca lib.*
 is esse, Cæsaremque omnia habere. *de benef. 7.*
6. 4 5. 6.

enim suam ita sententiam interpretantur, ut ad reges vniuersorū imperiū pertineat, ad singulos proprietates, omniāque Cæsar imperio, singuli dominio possideant. Scitum verò est illud apud Iureconsultos, non si quis nauem aut domum in vniuersum vindicare potest, idcirco singulas tabulas, vel singulos lapides posse vindicare. Itaque regnum Germaniæ, Franciæ, Angliæ, rex asserere, vindicare, evincere iure poterit: neminem tamen probum, nisi cum manifesta iniuria, proprio lare excludet, quasi idem, qui vniuersorum, singulorum etiam possessor esse debeat, aut iure possit.

*l. nave. 36.
De evictionibus.*

*An Rex sit
regni proprietarius.*

An verò patrimonij regij, publici, in quā, dominij proprietarius dominus est? Hoc sanè caput paulo accuratiùs nobis tractandum est. Notandum hoc primum, aliud esse fisci, aliud principis patrimonium: alias, inquam, res imperatoris, regis, principis, alias Antonini, Henrici, Philippi. Res regis sunt, quas ipse, ut rex possidet: res Antonini, quas ut Antoninus. Et illas quidē à populo, has à parentibus accepit. Hæc distinctio in iure Ciuili crebra est, in quo aliud imperij, aliud Cæsaris patrimonium dicitur; alius fiscus

Cæsa

Cæſaris, aliud Reip. erariū; alius Cæſaris alius fiſci imperatorij procurator; alij Comites ſacrarum largitionū, alij rerum priuatarum: adeo vt, qui tanquam imperator præfertur priuato in hypotheca, tanquam Antoninus poſtponi interdū poſſit. Conſimiliter in imperio Germanico aliæ ſunt res Maximiliani Auſtriaci, aliæ Maximiliani Imperatoris; & alij imperij, alij ipſius quæſtores, vt etiā alio iure ſunt gentilitiæ principum ditiones, alio, quæ Electoratus dignitatibus annexæ ſunt. Quin & alij ſunt apud Turcas fundi ſeu horri patrimoniales Selimi, alij fundi fiſcales: & illi quidem in menſam principis, hi in ſuſtentationem Imperij tantum impenduntur. Sunt tamen regna, vt Francicum, Anglicum & cætera, in quibus priuatum patrimonium reges non habent, ſed publicum tantum, à populo acceptum: in quibus propterea ea diſtinctio nō adhibetur. Ac quantum ad res priuatas principis, ſi quæ ſunt, attinet; non dubium eſt, quin earum proprietarij ſint, nō ſecus ac ſinguli ciues, quiq; eas iure ciuili vèdere diſtraherèq; p arbitrio poſſint. At certè fiſci, regni, patrimonij regalis, quod domaniū vulgato vocabulo nūcupatur, proprietarij domini nulla

*Libene à Zee
none, C. de
quod. præ-
ſc. l. vnus de
quæſt.*

*Mag. lib. 12.
C. l. fi
ſcus. D. de
iure fiſci.*

L. cum ser-
uus. 39. §.
ult. D. de
leg. 1. l. uni-
uersi. 9. C.
l. seq. C. de
fundo pa-
trimon.

ratione censeri possunt. Quid enim? An quia te aliquis pastorem gregis causa fecit, gregē ipsum deglubendum, divendendum, agendum ferendumque pro libito tradidit? An quia te populus ducem iudicemve vrbis regionisve alicuius constituit, vrbis regionisve alienandę, vendūdę, perdendę potestatem fecit? Cum verò populi vnā cum regione fiat alienatio, an sui distrahendi, prostituendi, mancipandi cui volueris, idcirco tibi authoritatem dedit? Deinde, num regia dignitas possessio est, an potius functio? Si functio, quid cū proprietate commune habet? sin possessio; an non saltem eiusmodi, vt is, à quo traditur, populus sibi perpetuò proprietatem retineat? Denique, si patrimonium fisci, seu domanium, reipub. dos verè dicitur, & ea quidem dos, cuius distractione, dilapidatione & respub. ipsa, & regnum, & rex denique ipse perit; qua tandem lege dotem istam alienare licebit? Infatuetur ergo Vuencellaus Imperator, insaniat Carolus VI. Galliæ rex, regnūque, aut eius partem Anglis donet vendatve: prodigat Malcolmus Scotiæ rex regio fundos, regiāmque gazam exhauriat: quid sequetur? Qui regem adversus exterorum impe-

rus elegerunt, regis dementiâ serui exte-
 rorum fient: qui suis sigillatim opibus ea
 ratione cauere voluerunt, vniuersi prædæ
 exponentur: quæ sibi quisque, quæve pu-
 pillis, vt in Scotia, ademerit, vt remp. do-
 raret, leno aliquis abliguriet. Si verò,
 quod iam sæpius diximus, reges in vsum
 populi creati sunt; quis tandem vsus erit,
 si non modò vsus, sed etiam abusus con-
 cessus est? Cui bono tot mala, cui vtilitati
 tot damna, totque pericula? Si, inquam,
 dum libertati meæ incolumitatiue pro-
 spicere volo, memet ipse mancipio, memet
 ipse vnius libidini expono, memet in cõ-
 pedes numellâsque induo? Itaque hoc iu-
 ris vt natura insitū, ita & vsu apud omnes
 ferè gentes comprobatū videmus, vt rem-
 pub. regi suo arbitrato minuire nō liceat;
 isque, qui contrà faxit, non regem, sed ty-
 rannum agere censeatur. Certè cū reges
 crearētur, aliquas opes iis tribuere neces-
 se fuit, quibus tum regiū decus seruarent,
 tū verò maximè regia onera sustinerent. i-
 ta etenim & honestas & vtilitas poscere
 videbatur. Ad munus regium pertinebat,
 iudices vbique locorum constituere, qui
 munera non caperent, quique ius venale
 non prostituerent; præterea vim, quæ iu-

ri, si quando opus esset, opẽ ferret, præstò habere, tutas vias, tutum cõmercium præstare, &c. Sin bellũ merueretur, adversus hostes vrbes præsidio munire, vallóq; cingere, exercitũ alere, armamentaria instruire. Scitum verò est illud, neq; pacem absque bello, neque bellũ absque milite, neque militem absque stipendio, neque stipendium absque tributo consistere posse. Ad pacis itaque onera sustinenda, institutum fuit domanium; (qui apud Iureconsultos Canon vocitatur) ad belli, tributũ; ita tamen, vt si quid grauius ingrueret, extra ordinem indictio succurreret. Quorum quidẽ omnium finis est, vtilitas Reipubl. vt qui in priuatã ea convertat, regis nomine planè indignus sit. Est enim Princeps, *Rom. 13.* ait Paulus, Dei minister in bonum populi, eique vt in id incumbat, tributa & vectigalia persoluuntur. Et verè omnia ferè olim hanc originem habuisse videntur vectigalia Romanorum, vt tutẽ essent merces pretiosæ, ex India, Arabia, Æthiopia advehi solitẽ, adversus pyraticas incursiones, quarũ causa classis publicè instruebatur. quo *Plin. lib. 19.* in genere erat vectigal maris Rubri, Pedatica, Nauigia, Portoria & cætera, vt viæ publicæ, quæ propterea Prætorix, Cõsulares,

lares, regiæ vocabantur, tutę à latronibus, planæque & faciles præstarentur. quod etiam nū onus regio cognitori incūbit, vt Pontes publici restaurarentur, vt ex constitutione Ludouici Pij, duodecim super Sequanā, vt naues traiciendis fluminibus præstō essent, &c. Salinarū vectigalia nulla erāt, imò pleræq; in priuatorū dominio erant; quia quę natura vltro dabat, nō magis, quā lux, aura, profluens vēdi posse videbatur. Cūq; rex quidā Lycurgus nomine, in Asia minore, salinis vectigal imponere cœpisset, quasi natura suā liberalitatem restringi nō patiente, derepente exaruisse dicuntur. Et si verò hodie,

Si quid Palphurio, si credimus Armillato,

Quicquid cōspiciū pulchrūq; ex æquore toto est,

Res fisci est, vbicunque natat.

Qui primus

tamē hoc vectigal Romæ instituit, Liuius Censor, vnde Salinatoris cognomen adeptus est, ob necessitatem reip. presentissimā fecit. In Gallia verò Philippus Longus ob eandē causam, in quinquenniū tantum obtinuerat; cuius cōtinuatio quos motus pepererit, nemo nescit. Tributa denique in bellica stipendia instituta fuisse, vel ex eo apparet, quod stipendiariam & tributariam Provinciam facere, idē re ipsa sit. Sic Salomon tributa imperat muniendis

Archid. in Can. si quis Romipetas & peregr.

24. q. 3. Bal. in c. 1. §. cōuenticula. de pace in reur. fir.

l. 2. D. ne quid in loco publ. §. vicarum.

l. magis puto. D. de rebus eorum.

Iuuenalis,

1. Reg. 9. c.
 32. c.
 Postell. lib.
 3. de rep.
 Turc.

urbibus, & armamentario publico instruendo, quibus propterea, iis confectis, populus sub Roboam leuari cupit. Turcæ verò ipsi tributum provinciarum, Sacrum populi sanguinem appellant, quem profunderè, aut aliò, quàm ad populum defendendum, convertere, sit nefas. Itaque quæcunque rex bello acquirit vbivis gentium, quia communibus opibus acquirit, populo acquirit, non sibi, quasi servus institutor domino. Quin etiam si quid per matrimonium fortè adipiscitur, (quod, inquã, purè simpliciterque vxoris sit) regno acquiri putatur: quia præsumitur non eam ipsam vxorè ducere, quatenus Philippus, aut Carolus est, sed quatenus rex. Contrà verò, vt Reginae partem habent eorum, quæ mariti nondum in regnum cooptrati, acquisierunt constante matrimonio, ita eorum quæ post regnum adeptum, nullam planè; quia publicis opibus, non priuatis regis numis parta censentur. quod in regno Francico inter Philippum Valesium & Iohannam Burgundam vxorem iudicatum fuit. Ne verò pecuniæ in alium usum extorqueantur, iurat Imperator, se nulla, nisi conventus publici auctoritate vectigalia impositurum, tributave indicturum. Idem reges Poloniae,

niæ, Hungariæ, Daniæ, Angliæ confimiliter, ex Leg. Eduardi primi. Francorum reges olim in trium Ordinum conventu vectigalia imperabant. Vnde etiam est lex Philippi Valesij, ne collectæ indicantur, nisi summa necessitate urgente, de quæ trium Ordinum consensu. Quin & olim collectæ illæ in arcis per singulas diœceses recondebantur, selectisque viris (Electos etiamnum vocant) custodiendæ tradebantur, quibus militibus oppidatim conscriptis per eorundem manus stipendia numerarentur. quod & in aliis regionibus, utputa Belgicis, fieri solebat. Hodie saltem, ni Senatus cõsentiât, rata nō sunt, quæcunque imperentur. Sunt verò quædam provinciæ, quæ non nisi de Ordinum consensu, ex pacto tenentur; ut Linguadocana, Britânica, Provincia, Delphinatus & cæteræ quædam; ut & in Belgio planè omnes. Denique ne fiscus, quo tanquam liene tumente, cætera membra contabescunt, omnia ad se rapiat; suum ubique locorum fisco demensum tribuitur. Cùm itaque tandem constet, quæ regibus ordinariè aut extra ordinè tribuuntur, tributa, vectigalia, domaniumque adeo quod vocatur, vniuersum, (quo nomine Porto-

ria, isagogica, exagogica, regalia, bona
 ἀνελκρονόμενα, caduca, commissa, & cætera
 huiusmodi comprehendimus) in populi
 vtilitatem & defensionem, regniq̃ue sustē
 tamentum attributa fuisse: & ita quidem,
 vt iis neruis succisis, populum labascere;
 iis subrutis fundamentis, regnū corruere
 necesse sit: sequitur sanè, eum, qui in dis
 pendium populi, populum onerat, qui è
 publico damno lucrum captat, ipsumq̃ue
 adeo proprio gladio iugulat, regem non
 esse: contrà, verum regem, vt publicorum
 negotiorum curatorem; ita & publi
 carum opum administratorem; non au
 tem proprietarium dominum esse. qui
 quidem domanium regium non ma
 gis, quàm regnum ipsum, alienare, aut
 dissipare possit. Quòd si verò aliter se
 gesserit, sanè si reipublicæ interest, vt
 quisque sua propriâque re bene vtatur,
 multò magis, vt re publica quis bene
 vtatur, reipublicæ interest. Ac propter
 ea si dominus, qui sua prodigit, ad a
 gnatos & gentiles authoritate publica de
 ducitur, suisque rebus abstinere cogitur;
 multo sanè æquius curator Reipubl. qui
 rem publ. in publicam perniciem con
 vertit, aut funditus evertit, ab iis, quorum
 inter-

interest, quibúsque ex officio convenit, omni administratione, ni admonitus desinat, spoliari poterit. Quòd autem rex in omnibus legitimis imperiis, patrimonij regij proprietarius dominus non sit, facile est ostensu. Ne antiquissima illa sæcula petamus, quorum imaginem habemus in persona regis Hethæorum Ephron, qui ne agrum quidem suum, inconsulto populo, Abrahamo vendere audeat. In omnibus imperiis id iuris hodiè vsurpatur. Imperator Germaniæ, antequam coronetur, sanctè iurat, se ex his, quæ ad Imperium imperiique patrimonium pertinet, nihil alienaturum, distracturum, oppigneraturumve. Si quid verò recuperet, aut acquirat viribus publicis, Imperio, non sibi quæsitum iri. Itaque cum Carolus quartus, ut Vuenceslaus filius designaretur imperator, Electorum cuique centum coronatorum millia pollicitus, quia pecuniam in numerato non habebat, illis eo nomine telonia, vectigalia imperialia, oppida, proprietates & iura, pignoris titulo obligasset, acerri-
ma dissertatio coorta est, & plærique oppignoratione irrita esse iudicarunt. quæ sanè nõ valuisset, nisi iis ipsis, qui imperium

Genes. 23

Sleid. lib. 1.

Ex Bulla aurea.

*l. 1. & pas-
sim, c. de cō.
re. alien.
Nauclet. in
Chron.
Genes. 46.*

tueri debebant, eamq; oppignerationem
imprimis oppugnare, quæstiosa fuisset.
Propterea verò Vuenceslaus ipse coactus
est tanquam incapax, sese Imperio abdicare,
quòd regalia iura, ducatus præsertim
Mediolanensis, sibi eripi passus esset. In
regno Polonico lex vetusta est, de nō alie-
nandis terris regni Poloniæ, renouata
C15. CCC. LXXV. per regem Ludouicum.
Est eadem in Hungarico. unde legimus,
Andream Pannoniæ regem circa annum
C15. CC. XXI. apud Honorium
tertiū Pontificem postulatum fuisse, quòd
neglecto iureiurando, dominica prædica-
dis distraxisset. In Anglico, lege Eduardi, an-
no C15. CC. XC VIII. In Hispanico pariter
ex constitutione sub Alfonso facta, reno-
uata demum C15. 15. LX. in Toletanis co-
mitiis, quæ quidem leges sancitæ fuerunt
cū longo antè tempore cōsuetudo vim
legis obtinuisset. At certè in Francico, in
quo, tanquā cæterorū exemplari, diutius
hæreo, hoc ius perpetuò sacrosanctum e-
rat. Lex est regni antiquissima, iura, in-
quam, cum ipso regno nata, de dominio
non alienando, anno C15. 15. LXVI. et
malè obseruetur, renouata. Excipiuntur
tantum duo casus, Panagiū siue Appennin-
gium

*e. intellecto.
de iureiurā
do, in De-
cretal.
Polydor. Vir
gil.
In Cod.
Hispan. par.
3. t. 5. Con-
stit. 9.*

gium (alimenta) liberis fratribusve attribuendum; ita tamen, ut ius clientelare perpetuò retineatur. deinde, si necessitas bellica postulet, cum pacto tamen redhibitorio. Quod interim utrumque, irritum olim censebatur, nisi triū Ordinum conventus iussisset: hodie verò, ex quo Parlamentum statarium factum est, nisi Senatus Lutetianus, qui Senatus Parisius est, & Camera ratiociniorum publicorum comprobarint, & præfecti fisci etiam, edicto Caroli VI. & IX. Usque adeò verò hoc verum est, ut si quam Ecclesiam præfati Galliarum reges dotare vellent, etsi ea tum causa fauorabilis in primis videbatur, optimatum consensum adhibere tenerentur. ut exemplo esse potest Childebertus rex, qui absque Francorum & Neustrasiorum consensu monasterium diui Vincentij Parisiensis dotare ausus non fuit, ut neque Clodoveus II. & cæteri. Quin ne regalia quidem, aut ius nominandi prælatos cuiquam Ecclesiæ remittere possunt. Si qui verò fecerunt, ut in gratiam Senonensis Ecclesiæ Ludouicus XI. Altissiodorensis Philippus quartus; Niuernensis Philippus Augustus, Senatus,

Papon Arrestor. lib. 5. tit. 10. art. 4.

§. 5. 11. & 16 legis regie lata 1566.

Aimoi. cat.

Aimoi. lib. 4. c. 41.

irritum pronunciauit. In hanc legem rex Francorum Rhemis inaugurandus iuratur, quam si violer, perinde valeat, ac si de Turcico Persicove imperio contrahatur. Hinc Constitutiones, siue, vt vocant, statuta Philippi Sexti, Ioannis Secundi, Caroli Quinti, Sexti, Octauii, de reuocandis iis, quæ per maiores suos alienata fuerant. Hinc rescissæ in Turonico trium Ordinum conventu, cui Carolus VIII. intererat, Ludouici vndecimi patris, alienationes plæræque, & hæredibus ablata, quæ Tancredo Castellano, de ipso bene merito, propria auctoritate donarat, oppida. Quod & in postremo trium Ordinū conventu Aureliæ habito, denuò sancitum fuit. Hæc de fundis publicis. At quòd regnum Regi præferri evidentiùs appareat, eumque, quam à populo accepit maiestatem, priuata auctoritate minuere non posse, neminem suo imperio eximere potest, neque vlla regni in parte, summi imperij iure cedere. Conatus est aliquando Carolus Magnus, Francicum regnū Germanico imperio subiicere. Franci verò, verba faciente Vascone quodam principe, acriter restiterunt. Ac res ad arma prolapsa fuisset, si Carolus vlteriùs perre-

*L. peto. 69.
§. prædium.
D. de leg. 2.*

*Anno 1329.
1360. 1374.
1401. 1483.*

*Anno 1483.
1522. 1531.
1549. Ar-
stus etiam
Curia.
Anno 1560.*

*Paulus Ac-
mil. lib. 3.*

perrexisset. Conſimiliter, cū pars aliqua regni Francici, Anglis tradita fuit, ſummum ius perpetuò ferè exceptum fuit. Si quando verò vis extorſit, vt fœdere Britiniaco, quo rex Ioannes, in Vaſconia & Pictonibus ſummo iure ceſſit: neque pactum ſeruauit rex, neque magis potuit aut debuit ſeruare, quàm tutor curatōr-ve captiuus, vt tum ille erat; qui vt ſe redimeret, bona pupillorum obligaret. Eodem iure Senatus Luterianus fœdus Conſuentinum reſcidiſ, quo Carolus Burgundus Ambianum & vicinas vrbes regi extorſerat: noſtro etiam tempore Madritianum pactum, inter Franciſcum primum captiuum, & Carolum quintum Imperat. de Ducatu Burgundiæ. Caroli ſexti verò donatio regni Franciæ mortis cauſa, in Henricum Anglię regem collata, ſummę ipſius inſanię argumentum, ſi alia deſint, idoneū eſſe poteſt. Vt autem alia omittam, quę in hanc rem dici poſſent, quo iure tandem regnum regniue partem vllā donare aut vendere rex poſſit: cū illa in populo, nō in mœnibus conſiſtāt: libero-rū verò hominū nō ſit cōmerciū. cū ne libertos quidē patroni cogere poſſint, vt alio loco, quàm illis placeat, domiciliū ſuū

Anno 1198.
1200. 1269.
1297. 1303.
1325. 1330.

Anno 1360.

Anno 1465
& 1525.

Anno 1420
Monſtrelet.
c. 225.

L. liber ho-
mo. 103. D.
de verb. ob-
lig. l. ſi emp-
tor. 34. §. 1.

*D. de contr.
empt. l. pe-
nult. C. de
oper. libert.*

ponant. Maximè verò, cùm non serui, se-
fratres; nec fratres modò regis singu-
sint, sed vniuersi domini regni dici de-
beant?

*An Rex sit
Regni vsu-
fructuarius.*

An verò, si minus regni proprietarius
rex est, regni saltem domanique vsufructu-
ctarius dici potest? Sanè ne vsufructu-
rius quidem. Fructuarius pignori dari
potest. Diximus verò, reges fisci patrimon-
nium oppignerare non posse. Fructu-
rius de fructu donare suo arbitrio potest.
Regis contrà dona immensa, irrita cense-
tur: impensæ non necessariæ rescindun-
tur, superfluæ rescantur: quod in alium
quàm in publicum vsum converterit, ra-
puisse censeatur. Nec verò minus leg-
Cincia tenetur, quàm priuatus ciuis apud
Romanos quilibet: in Gallia præsertim
absque Cameræ ratiociniorum, quam vo-
cant, consensu, nulla dona valent. Hir-
Cameræ ordinariæ sub prodigis regibus
annotationes: Trop donné, soit repeté
id est, immensa est hæc donatio, itaque re-
petatur. Hæc eadem verò, quaecumque
tandem rescriptum à rege accipiat, se ni-
quod regno rei que publicæ damnosum
sit, admissuram sanctè iurat: etsi certè pa-
rum sanctè obseruat. Fructuarius de
niquè

nique, quo modo fructibus suis vtatur
 fruaturque, lex non curat. Regi contra,
 quo modo, & in quem vsum iis vti de-
 beat, lex præscribit. Itaque prisca Galliæ
 reges, dominicos redditus quadrifariam
 parti tenebantur. Pars vna impendeba-
 tur in sustentationem ministrorum Eccle-
 siæ, & inopum: altera, in mensam princi-
 pis: tertia, in familiarium stipendium: po-
 strema in refectionem arcium, pontium,
 ædiūque regiarum. Residuum si quod
 erat, in ærario reponebatur. Qui verò mo-
 tus anno circiter C^D. CCCC. XII. in Lu-
 teriano trium Ordinū conventu fuerint,
 quòd Carolus VI. in suam libidinem, suo-
 rumve, omnia convertisset, quòdque do-
 mesticæ rationes, quæ antea nonaginta
 quatuor Francicorum numorum millia
 non excefferant, in tam misero reipublicæ
 statu, ad quingentorū quadraginta Fran-
 cicorum millia excreuissent; ex Historiis
 satis constat. Vt autem dominici redditus
 ita impendebantur, ita & oblationes seu
 auxilia in bellum, vt & indictiones seu ta-
 leæ in militum stipendia tantum destina-
 tæ erant. In ceteris regnis nihilo sanè plus
 authoritatis rex habet; imò in plærisque
 minus. vt in Imperio Germanico & Polo-

*Monstrele-
 tus in Ca-
 rolo 6.*

nico. Hoc vero ideò in Francico probari
 volumus ita se habere, ne, quò quis plu
 iniuriæ audet, eò plus etiam iuris habere
 putetur. In summa, quod antè diximus
 regis nomen non hæreditatem, non pro
 priatè, non vsumfructum, sed functionem
 & procurationem sonat. Vt Episcopus a
 animæ, rex ad corporis curam salutemque
 (in iis, quæ ad bona publica attinent) in
 stitutus est: vt ille bonorum sacrorum
 hic profanorum dispensator est: & quoniam
 ille in Episcopalibus, hic in dominici
 prædiis potestatem, & nihilo maiorem
 habet: prædiorum Episcopaliū, absque
 que consensu capituli, alienatio non va
 let: vt nec dominicorum, absque concilio
 publico, optimatumve senatu: fructuum
 sacrorum pars vna edificiis, altera pauperi
 bus, tertia sodalibus, quarta Episcopis
 ipsi dicatur: idem verò fermè in redditibus
 regni dispensandis regem præstare debe
 re videmus. Non obstat, quòd hodie pas
 sim contrà vsurpetur. Etenim non, quòd
 Episcopi plærique pauperibus tollant
 quæ in lenones profundant, aut prædiorum
 omnia nemoræque vastent, officium-Epi
 scoporum vllatenus immutatum est. Nō
 quòd imperatores nōnulli omnimodam
 potesta

*Ex Concil.
 Valent. in
 c. 1. de his,
 quæ fiunt à
 prelati ab
 sique cons.
 Capit.*

potestatem sibi tribuerunt. neque enim quisquam in sua causa iudex esse potest. Quòd si verò Caracalla aliquis dixit: quādiu gladius superesset, pecuniam non defuturam; aderit & Hadrianus Cæsar, qui dicat, se sic gesturum principatum, ut sciat rem populi esse, non suam. quod vnum ferè regem à tyranno distinguit. Non, quòd Attalus Pergamenorum rex, populum Romanum, regni hæredem instituerit: quòd Alexander Ægypti, Ptolemæus Cyrenorum regnum, populo Romano, aut Prasutagus Icenorum Cæsari legaerint. Ista sanè magna vis, Iuris vim debilitare non potest: imò, quò maior est, eò minus ius nostrum lædit. Quæ etenim Romani, iuris prætextu capiebant, si is prætextus defuisset, nihilominus vi occupassent. Videmus verò nostro ferè tēpore, Venetos imaginariæ cuiusdam adoptionis prætextu, quæ absque vi ridicula planè fuisset, regnum Cypri occupasse. Non obstat quoque donatio Constantini in Sylvestrē Pontificem. ista enim palea Gratiani iam pridem exoleuit, ignique damnata est. Non donatio Ludouici Pij in Paschalem, Romæ nempe, cū parte Italię. quia enim donabat

Florus lib. 2
Linus l 70
Tacitus
lib. 14

*Volater. lib.
Geogr. 3.*

*1. Reg. c. 9.
2. Chro. c. 8.*

*l. 2. §. ius
reipub. D.
de admini-
strat. rer.
ad civit.
pert. l. tutor
27. D. de ad
min. tutor.
l. si fundū.
§. si tutor.
D. depositi,
& expres-
sius Extra-
vag. dere
iudicata, c.
intellecto.*

Pius, quæ nō possidebat, nemo restitit. At Carolo patri, Francorum regnum imperio Germanico subdere volenti, Franci iure restiterunt; & si perrexisset, vi resistere parabant. Non, quòd Salomonem Hiram regi Tyri, viginti oppida tradidisse legimus. neque enim ea donavit, sed creditori in solutum tradidit, ac intra certum tempus recuperavit. quod ex ipso textu liquet. Erant verò præterea fundi steriles, à reliquiis Gentium culti, quos ab Hiram receptos Israelitis demum excolendos incolendosque dedit. Nihilo magis obstare potest, quòd in quibusdam fortè regnis ea pactio inter regem & populum nō ita disertè intercedat. Etenim ut ea etiā nulla sit, constat tamen iure Naturæ, reges reipubl. non eversores, sed moderatores esse, ius reipublicæ suis pactiōibus mutare non posse; dominos tantum, cum pupillis prospiciunt, non secus ac tutores haberi: dominum verò eum non censi, qui civitatem libertate spoliavit, & mancipij instar divendit. Non denique, quòd quædam regna sint à regibus ipsis parta. quia enim non suis, sed publicis manibus, viribus, opibus regna acquirunt; nil verò magis rationi consentaneum est, quàm ut

ea, quæ publicis opibus, & communibus
 ciuium periculis parta sunt, absque com-
 muni consilio non alienentur; quod & in-
 ter ipsos prædones obtinet. Societatem
 humanam dirimit, qui contrà facit. Itaque
 etsi imperiû Germanicum Franci, iidem-
 que Gallicum regnum vi occuparint; id
 tamen iuris in vtroque obtinet. In sum-
 ma: statuamus tandem oportet, reges pa-
 trimonij regij non proprietarios, non
 fructuarios, sed administratores tantum
 esse: cumque ita sit; multò sanè minus, aut
 rerum priuatarum cuiusque, aut rerum
 publicarum, quæ ad singula municipia
 pertinent, proprietatem, vsum fructumve
 sibi tribuere posse.

l. 2. & pas-
 sim, C. de
 interd. cõm.
 re. alienat.

Hic tamen nobis, antequam vlteriùs
 progrediamur, scrupulus eximendus est.
 Cùm Populus Israeliticus regem postu-
 lasset, dixit Deus Samueli: Audi vocem
 populi: verum significa ei primùm, quod-
 nam sit futurum ius Regis, qui regna-
 bit super eos. Tum verò Samuel hoc Re-
 gis ius futurum inter alia exposuit, vt a-
 gros, vineas, oliueta cuiusque capiat, quæ
 ministris suis donet, res cuiusque priua-
 tas in suum vsum convertat: denique i-
 psos in seruitutem redigat. Mirum verò,

1. Sam. c.
 8. v. 14.

quanti hunc textum Aulici nostri faciant
 qui aliàs vniuersam Scripturam ludibrio
 habent. Vult hîc Deus Opt. Max. Popu-
 lo Israelitico ipsius leuitatem ostendere
 qui cùm Deum ipsum præsentem haberet
 qui iudices, ducésque belli, quotiescun-
 que rogabatur, pios & probos ipsi elige-
 ret; lubricum tamen homuncionis, in ho-
 ras mutari soliti, quàm Dei immortalis im-
 mutabile imperium mallet. Indicat itaq;
 illis, quàm lubrico in loco sit rex constitu-
 tus, quàm procliuis virium in violentiam
 lapsus, quàm præceps regni in tyranni-
 dem mutatio. Regem etenim, quem ei
 tradat, gladium in ipsos stricturum, sua
 potestate præposterè vsurum, ius in vi o-
 mne positurum. Hoc verò, quod vltro si-
 bi accersant malû, tum demum sensuros,
 cùm remedio locus non fuerit. Denique,
 non, quod sit ius regum, sed quod ius sibi
 reges tribuere soleant: non, quid facere
 ex officio debeant, sed quid plærumque
 ex maleficio vsurpent, hoc in textu descri-
 bitur. Id autem ex Deuteronomio XVII.
 capite, quo Deus Legem regibus præscri-
 bit, manifestè liquet. Hîc dicit Samuel,
 Regem subditos loco seruorum habitu-
 rum: illic præcipit Deus, ne cor suû super
 fratres

fratres extollat; ne, inquam, in subditos, quos consanguineorum loco habere tenetur, insolescat. Hic, currus fabricaturum, equites instructurum, propria cuiusque invasurum dicit: illic, ne equos congreget, ne aurum argentumve accumulet, ne populum in Ægyptum, id est, in servitutem reducat, monetur. Hic Achabus depingitur, qui Nabothi vineam scelere acquirit; illic David, qui ne aquam quidem periculo suorum haustam, bibere iustum putat: hic prædicat Samuel, Regem, quem iuri custodiendo postularint, ex legem futurum: illic contra Deus, Legem suam regi per sacerdotes tradi iubet, quam describat, perpetuoque ante oculos habeat. Itaque Samuel ipse, sacerdos summus, Legem ipsam regiam, quæ Deuter. XVII. extat, Sauli in volumine descriptam tradit. quod certè minimè fecisset, si eandem violare ius fuisset. In summa: perinde est, ac si dixisset Samuel: Petiistis regem exemplo cæterarum gentium, plerique verò sunt tyranni. Regem, qui vobis ius diceret: plerique verò quicquid velint, sibi licere arbitratur. Interim tamen Deum, cuius ipsa voluntas iustitię regula est, ultro deferitis.

1. Reg. c. 21.

2. Sam. c. 23.

ver. 16.

Extat

Herod. lib. 1

Extat autem apud Herodotū Historia, è qua facile cognoscitur, quàm proclivis sit regni in tyrānidē mutatio, cuius Samuel populum admonitum volebat. Deioces propter insignem iustitiæ commendationem à Medis, iudex primū eligitur: mox, ut, si qui iuri resisterent, eos compescere posset, cum idonea potestate rex constituitur. Tum satellites petit, dein arcem Ecbatanam, adversus contumacium iniurias sibi extrui curat: demum in propriis iniuriis vel minimis vlciscendis totus est: ad extremum verò regis vultum intueri, regis in conspectu ridere, aut spueri, crimen iudicatur. Usque adeò periculosum est, impotēti animo, qualis est plærorumque hominum, nimiam potentiam concedere. Non ergo docet eo in loco Samuel, absolutam esse regis potentiam; imò contrà populum, ne dissolutæ hominis impotentiae, nimium potentiae tribuat, admonitum cupit. Non regis vim exaggerat, sed aggere coercendam dicit: non effrenem aliquā licentiam regi concedit: quin potius frenum iniiciendum, tacitè suadet. Hac verò oratione moti Israelitæ, regum suorum potentiam temperasse videntur: quod & omnes prudentes nationes, sive pro-

proprio, siue hoc eodem exemplo, siue etiam alieno periculo edoctæ, sapienter fecerunt, vt ex iis, quæ sequuntur, manifestum erit.

Diximus in constituendo rege duplex fœdus initum fuisse; primum, inter Deum & regem & populum, de quo suprà: secundum, inter regem & populum; de quo nobis iam agendum est. Saule rege constituto, traditur ei lex regia, secundum quam imperet. Dauid in Hebron init fœdus coram Domino, id est, Deo teste adhibito, cum omnibus senioribus Israel, qui vniuersum populum repræsentabant: tum verò demum in regem vngitur. Ioas quoque cum vniuerso populo terræ, in domo Domini, Ioiada summo sacerdote verbis præeunte. Impositum verò dicitur ei vnà cum diademate testimonium; quod plærique legem Dei, quæ passim eo nomine vocatur, interpretantur. Cõsimiliter Iosias promittit, se obseruaturum præcepta, testimonia & statuta, in libro fœderis comprehensa. quibus nominibus intelliguntur leges, quæ tum ad pietatem, tum ad iustitiam pertinent. Quibus omnibus in locis dicitur fœdus initum cum vniuerso populo, vniuersa multitudine, omnibus senio-

Fœdus siue pactū inter regem & populum.

Deuter. 17.

1. Samu. 10.

ver. 25.

2. Sam. c. 5.

ver. 3.

1. Chro. c. 11.

ver. 3.

2. Reg. c. 11.

v. 17. & 12.

2. Chro. c. 23.

ver. 3.

2. Reg. c. 23.

ver. 3.

senioribus, omnibus hominibus Iudæ: intelligamus, quod etiam sigillatim exprimitur, non modò principes Tribuum verum etiam omnes Chiliarchos, Centuriones, magistratúsque inferiores adfuisse, urbium nomine, quæ singulæ per se cù rege paciscerentur. In eo pacto agebatur de creando rege. Populus enim regem faciebat, non rex populum. Itaque non dubium est, quin Populus stipularetur rex promitteret. Stipulatoris verò partes in iure potiores censentur. Stipulabatur ille à rege, an non iustè & secundum leges regnaturus esset? hic, facturum spondebat. Populus demum se iustè imperanti, fideliter obsequuturum respondebat. Itaque promittebat rex purè, populus sub conditione: quæ si non impleretur, populus ipso iure omni obligatione solutus censeretur. In primo fœdere seu pacto, Pietas in obligationem venit: in secundo, Iustitia: illo promittit rex, se piè obediturum Deo: hoc, se iustè imperaturum populo: illo, se gloriam Dei; hoc, vtilitatem populi curaturum: in illo inest conditio, Si legem meam obseruaris; in hoc, Si ius vnicuique suum tribueris. Illius, ni impleatur, Deus propriè vindex est; huius,

legi-

legitimè vniuersus Populus, quive vniuersum populum tuendum susceperint, regni procures. In omnibus verò legitimis imperiis ita perpetuò obseruatum fuit. Persæ, sacrificiis ritè peractis, hanc cum Cyro conventionem faciunt: Tu primum Cyre, si quis Persis bellum faciat, aut leges violet, promittisne auxilium patriæ tuæ, omnibus viribus tuis? Ac ut spondit; Nos Persæ, aiunt illi, vicissim tibi auxilio erimus, si quis tibi patriam tuenti obsequi noller. Xenophon verò hanc conventionem *συνμαχίαν*, id est confederationem vocat, quo modo Isocrates orationem de Officio subditorum erga principem, *συνμαχικὸν λόγον*. Inter reges Spartanorum & Ephoros fœdus singulis mensibus renouabatur, etsi illi semper ex Heraclidis erant. Ut verò iurabant reges, se secundum leges patriæ regnatos; ita Ephori, si fecissent, regnum in ipsorum manu stabilituros. Consimiliter in regno Romanorum Romulus cum Senatu & populo hoc pactum facit. Populus leges ferret, ipse rex latas custodiret: Bellum populus decerneret, ipse gereret. Etsi verò Imperatores plerique vi & ambitu magis, quàm vlllo iure

Xenophon
lib. 8. Pæd.

Xenophon
de Repub.
Lacedæm.

Dionys. Ha
licar. lib. 1.

imperium Romanorum adepti sunt, & lege regia, quam vocant, omnimodam potestatem sibi arrogarunt; quæ tamen ex tant legis illius fragmenta tum in libris tum in Romanis inscriptionibus, satis decent, Reipublicæ curandæ & administrandæ, non evertendæ, & per tyrannidem opprimendæ facultatē concessam illis fuisse. Quin & legibus sese teneri, professi sunt boni imperatores, & senatui imperiū acceptum tulerunt, & ad senatum gravissima quæque retulerunt, eoque inconsulto quidquam, quod ad summam rei pertineret, decernere nefas putarunt. Quòd si verò hodierna imperia spectemus, nullum sanè est, quod eo nomine dignum censeatur, in quo inter Principem & subditos prædictum eiusmodi non intercedat. In imperio Germanico, nō ita pridem solebat rex Romanorum, in Imperatorem coronandus, fidē & hominum præstare imperio non secus ac vasallus seniori, cū investituram feudi accipit. Licet verò per Pontifices verba cōcepta, in quæ iurabat, paulò immutata fuerint, res tamen eadē perpetuò manet. Itaque Carolum V. Austriacum certis legibus & cōditionibus in imperatorem cooptatum scimus, ut & ali.

Specul. Sa-
xon. lib. 3.
artic. 54.

os, qui sequuti sunt, quarum summa erat: Leges latas custoditurum; nouas, inconsultis Electoribus, non laturum: publica publico consilio curaturum: nil alienaturum oppigneraturumve ex iis, quæ ad imperium pertinent; & cætera, quæ sigillatim ab Historiographis recensentur. Cum verò imperator Aquisgrani coronatur, Coloniensis Archiepiscopus stipulatur primum, An non sit Ecclesiam defensorus; iustitiam administraturus; imperium conseruaturus; viduas, orphanos, omnesque omnino miseratione dignos protecturus? Quod ubi sollemniter ante aram iurauit, rogantur principes, quique imperium repræsentant, an ipsi eidem promittere velint. Nec verò prius aut vngitur, aut gladium; reipubl. defendendæ nomine, aliave imperij insignia accipit, quam iusiurandum illud præstiterit. Ex quo sanè manifestum est, imperatorem purè, principes imperij sub conditione obligari. In regno Polonico quin idem obseruetur, dubitabit nemo, qui ritum in Henrici Andegauensis electione coronationeque nuper admodum obseruatum intellexerit. In primis cum conditio de vtraque religione, tum Euangelica, tum Rō-

Sleid. lib. 11. c. 2.

mana, conseruanda apposita fuit, quam conceptis verbis ter stipulantibus proceribus, ter sponpondit: In Hungarico, Bohemico & cæteris, quæ recensere longū esset idē planē fit. Nec verò tantū, vbi electioni ius integrum haftenus mansit, verū etiam vbi successio mera vulgò obtinere putatur, eadem prorsus stipulatio intervenire solet. Rex Franciæ quando inauguratur, rogant primū Laudunensis & Bellouacensis Pares Ecclesiastici, populū, qui adesset vniuersum, eūne regem esse cupiat iubent atque? vnde etiam à populo tum eligi in ipsa inaugurationis formula dicitur. Vbi populus cōsensisse videatur, iurat, se lege Franciæ priuilegiāq; ac iura in vniuersum omnia tuiturum, domanium non alienaturum, & cætera; quæ etsi interpolata fuerunt, & longè diuersa ab antiqua formula quæ extat in Bibliotheca capituli Bellouacensis, in quam Philippus primus iurasse comperitur; nihilo minus tamen disertis satis exprimuntur. Nec verò prius accingitur gladio, vngitur, coronatur à paribus (qui & ipsi corollis ornati sunt) sceptrūque & virgam iustitię accipit, aut rex proclamatur, quā populus iusserit: neque etiam prius ei pares iurant, quā ipsis fi-

dem dederit, se leges accuratè custoditurum. Eæ verò sunt, ne patrimonium publicum dilapidet, ne vectigalia, portoria, tributa suopte arbitrio imponat indicatve, ne bellū decernat, pacemve faciat: denique, ne quid in publicum, nisi publico consilio statuat. Item sua senatui, sua Comitibus, sua regni officiariis constet auctoritas; & cætera, quæ perpetuò in regno Francico observata fuere. Vbi verò provinciam aliquam, urbemve ingreditur, privilegia eiusdem confirmare tenetur, inque eius leges & consuetudines sese sacramento devincit. Quod nominatim apud Tholosates, Delphinates, Armoricos, Provinciales, Rupellanos ipsos obtinet; quorum cum regibus conventiones disertissimæ sunt; quæ frustra omnes essent, nisi locum conditionis in contractu tenere censerentur. Extat antiquorum regum Burgundiæ iusiurandum, his verbis: Omnibus legem, iustitiam, maniburgiū, id est tutelam, conseruabo. In Anglia, Scotia, Suedia, Dania idem fere mos est, qui in Francia. At certè nusquam disertius, quàm in Hispania. In Regno enim Aragonico, peractis multis ceremoniis inter eum, qui iustitiam Aragonicam;

*In Annal.
Burgund.*

feu publicam maiestatem repræsentat, in sublimiori quodam folio, & regem inaugurandum, qui illi fidem & hominum præstat, lectisque legibus & conditionibus, quibus implendis obligatur, his tandem verbis Proceres lingua vernacula regem affantur: Nos, qui tantum valemus, quantum vos; (ita enim fert idioma Hispanicum) & plus possumus, quàm vos, regem vos eligimus, cum his & his conditionibus. Inter vos & nos vnus imperat magis, quàm vos. Ne verò se perfunctoriè tantum aut consuetudinis antiquæ obseruandæ causa iurasse putet, tertio quoque anno in publico conventu hæc eadem verba ei repeti solent. Quod si regia potentia fretus insolescat, leges publicas violet, fidem datam denique negligat; tum sanè ipso iure, summo eo anathemate devotus censetur; quo olim Ecclesia Iulianum imperatorem apostatam devouit. Cuius quidem ea vis est, vt non pro eo amplius; sed in eum preces concipiantur; ipsi verò sua fide & obligatione planè soluti sint, eo iure, quo vasallus seniori excommunicato parere neque ex officio debet, neque ex sacramento tenetur. quod tum Concilij, tum

Con-

Conventus publici apud eos decreto sanc-
 citum est. Consimiliter in regno Castel-
 læ, Concilio indicto rex inaugurandus
 publicè primum admonetur sui officij;
 mox perleguntur conditiones disertissi-
 mæ, quæ ad reipublicæ vtilitatem perti-
 nent. Tum iuratrex, se eas diligenter &
 fideliter obseruaturum. Demum verò
 magnus Equitum magister illi sese iure-
 iurando adstringit, quem cæteri deinde
 principes ciuitatùmque legati suo qui-
 que ordine sequuntur. Quod & in Lusit-
 tanico, Legionensi, cæterisque Hispaniæ
 regnis perinde obseruatur. Neque verò
 minores principatus alio iure instituti
 fuerunt. Extant Brabantinorum cætero-
 rumque Belgiæ populorum, Austriaco-
 rum, Carinthiorum & cæterorum cum
 Principibus suis disertissimæ convencio-
 nes, quæ sanè conditionum locum obri-
 nent. Brabantini verò in primis, ne vlli
 ambiguitati locus daretur, conditionem
 istam expresserunt. In duce enim suo in-
 augurando, conventionibus antiquis,
 quibus nil ferè ad reipub. conseruationē
 deest, coram duce perlectis, ni eas omnes
 obseruarit, sibi integrum esse alium quem
 libet suo arbitrato eligere, palàm ei di-

In Concil.

Tolet. 4.

c. 74. & in

Tolet. 6.

lib. 2. Feud.

t. 28. §. 1.

*La ioyeuse
 entree.*

Ludovicus
Guicciard.

sertéque protestantur. Ipse verò tum in eas, accepta conditione vltroque agnita, sese sacramento devincit. Quod etiam postremò in Philippi Hispaniarum regis inauguratione observatum fuit. In summa: inter regem & subditos contractum mutuo obligatorium esse, nemo negare possit; nempe ut bene imperanti bene obediatur, qui quidem iureiurando ab illo primùm, deinde ab his confirmari solet. Quæro verò hîc, cur iurat aliquis, nisi ut ex animo se ac serio loqui ostendat? An verò quidquam naturæ magis consentaneum est, quàm ut ea, quæ placuerunt, seruentur? Deinde cur rex primus iurat, stipulante populo, nisi ut conditionem sive tacitam sive expressam recipiat? Cur verò conditio contractui apponitur, nisi eo tantum, ut, ni ea impleatur, contractus ipso iure solutus sit? Quòd si verò conditionis implendæ defectu contractus ipso iure solutus est, quis periiurum populum vocet, qui regi conditionem, quam implere debuit & potuit, negligenti, legemque, in quam iuravit, violanti, obsequium deneget? Quis verò contra eum regem fœdifragum,

L. I. D. de
pact. l. non
minorem.
20. D. de
transact.

per-

periurum, eo beneficio prorsus indignum non censeat? Etenim si vasallum clientelæ nexu lex liberat, in quem senior feloniam commisit, etsi sanè senior fidem propriè non dat vasallo, sed vasallus ipsi: si patronum clienti fraudem facientem lex duodecim Tabularum sacrum esse iubet: si liberto adversus patroni atrocem iniuriam actionem ciuilia iura permittunt: si feruum ipsum iis casibus, potestate herili liberant, cum tamen naturalis tantum, non ciuilis obligatio insit: an non multò magis solutus erit populus ea fide, quam regi præstitit, si rex, qui primus ipsi, tamquam domino procurator, solenniter iurauit, fidem fregerit? An non verò etiam si non isti ritus, non ea sacra, non ea sacramenta intervenirent; satis tamen ipsa natura docet, Reges ea conditione à populo constitui, ut bene imperent? iudices, ut ius dicant? duces belli, ut exercitum adversus hostes educant? Quod si verò sæuiunt, iniuriam inferunt, hostes ipsi fiunt; ut reges non sunt, ita nec agnosci à populo debere. Quid si, inquires, populum ali-

lib. 2. Feq-
dor. t. 26. §.
24. & t. 47

Dionys. Ha-
lic. lib. 2.

Cicer. 1. Off.

quem vi subactū, in sua verba iurare princeps coegit? Quid si, inquam ego, prædo, pyrata, tyrannus, cum quo nulla iuris vilius societas esse censetur, admoto gladio, syngrapham ab aliquo extorserit? An non scitum est, fidem vi elicitam non obligare? maximè verò, si contra bonos mores, contra Naturæ ius quidquam promittatur? Quid verò magis cum Natura pugnat, quàm si populus sibi ipse catenas & compedes iniiciat? si iugulum se suum mucroni obiecturum, si manus sibi ipsi se violenter allaturum, principi (quod idem planè est) promiserit? Itaque inter regem & populum mutua obligatio est, quæ siue Ciuilis, siue Naturalis tantùm sit, siue tacita, siue verbis cõcepta, nullo pacto tolli, nullo iure violari, nulla vi rescindi potest. Cuius quidem tanta vis est, ut princeps, qui eam contumaciter violet, tyrannus; populus, qui vltro rumpat, seditiosus verè dici possit.

*Qui sint
Tyranni.*

Iam cùm hætenus regem descriperimus; sequitur, ut Tyrannum paulò accuratius describamus. Regem eum esse diximus, qui regnum siue per stirpem, siue per electionem delatum, ritèque commissum, legitimè etiam regit atque gubernat. Eum
itaque

itaque tyrannum, utpote regi planè contrarium esse, sequitur, qui aut vi malique artibus imperium invasit, aut ultro sponteque delatum regnum contra ius & fas regit, contraque leges & pacta, quibus sese sacrosanctè devinxit, pervicaciter administrat. Quod etiam utrumque in vnum eundemque hominem cadere potest. Ille vulgò dicitur Tyrannus absque titulo, hic Tyrannus exercitio. Potest verò fieri, ut & vi occupatum regnum, iustè; & iure delatum, iniustè quis regat. At certè cum regnum ius sit magis, quàm hæreditas; & functio, quàm possessio; videtur, qui suo munere malè fungitur, quàm qui munus non ritè accepit, eo nomine dignior. Sic Papa malè ingressus, dicitur intrusus; malè gubernans, dicitur abvrens. Dicebat ille *ἔστις αὐτῷ Πίναξ ὁ μόνον πολιτῶν, ἀλλὰ καὶ συγγενῶν Αἰχρόφα*, Præstat extraneus quivis iustus, non modò civi, verùm & consanguineo. Ita etiam nobis dicere liceat: Princeps nō ritè constitutus, modò iustus sit, cuivis ritè inaugurato, qui iniustè gubernet, longissimè præstat. Cum etenim reges pascendo, iudicando, curando populo sint instituti: malo sanè me fur pascat, quàm pastor devoret; malo mihi prædo ius dicat, quàm

*Arist. c. 10.
lib. 5. Polit.
Bartol. in
tract. de
Tyrannide.*

Pythagoras

iudex vim faciat: malo me empiricus curret, quàm medicus ritè infularus veneno interimat: malo falsus tutor mea bona bene administret, quàm legitimus dilapidet. Deinde utcumque illum ambitio sollicitet, videri possit quodammodo vim primò fecisse, vt postea iustitiam exerceret, vt Cyrus, Alexander, Romani, qui vitis plærumque autonomiam & immunitates priuilegiâque concedebant: cum hic sanè eò tantùm, vt iniustè regnet, ius suum iactare videatur, quod hodie non modò Moschi, Turcæve; verùm & Christiani principes permulti faciunt. Itaque illorum factum tractu temporis interdum conualescit: horum quò senescit magis, eò deterius evadit. Quod si verò, ait Augustinus, sunt illa regna, magna tantùm latrocinia, in quibus iustitia locum non habet: sunt in eo quidem pares, quod vterque latro, vterque prædo, vterque iniustus possessor est, cum sanè non minus fur iniustus possessor sit, qui rem alienam invito domino capit, quàm qui oblata malè vititur. At eius certè longè grauius flagitium est, qui interimendum, quàm qui conseruandum cepit; eius, inquam, qui vano titulo fretus, iniustè, quàm qui

Xenophon.
Plutarchus
in Alexan.
in Aemilio,
Cesare.
Suetonius
in Cesare,
c. 75.

August. lib.
4. de Cuit.
Dei, c. 4.

eo titulo planè destitutus, iustè tamen regnum vi occupatum gubernat. Iam verò & Tyranni absque titulo, differre inter se possunt. Sunt enim qui fines alienos ambitiosè invadunt, quales Nimbrodus, Ninus, Chananæi, ut suos dilarent. Hi etsi inter suos reges dicantur, in illos tamen, quos ultro nec lacessiti invadunt, tyrannidem exercent. Sunt, qui regnum suffragiis deferri solitum adepti, hæreditarium fraude, ambitu, corruptela aliisve artibus facere conantur. quorum exempla non longè petenda forent: qui sanè eò peiores illis existunt, quò fraus, quàm vis odiosior, ait Cicero, esse debet. Sunt, qui nefando parricidio patriam ipsi invadunt, ac viperarum instar, matrem in ipso enixu eviscerant. quales qui duces belli creati à populo, rempublicam invadunt, ut Cæsar Romæ dictaturæ prætextu, ac plærique Italiæ principes. Sunt & fœminæ, quæ regna legibus patriis masculis tantum deferri solita, occupant, eorumve administrationem ad se rapiunt; ut Athalia Iudaici, Semyramis Assyrii, Agrippina Romani imperij sub Nerone filio; Mammea sub Alexan-

dro Seuero; Semiamira sub Heliogabalo; Brunechildes aliquot Frâncici regni. Quæ quidem impuberes filios ita educari curabât, vt puberes facti voluptatibus tantum indulgerent; itaque omnium rerum potestas penes eas tantum earumve seruos, ministros & proagogos remaneret. Sunt denique ij, qui desidia, ignauia, luxu, legitimorum alioqui principum abvrentes, ipsosq; voluptatibus, deliciisque inescantes, quales sub Gallicis præsertim Merovingiis quidam Maiores palatij ob illa egregia ministeria creati, regiam auctoritatem ad se totam transferunt, nudumque nomen regibus relinquunt. Qui quidem omnes eius generis sunt, vt quamvis ceteroquin iuste gubernarent, eo tamen ipso, quod iurisdictionem illam prædonum tantum iure habent, meritò tamen tyranni sine titulo censeri possint. Iam Tyranni exercitio qui dicantur, non tam facile, ac, quinam verè reges, definire possis. Et enim quia illis libido, his ratio imperat; & hæc quidem ipsa sibi suos limites præscribit, illa verò contrà nullis finibus circumscribi potest; quod sit propriè regum ius, facile; quæ verò, quantæque tyrannorum iniuriæ, difficulter admodum explicari que-

queat. nimirum, ut rectum uniforme atque unicum est; obliquum contra varium & multiplex; ita ius simplex est, & paucis verbis explicabile, cum iniuriæ nullis casibus definiri possint, quin perpetuo plures omittantur, quam explicentur. Et si verò certæ regulæ sunt, quibus eos si non de pingere, saltē ut agnosci possint, apte delineare queas; nulla tamen certior, quam si artes tyrannicas cum regiis virtutibus actionibusque contuleris. Tyrannus eminentes in segete spicas demetit; primores reipub. dolo, fraude, calumniis opprimit; conspirationes in se intras subinde, quò citius eos e medio tollat, comminiscitur, ut Tiberius, Maximinus & cæteri: denique, ne consanguineis quidem ac fratribus parcit: Rex contra, non fratres modò quasi consortes agnoscit; verum etiam optimates omnes fratrum loco habet, iisque dignitatem suam acceptam ferre non veretur. Tyrannus adversus nobiles, ignobiles & quasi terræ filios extollit; qui quòd sua omnia ipsi debeant, quibuslibet in rebus adulentur & inserviunt: Rex vnumquemque in suo gradu tuetur; Proceres tanquam regni amicos fouet, iisque non minus, quam sibi consultum cupit. Tyrannus

nus viros graues & iustos odio prosequitur, suspectosq; habet, ac ne qui tales evadant, omni arte curat; quia verò nō prius se tutū putat, quàm omniū mores corrumpat, popinas, ganeas, lupanaria, ludos, ut Cyrus domandis Sardis, instituit: Rex contra viros bonos vndequaq; accersit, invitat, inuitos ad se trahit; ne verò desint, literarios ludos aperit, gymnasia instituit, seminaria virtutū vbiq; locorū excolit: Tyrannus congregationes publicas, quantum in se est, aut vitat, aut tollit, convētus Ordinum, Comitia, diætas reformidat, ac vesperilionis instar lucem hominum refugit; quin & colloquia, sermones gestusq; subditorum suspecta habet: Rex, quia recte cælo vivit, in multitudine Senatorum gloriatur, iisq; inconsultis nil agendum putat: nec modò eos conventus non veretur, verùm reueretur in primis & honorat. Tyrannus subditos inter se collidit, factiones in rep. serit, fouet, & alit; vnius ope alteram delet, ac superstitem tandem opprimit, ex eoque tanquam vlcere, quod perfidi chirurgi solent, lucrum perpetuū captat; denique, quod Vitellius ille, olere hostem mortuum, præsertim ciuem, dicere non veretur, aut saltem sentit: Rex pa-

cem

*Machiau.
in Principe.*

*Aristot. c. 11
lib. 5. Polit.*

cem inter subditos, ut pater concordiam
inter liberos, conseruat, rixarum semina
suffocat, cicatricem quam citissimè obdu-
cit, ne rebellium quidem cædem absque
lachrymis audire potest. Itaque quos hic
adversus hostium impetus tueretur & de-
fendit; ille, quovis hoste perniciosior;
proprium mucronem in sua viscera ut adi-
gant, cogit. Tyrannus exteros in præsi-
diis collocat, arces adversus ciues extruit, po-
pulum exarmat & arce expellit, barbaris
& stigmatitiis satellitibus circumstipatur;
otacoustas & delatores in subditos, tan-
quam exploratores in hostem, publico æ-
re conducit: Rex adversus hostes non tam
se mœnibus, quam populi benevolentia
tuetur; quot ciues habet, tot se satellites
habere putat; non tam quot circum se
habeat, quam ne quos habere cogatur;
cogitat; arces arcendis hostibus, non
coercendis ciuibus extruit; in Populo de-
nique præsidium suum omne collocat.
Itaque etsi habet ille lictores & satellites
innumeros, qui turbam summoveant, non
summouent ij tamen metum, suspicio-
nem, miseròsque miseræ mentis tumul-
tus: utcumque arcem vrbs muniat, ar-
cem interea summam, non mentem, inquam,
tyran-

*Liui. li. 2. c. 8.
Dionys. Ha-
lic. lib. 5. de
Arunte filio
Porfena.*

*Proverb. 14.
vers. 28.*

*Bartol. in
tract. de
Tyrannid.*

tyrannorum tyrannus Metus & Pauor occupat. Hic neque in turba, animo turbatus est, neque in solitudine sollicitus, ipsa conscientia tutus, ipsa turba stipatus, urbem, forum, plateas securè obambulat. Tyrannus, si ciuiles dissensiones desint, bellum foris gerit; munimenta extruit; qualia Pharaò, vt Iudæos, Polycrates, vt Samios occuparet, quò cætera minùs attenderent: ideòque bellum semper aut parat, aut minatur, aut imminere si nulat; accersit denique potiùs, quàm arcessat. Rex nunquam nisi coactus; nunquam nisi reipublicæ causâ, bellum facit, nunquam denique hamo aureo piscatur, aut bellum sulcipit; è quo plus respublica periculi metuere, quàm lucri sperare possit. Ille demum artes omnes init, quibus opes subditorum exhauriat, vt in victu quærendo anxij, de libertate recuperanda minùs cogitent; itaque omnia in fiscu conuertit: hic in priuatorum opibus suas consistere ratus, apud subditos suas quodammodo opes deponit, seque tum amplissimum thesaurum habere putat, cum subditi diuitiis affluunt. Demit ille multis, quod paucis iisque indignis donet; exhaurit omnes, vt in paucos profundat;

publi-

*Aegid. Rõ.
de reg. prin.*

publica diruit, vt sua ædificet? sanguinem populi ad deliquium vsque elicit, quem adulatoribus aliquot ebibédum propinet: hic sibi suisque commodis demit, vt populo largiatur, publica extruit atque ornat, vniuersos locupletat, sanguineque adeò suo populum alit & sustentat. Si ille, quod interdum Tiberius, Nero, Commodus & cæteri, viscerationes populo concedit, facit, vt populum eò faciliùs postea evisceret, ipsique sua quasi viscera comedenda apponit: cùm hic sanè, si venam secet interdum, si sanguinem eliciat, ad incolumitatem populi salutemque tuendam, non propriam libidinem exariandam, faciat. Itaque vt hunc Scriptura sacra pastori, ita & illum leoni rugienti cõparat, cui tamè vulpes sæpissimè copulata est. Quæ enim totius iniustitiæ, ait Cicero, capitalissima est, etsi reipsa id facit Tyrannus; id tamen ita ferè curat, vt tum cùm maximè fallit, vir bonus esse videatur. Itaque pietatem erga Deũ simulat, quam Aristoteles artiũ tyrannicarum potissimam vocat. Verùm, vt populus quidquã in eum moliri vereatur, quem, quia Deum reueretur, Deo charum esse verisimile sit. Studium erga rempublicam; verùm, non tam vt reipublicæ

*Proverb. 18.
ver. 5.*

*Aristo. c. 11.
lib. 5, Polit.*

prosit, quàm ne sibi ipsi noceat. Iustitiæ quoque & fidei laudem in quibusdam rebus, nimirum leuioribus, affectat; verùm, quò faciliùs in grauioribus iniuriam facere & fallere possit; non secus sanè, quàm latrones, & qui maleficio & scelere pascuntur, qui sine iustitiæ portiuncula saltem aliqua diu consistere nullo modo possent. Clementiæ denique; verùm ita, vt sceleris quibusdam veniam indulgeat, quos morte mulctare, clementia summa est. Breuiter, quod rex ipse est, tyrannus callidus videri vult; & vt virtutis amore homines incèdi scit, ita & virtutis vmbra aliqua decipiendos esse nouit: at certè vtrumque vultum fingat, vulpina cauda semper prominet; vtrumque obganniat, rictus & rugitus leonem prodit. Porro vt regnũ bene constitutum omnia cæterorum bonorum regiminum commoda in se habet; ita & tyrannis omnium prauorum incommoda & vitia continet. Habet ab aristocratia regnum, quòd optimates quique in consilium adhibentur; habet & ab oligarchia tyrannis, quòd pessimi & corruptissimi quique. Vt illic multitudo regum, hinc tyrannorum caterua dominatur. Habet regnũ à politia, quòd omnium ordinum convē-

*Tho. Aquin.
in secund. se-
cund. q. 12.
art. 11.*

tus habentur, ad quos optimi quique, de republica deliberaturi, mittendi deliguntur: habet & à democratia seu ochlocratia tyrānis, quòd, si minùs eos conventus impedire possit, saltem vt corruptissimi quique ambitu & malis artibus eò mittantur, sollicitè curet. quod nostris etiam temporibus factitatum scimus. Sic passim regis vultum tyrannus, regni speciem tyrannis imitatur: & quò astutiùs, eò diutiùs durat; cùm tamen vix vlla, teste Aristotele, ad centesimum vique annum pervenisse legatur. In summa: Rex studet vtilitati publicæ, tyrannus propriæ. At sanè cùm, vt sunt homines, nusquam reperiri queat, qui omnibus in rebus vtilitatem publicam spectet, nec diu consistere, quin vllatenus eius rationem habeat: vbi vtilitas publica prævalet, rex & regnum; vbi propria, tyrannus & tyrannis locum habere dicentur. Hæc de tyrannis exercitio, in quibus deprauatissimorū morum rationem non habemus, qui non tam malum principem, quàm malum virum facere dicuntur. Si cui verò hæc descriptio vsquequaque non satisfaciet, præterquàm quòd accuratiores fortè tyrannorum imagines in Historiis inveniet, viuos

*Bartolin
tract. de Ty
rann. & de
Regim. civi.*

& spirantes tyrannos, omnibúsque numeris absolutos hoc tempore, quos intueatur, multis in regionibus, quod & Aristoteles suo sæculo conqueritur, habet. Ac tandem ad summam quæstionem his tanquam gradibus pervenimus.

Vidimus, quomodo reges, sive secundû capita, sive etiam secundum stirpes eligantur à Deo, & constituentur ab vniuerso populo, quid rex, quid regni officarij præstare teneantur, quantum pateat illius potentia, quantum etiam horum munus & officium, quæ pacta quàmque sancta in rege constituendo intercedant, & quæ iis conditiones insint, sive tacitæ, sive expressæ; demû, quis tyrannus absque titulo, quis etiam exercitio: sequitur modò tandem, cum legitimo Regi, suoque officio tum erga Deum, tum etiam erga populum bene fungenti, tanquam Deo obediendum esse constet; vt, an, & per quos, tyranno resisti, quibúsque modis iure possit, edisseramus. Ac de eo, qui absque titulo tyrânus vulgo vocitatur, primùm agendum est. Ergo Nihil aliquis populum nullo sibi iure devinctum, nulla iniuria lacepsitus, vi invadat: Cæsar patriam remque publicam Romanam

Qui tyrannos absq; titulo coercere teneantur.

nam opprimat: Popelus dolo parricidió-
que regnum Polonicum ex electiuo hære-
ditarium facere conetur: Brunichildis ali-
qua Francici administrationem vnà cum
Protadio suo totam ad se transferat; aut
Ebroinus, Theodorici ignauia frerus, gu-
bernacula regni invadat, populúm q; ser-
uitute opprimat: quid híc iuris statuemus?
Primùm docet nos ius Naturale, vitam &
libertatem nostram, qua sine vita vix vita-
lis est, aduersus omnem vim & iniuriam
cōseruare & rueri. Inseuit id Natura cani-
bus aduersus lupos, tauris aduersus leo-
nes, colūbis aduersus accipitres, pullis ad-
uersus miluos; longè verò magis homini
aduersus hominē ipsum, si ipsi fiat lopus.
Itaque repugnare, necne liceat, qui ambi-
git, cum natura ipsa pugnare videtur. Ac-
cedit ius Gentium, quo distincta sunt domi-
nia, fixi limites, constituti fines, quos quis-
que aduersus quoslibet defendere tene-
tur. Itaque non minus licebit resistere A-
lexandro, si nullo iure fretus, nulla iniuria
lacepsitus, gentem aliquam cum potentis-
sima classe invadat, quàm Diomedem pyra-
tæ, si vno myoparone mare infestum red-
dat. Nec enim eo posito, Diomedem Ale-
xander iure, sed impunitate tantum supe-

Otto Frising
Chron. 5 c. 7
Aimoi. li. 4.
c. 1.
Greg. Turō.
lib. 4. c. 56.
lib. 5. c. 39.
lib. 8. c. 29.

rat. Non minus Alexandro regionem aliquam depopulanti, quàm grassatori palium involanti; non minus, si urbem machinis subruat, quàm latroni, qui parietem suffodiat. Accedit verò potissimùm ius Ciuile, quo societates hominum, quæque certis legibus constitutæ sunt, ut illæ vno, hæ alio modo gubernentur; aliæ ab vno, vel paucis, aliæ ab vniuersis regantur: quædam imperium muliebres respuant, nonnullæ admittant: quædam reges ex quadam stirpe, quædam promiscuè eligant: & cætera. Hoc ius si quis vidolove rumpere tenter, quia societatem, cui debet omnia, violat, quia in patriam cuniculos agit, cui naturâ, cui legibus, cui sacramento devincti sumus, ei omnes resistere tenemur; adeò ut, si negligamus, proditores patriæ, desertores societatis humanæ, iuris contemptores verè simus. Ut verò nos adversus hosce tyrannos, iura naturæ, gentium, ciuilia, arma capere iubent; ita nec vlla omnino ratio dehortari potest. Non interuenit iusiurandum, non pactum vllum, non vlla obligatio, neque publica, neque priuata. Itaque vel priuato cuilibet tyranni-

tyrannidem huiusmodi , si intrudatur, depellere licet. Non habet hîc locum Lex Julia maiestatis, quæ perduelles in patriam , aut in principem punit. Neque enim princeps is est , qui rempublicam alienosve fines, nullo iure fretus, invadit: neque perduellis, qui patriam armis defendit. Quin potius huc pertinet iusiurandum , quod Athenis puberes omnes præstare in Aglauræ templo solebant : Pugnabo pro sacris , pro legibus, pro aris & focis, sive solus, sive cum multis; & ne patriam meam deteriorem , quàm accepi , posteris tradam, omnibus viribus enitar. Non leges de seditiosis. Seditiosus est is, qui contra publicam disciplinam populum defendendum suscipit. Seditio- nem autem non facit, sed tollit, qui everforem Patriæ , publicæque disciplinæ coercet. Habet verò contrà locum lex de Tyrannicidis, quæ & viuos præmiis , & mortuos epitaphiis & statuis honorat , vt Harmodium & Aristogironem Athenis : Brutum & Cassium in Græcia statuis æneis, publico decreto: Aratum Sycionium quoque; quòd patriam illi à Pisistrati , Cæsaris , Nicoclis

*L.vlt.D.ad
leg.iul.ma-
iestat.*

*Bartol. in
tract. de
Guelph. &
Gibel.*

*Plin.lib.4.
Alexan. ab
Alex.lib.
6. c. 4.*

*Xiphilinus
in Augusto.*

*Plutarch. in
Arato.*

*Valer. Ma-
xim. lib. 2.
cap. vlt.*

*l. 3. & l. o-
mne deli-
ctum. §. vlt.
D. de remi-
lit.*

tyrannide liberaissent. Quod quidem vique adeo probauit antiquitas, ut Xerxes ipse, Athenis devictis, Harmodij & Aristogironis statuas, in regnum suum transferet; Seleucus in pristinam sedem reportandas curaret: Rhodij verò easdem vrbi suæ appulas, cum in hospitium publicè inuitassent, sacris etiam in puluinibus collocarent. Habet etiam Lex de desertoribus & proditoribus adversus eos, qui patriam oppressam neglexerint, cum eos, qui metu hostium languorè simulant, clypeum veabiiciunt, pari cum illis poena afficiendos esse statuat. Ad hoc itaque tamquam incendium publicum, omnes singulosque conclamare, cum hamis & falcibus concurrere, aquam conferre oportet. Non expectandus præfectus vigilum, si obdormiat; non præfectus vrbi, si cunctetur: certatim quisque aquam hauriat, rectum scandat, flammam arceat oportet. Si etenim, dum Capitolium furtim conscendunt Galli, consopiti sunt milites, dormiunt vigiles, muti sunt canes; anseres ipsi excubent, vigilent, ad arma conclament, oportet. Et illi quidem exauctorabuntur, infamia mulctabuntur, inque perpetuam rei memoriam suspendentur;

dentur; hi contrà, & in Capitolio perpetuò nutriuntur, & immortalì laude decorabuntur.

Hęc, dum tyrannis, vt loquuntur, est in Fieri, id est, dum Tyrannus molitur, machinatur, cuniculos agit. At certè si semel ita rerum potiatur, vt populus victus, sese iureiurando ei devinciat, respublica oppressa, suam in eum potestatem transferat, regnum in suarum legum mutationem ritè consentiat: tum sanè, quia tirulum, quem antea nullum habebat, adeptus est, nec ex facto tantum, sed iure possidere videtur, etsi Populus *ἡμῶν ἀνὸρ τῆς* *θυμῶ*, id iugum recepit; æquum tamen est, vt obtemperet, & Dei voluntati, qui regna de gente in gentem suo arbitrio transfert, placidè acquiescat. Alioquin nullum est regnum, cuius iurisdictio in dubium revocari non possit: id tamen, modò, qui prius sine titulo tyrannus erat, eum titulum adeptus, legitimè gubernet, & tyrannidem non exerceat. Itaque iure optimo restitit regis auspiciis populus Iudaicus Sennacheribo Assyriorū regi, Palestinam invadenti. At damnatur puniturque Sedechias rex, vnàque vniuersus Populus, qui post fidem ritè datam,

2. Reg. c. 24.

et 25.

Ierem. 37.

nulla iniuria laceſſitus, à Nabuchodonozore deficit. nimirum, vbi fides data eſt, non eſt ullus amplius pœnitentiæ locus; ac vt in præliis quidem quiſque, quantum viribus poteſt, eniri debet; vbi verò captiuus fidem dederit, præſtare tenerur: ita & contendat populus omni conatu, vt ſua iura retineat: at vbi ſeſe alieno iuri, non tam nolens, quàm non volens, ſubiecit, imperium victoris æquo animo pariatur. Sic Pompeius, Caro, Cicero, & cæteri, bonorum ciuium officio fungebantur, cùm arma aduerſus Cæſarem rempublicam evertentem arripuerunt, nec excuſari poſſint ij, quorum deſidiâ factum eſt, vt illorum conatus minus fœlicem exitum conſequerentur. Auguſtus ipſe cuidam Catonem conuitiis proſcindenti, reſpondiſſe legitur; bonum ciuem fuiſſe Catonem, qui præſentem rei publicæ ſtatum mutari noller, qui quidem abſque ſummo omnium discrimine mutari nequeat. Quin & Brutus, Caſſius, Caſca, & cæteri, qui, re adhuc flagrante, Cæſarem interfece-
runt, accuſari non poſſint. Itaque publico decreto ſtatux æneæ Athenis iſtis erectæ fuerunt, iuxta Harmodij & Ariſto-

ristogitonis statuas, cū Augustum & M. *Xiphilinus*
 Antonium cæso Cæsare fugerent. At cer- *in Augusto.*
 tē seditiosus fuerit Cinna, qui lege regia
 iam lata, qua populus suam in Augustum
 omnem potestatem contulerat, in eum
 conspirasse legitur. Consimiliter dum
 regnum Francorum Carlingi à Merouin-
 giis, aut Capetani à Carlingis ad se rapere
 conabantur, absque vlla seditionis culpa
 resistere licuit: ex quo publico consilio,
 Ordinūque authoritate translatum fuit
 regnum, non amplius licuit. Idem verò
 prorsus iuris est, si quæ fœmina regni Sali-
 ci gubernacula occupet, si quis merè ele-
 ctium regnum hæredibus asserat, quam-
 diu leges illæ publicæ, authoritatē Con-
 cilij vniuersi, id est eorum qui populum
 vniuersum repræsentant, abrogatæ non
 sunt. Nec verò spectare hīc oportet, v-
 tra factio maior sit, vtra potentior, v-
 tra clarior. Plures libidine, quàm ra-
 tione reguntur: itaque plures fermè ty-
 rannidi, quàm reipublicæ inserviunt.
 At Roma est, inquit Pompeius, vbi Se-
 natus. Senatus, vbi legum reveren-
 tia, libertatis amor, patriæ conseruan-
 dæ studium. Itaque etsi Romam Bremius
 occupare videtur; Roma interim Veilis est,

vbi Camillus, qui Romam vindiceret à seruitute. Veios itaque migrent Quirites oportet, eumque omni studio, omni conatu, omni industria adiuuent. Et si, inquam, Themistocles, relictis Athenis, in classem C C. triremium cum bonis omnibus sese recepit, non ideo quisquam ex illis ciuitate priuatus est. Quin potius, ut ille respondisse legitur: Ducentæ hæc triremes, sunt nobis vice ciuitatis totius Græciæ maximæ. quia ad defensionem eorum omnium, qui salutem publicam tueri volunt, comparatæ sunt. Non etenim vbi arca fuerit, ibi continuò ecclesia Dei erit: potest enim capi à Palestinis. Non, inquam, vbi aquilæ visentur, vbi legionum nomina audientur, ibi continuò Romanum exercitum esse consequitur. At omninò sanè, vbi qui patriam aduersus tyrannidē tueatur, qui seruitute oppressum populū ad pileum vocet, qui muliebre impotentiam coerceat, qui adulatorem ignauū principis ad omnem iniuriam abvrentes comprimat, qui ambitionem intra suos limites manere iubeat. Et hæc quidem de tyrannis absque titulo dicta sunt.

Ad eos verò, qui tyrannidem exercent, siue ij iure primum, siue vi imperium adepti

*Plutarch. in
Themist.*

depti sunt, quantum attinet, cautè admodum nobis examinandum est. Primùm sanè consideremus oportet, Principes omnes homines natos esse: propterea non minus à perturbatione rationem, quàm animam à corpore separari posse. Non est ergo, quòd non nisi perfectos Principes habere velimus; sed potius nobis optimè consultum putemus, si vel mediocres nati fuerimus. Itaque non, si quibusdam in rebus princeps modum non seruat; non, si rationi interdum non obtemperat; nō, si segnius vtilitatem publicam curet; non, si aut in iure dicundo minus diligens, aut in bello propulsando minus acer: continuò tyrannus erit. Equidem cùm non ut bobus, homo hominibus deus aliquis, sed homo eadem sorte natus præsint; ut superbus princeps fuerit, qui hominibus tamquàm bestiis abviri voluerit; ita iniquus populus, qui in principe deū, in lubrica ista natura diuinitatē quæsiverit. At certè si rempublicā cōsultò evertat, si iura proteruè pervertat, si nullā fidei, datę nullā conventionum, nullam iustitię, nullam pietatis curam habeat; si suorum ipse sit hostis, si denique eas artes, quas enumerauimus, aut omnes, aut præcipuas ineat; tum sanè

*Adversus
Tyrannos
exercitio
quātū iure
cōcedatur.*

fanè tyrānus, (etsi id nomen antè nō malè
sonabat) id est Dei hominūq; hostis, iudi-
cari poterit. Ergo nō de minus bono prin-
cipe, sed de pessimo; nō de minus prudē-
ti, sed de malitioso, & veteratore; non de
iuris imperito, sed de iuris cōtemptore; nō
de imbelli, sed de populi hoste regnīq; va-
statore agimus. Illū iuuare posset pruden-
tiā senatus, iuris cognitione prætor, belli
peritiā tribunus: hic optimatibus, senato-
ribus, ducibus belli vnā ceruicem optat,
quā vnico ictu amputare possit, nec vllos
magis odio prosequitur. Et ille quidem &
si iure tolli etiam posset, tolerari tamen vr-
cumque queat: hic cōtrā, quò diutius to-
leratur, eò intolerabilior evadit. Præterea,
vt principi nō, quod libet, licet, ita nec po-
pulo sæpe, qđ licet, expedit. Sæpe etenim
accidere potest, vt remediū, quod adhibe-
tur, ipso morbo deterius sit. Itaque omnia
prius, quā ferrū adhibere; omnia prius,
quā arma experiri, sapientem decet. Si
quid ergo per vim fraudēve, aduersus
temp. geri videant, qui Populū repræsen-
tāt, principē admoneant primū: nec ve-
rò expectēt, dū malū ingrauescat, & vires
acquirat. Est tyrānis febris hecticæ similis;
quæ primò facilis curatu, difficilis cogni-
tu;

tu; postea verò cognitu facilis, curatu in primis difficilis evadit. Itaq; principiis obstabūt, nec quidquam vel minimum prætermittent. Si verò pergat, nec sæpius admonitus resipiscat, sed eò tātum tendat, ut impunè quidvis patrare possit; tum sanè tyrannidis reus peractus est, & quæcunque adversus tyrannum seu iure, seu iusta vi licent, adversus eum adhiberi possunt. Est tyrannis nō modò crimen, sed omniū criminum caput, & quidā veluti aceruus. Tyrannus rempubl. subruit, ex vniuersis prædam agit, omnium vitæ insidiatur, omnibus fidem violat, omnē sacri iurisiurandi religionem contemnit. Itaque quovis latrone, prædone, homicida, sacrilego, tantò est sceleratior, quantò plures & vniuersos, quàm singulos offendere, grauius est. Quòd si censentur illi omnes infames, si capite plectuntur, si morte pœnas luunt; quis pœnas tam atroci crimine dignas cōminisci queat? Deinde probauimus, reges omnes regiam dignitatē à populo accipere; populum vniuersum rege potiorē & superiorem esse; regem regni, imperatorem imperij supremū tantum ministrum & actorem esse; populū verò, verè dominum existere. Sequitur ergo, tyrannum

num in populum, tanquam feudi domi-
 num, feloniam cōmittere, regni imperiūq;
 facram Maieſtatem lædere, rebellem eſſe
 ac propterea in eaſdem leges incidere, &
 longè grauioreſ pœnaſ mereri. Itaque
 ait Bartolus, poterit iſ deponi à ſuperiore
 vel ex lege Iulia de vi publica, iuſtiſſimè
 puniri. Superior verò, vniuerſuſ populuſ
 eſt, qui ve eum repræſentant, electoreſ, pa-
 latini, patricij, ordinum conuentuſ, & cæ-
 teri. Quòd ſi verò eò progreſſuſ fuerit, v-
 non abſque vi armata expelli poſſit; tum
 fanè licebit illiſ populuſ ad arma vocare
 exercituſ conſcribere, & tanquam aduer-
 ſuſ hoſtem patriæ rei; publicæ iudicatuſ
 vim, dolum, omnémque machinam expe-
 riri. Denique de eo eandem ſententiam
 quæ de Manlio Capitolino lata fuit, ferre
 licebit: Manliuſ fuiſti mihi, cū præcipi-
 teſ agereſ Senoneſ. Iam quia vnus factuſ
 eſ ex Senonibuſ, vnde eoſ depuliſti, tu i-
 pſe præcipitanduſ eſ. Non incident pro-
 pterea regni officiarij in crimē ſeditioniſ.
 In ſeditione enim duaſ omnino parteſ eſ-
 ſe neceſſe eſt; quæ cū de contradicitoriis
 plerūq; certent, vniuſ iuſtam, alteriuſ in-
 iuſtam cauſam eſſe conſequitur. Iuſta fanè
 erit, quæ leges defendet, quæ communem

*In tractat.
 de Tyrann.
 & in tract.
 de Regim
 civit.*

*Valerius
 lib. 6. c. 3.*

vtili-

utilitatem ruebitur, quæ regnum iis præ-
fertim authoribus cōservabit. Iniusta con-
trà, quæ leges violabit, legum violatores
defendet, patriæ everfores ruebitur. Iu-
sta, inquit Bartolus, quæ tyrannicum re-
gimen deponere volet: iniusta, quæ iustū.
Licita, quæ ad bonum publicum: illicita,
quæ ad priuatum tendet. Itaque, ait Tho-
mas, quia regnum tyrānicum, quod non
ordinatur ad bonum cōmune, sed ad pri-
uatum regentis, non est iustum; perturba-
tio istius regni non habet rationem sedi-
tionis. Non incident quoque in crimen
Maiestatis. Committitur hoc crimen in
legitimum principem. Legitimus verò
princeps, nil nisi lex animata est. Itaque
cū is, qui leges, quantum in se est, exa-
minat, eo nomine cenferi non possit: hi,
qui in ipsum arma capient, eo crimine nō
tenebuntur. Committitur & in rempub.
At quia illa demum ibi est, vbi legum au-
thoritas valet, non vbi priuata tyranni li-
bido rempub. absorbet, tyrannus eius cri-
minis reus erit, qui publicam maiestatem
lædit: vindices reipub. hi, qui tyrannum,
sua authoritate freti, éxque officio oppu-
gnabunt. Neque enim hoc casu singuli,
sed vniuersi, non, inquam, subditi, sed do-

Bartol. in
tract. de
Guelph. &
Gibell. arg.
l. 3. §. cū i-
gitur. D. de
vi et vi ar.
Thom. Aq.
sec. secun. q.
12. art. 11. in
fine.

l. 1. D. ad
leg. lul. ma-
iest.

Cic. Pa-
rad. 4.

mini ab actore suo rationem rei gestæ repetere videntur. Nihilo magis perfidi censebuntur. Est inter principem & populum vbique locorum mutua & reciproca obligatio. promittit ille, se iustum principem futurum: hic, si talis fuerit, se obsequuturum. Obligatur ergo populus principi, sub conditione: princeps, populo purè. Itaque si minus adimpletur conditio, solutus est populus, irritus contractus, obligatio ipso iure nulla. Perfidus ergo rex, si iniuste imperet; perfidus populus, si iuste imperanti non obtemperet. At omni perfidiæ crimine vacuus populus, si iniuste imperanti publicè renunciet, aut regnum retinere illegitimè cupienti, armis evincere conetur. Ergo licet regni officariis aut omnibus, aut saltem pluribus, tyrannum coercere. Nec verò modò licet, verùm ita quidem illis ex officio incumbit, vt, ni fecerint, nullo pacto excusari possint. Neque enim putent Electores, Palatini, Patricij, cæterique Optimates, eò tantùm creatos & institutos esse se, vt semel fortè in rege inaugurando sese antiquo more paludatos conspiciendos exhibeant, vt palliatam quandam fabulam ludant, vt Rolandi, Oliuarij, Renaldi,

*Lib. 60. D. de
reg. iur.*

di, cæterorúmque procerum personam eo die, quasi in scena induât, vt Arthuri mensam rotundam, quam vocant, specie quadam representent: cæterum, postquam dimissa est turba, & Calliopius, Vale, dixit: suis se partibus optimè functos arbitrentur. Non ista per iocum dicuntur, non ista perfunctoriè sunt, non sunt isthæc puerorum ludi, qui regem, vt est apud Horatiũ, per fabulam creant: quin potiùs sciât Optimates, vt in honoris, ita & in oneris partem se vocari, & rempub. commissam & commendatam esse regi quidem, vt supremo eius ac præcipuo tutori; ipsis verò, vt cõtutoribus. Itaque vt tutores (etiam honorarij) datì sunt, quasi obseruatores actus eius, qui tutelam præcipuè gerit, qui rationem ab eo assiduè exigant & sollicitè curent, qualiter conuersetur: ita & hi, vt obseruent regem, (qui, quantum ad providentiam pupillarem, tantum domini loco habetur) ne quid in populi detrimentum gerat. Item vt contutoribus imputatur, tutoris, qui gerit, factum, ni, cum deberent & possent, suspectum fecerint, remouendúmque; etiam curarint, nempe si cum iis administrationem non communicet, si nõ ex fide tutelam curámve geret, si do-

Vlp. l. 3. D. de adm. & peric. tut. et curat.

l. 27. D. eod.

l. 14. D. de administ. et peric. tut. l. 3. D. de suspect. tut. & cur.

lum admittet, si qd sordidè ager, vel perniciosè pupillo, si quid intercipient ex rebus pupillaribus, si pupillo inimicus esset: denique, si nimis ruiticus, segnis, imperitus, &c. ita & optimates ex principis factio tenebuntur, ni ipsius tyrannidè aut tollant, aut antevertant, aut segnitiè sua vigiliatìa & diligètia suppleat. Deniq; vt, quod tuncunque non facit tutor nomine pupilli, quod quivis paterfamilias idoneus faceret, non videtur defendi: vt verò melius defendatur, contutores prospicere tenentur; ita multò æquius, si non patremfamilias, sed hostem agat princeps, optimates in ipsum agere poterunt ac debebunt. cum sane nihilo minus ex ipsius facto, ac è proprio teneantur. Attendat optimates præterea, regem in administranda republ. primas partes tenere quidem; at ipsos secundas, tertias, suas quosque suo loco. Non ergo, si ille suas malè agat, hi sequentur; non, si republ. perdat, connivebunt. respublica enim iis non secus, quàm illi concredita est; & ita quidem, vt non modò ipsi per se suo officio bene fungantur, sed principem in officio suo contineant. Denique, vt rex utilitatem reipubl. curaturum se promittit; ita & illi. Non igitur,

si si-

l. 10. & 33.
D. de adm.
& peric. tutor.
& cur.

si fidē frangat, suo se propterea sacramen-
 to absolutos putabunt, non magis ac epi-
 scopi, si pontifex hæresim tueatur, aut Ec-
 clesiam perdat: imò eò magis implendo sa-
 cramento sese obligari putabunt, quò il-
 le magis fœdifragus fuerit. Itaque si collu-
 dunt, prævaricatorum; si conniunt, deser-
 torum & proditorum; si rempubl. à tyrannide non vindicant, tyrannorum nume-
 ro censentur. vt certè patroni, tutores, re-
 guli denique sunt, si quam tuendam susce-
 perunt, omnibus modis tueantur atq; de-
 fendāt. Hæc verò etsi satis per se firma, ex-
 emplis etiam demonstrari possunt. Reges
 Chananæi, qui populum Israeliticum du- *Iudic. 5.*
 ra seruitute, tum corporali, tum spirita-
 li, premebant, (commeatu enim & armis
 interdicebant) tyranni verè erant, exerci-
 tio, inquam, non absque titulo. Eglon e-
 nim & Iabin vicesimum ferè annum pla-
 cidè imperabant. Deus verò excitat ex-
 tra ordinem Ahod, qui Eglonem ex insi-
 diis confodiat; & Deborah, quæ exer-
 citum Iabini profliget, atque eo ministe-
 rio populum ex tyrannide liberat. Non
 id quidem, quòd magistratibus ordina-
 riis, principibus tribuum & cæteris mi-
 nus liceret: quin potius Debora suam

*August. lib.
17. de Civi-
t. Dei, c. 22.*

ipsis ignauiam desidiámq; impropere, & nonnullos etiam propterea execratur. At certè Deus, populi sui misertus, desidiæ ordinariórũ extra ordinem succurrebat. Roboamus Salomonis filius, tributis non necessariis populum leuare recusat, rogatus ab vniuerso populo in Comitiiis insolescit, adulatorúmque consilio fretus, grauiora etiam arrogãter minatur. Ambigit nemo, quin iuxta fœdus inter regem & populum primùm initum, eam superbiam coercere optimates potuerint. At in eo peccatum fuit, quòd per secessionem fecerunt, quæ in Comitiiis faciunda erant: deinde, quòd à stirpe Iuda (cui regnum Deus ipse attribuerat) ad aliam sceptrum transtulerunt. Denique, quòd sæpe aliàs accidit, rem iustam & legitimam, iniustè fecerunt. In aliis imperiis crebra eiusmodi rei exempla occurrunt.

Linus li. 1. Brutus tribunus celerum, & Lucretius præfectus vrbi, aduersus Tarquinium Superbum populum convocat: cuius auctoritate regno pellitur. Quin & bonæ eius in fiscum rediguntur. Vnde satis apparet, ipsum, si præhensus fuisset, secundum leges publicas proculdubio multatum fuisse. Causæ verò narrantur hæ: quòd morem

rem tolleret, quo rex senatum consulere
 solebat, quòd suo arbitrio pacem bellum-
 que faceret, quòd fœdera, inconsulto po-
 pulo, senatúque, iniret: quòd leges, qua-
 rum custos esse debuerat, violaret; in sum-
 ma; quòd fœdus inter reges & quirites, vñ
 antè retulimus, sancitum negligeret. Ad
 imperatores verò Romanos quod atti-
 net, palam est sentétia, qua senatus Roma-
 nus Neronem hostem reipubl. iudicauit,
 vncóque & gemoniis damnauit: qua Vi-
 tellium ignominiosè mutilatum, pérque
 vrbem tractum, morte mulctauit: qua Ma-
 ximinum imperio spoliauit, Maximum
 verò & Albinum in eius locum suffecit.
 Quibus aliæ ex probatissimis authoribus
 adiungi possint. Nec verò Traianus im-
 perator se aut legibus solutum putauit,
 aut pœnæ tyrannorum exemptum vo-
 luit; qui cùm gladium præfecto Præto-
 rij traderet: Si bene, inquit, imperaue-
 ro, pro me: sin contrà, adversus me strin-
 gito. Consimiliter Franci, Concilij pu-
 blici authoritate, curantibus regni offi-
 ciariis, Childericum primum, Sigeber-
 tum, Theodoricum, Childericum ter-
 tium regno expulerunt, aliósque ac non-
 nullos ex alia stirpe, propter tyrannidem

iis suffecerunt. Quin & propter desidiam, ignauiam, insaniam, quâ aut exterorū iniuriis, aut adulatorū mulierūmve libidini & impotentiae patebant, quosdam exauctorarūt, & quasi Phaethonti habenas abstulerūt, ne vniuersi incendio eodem conflagrarent: vt Theodoricum Ebroini causa, Dagobertum Plestrudis & Theobaldi ipsius amasij, & cæteros: nempe perinde esse rati, siue mulier, siue mulierosus princeps imperaret; seu tyrannus, seu sub ignauo principe tyrānuli dominarentur; seu denique ipse diabolus esset, seu à diabolo ipso possideretur. Non ita verò pridem Ludouicum vndecimum, principem imperiosissimum, curatores triginta sex recipere coegerunt, quorum cōsilio rempublicam gerere teneretur. Ecquid autem aliàs iuris habuerint aut Carlingi Merovingiorum loco in regnum cooptati, aut qui hodie obtinent, Capetani, Carlingis publici Concilij decreto antelati; nisi populo vniuerso, per regni Cōcilium, quod trium Ordinum conventum vocant, quasi per epitomen repræsentato, & illos exauctorare, & hos auctoritate sua in solio stabilire iure licuit? Eodem pacto Imperio Germanico spoliatos legimus Adolphum

phum CIO. CC. XCVI. quòd pecunia corruptus, bellū fecisset regi Galliæ in gratiā Angli: Vuenceslaum CIO. CCCC. et si non tam mali principes hi dici possunt, quàm minus boni. Anglico Eduardus secundus ob tyrannidem in subditos, præsertim Proceres, quos inaudita causa de medio tollebat, Elisabetha vxore ipsius Parlamentum regni aduersus eundem implorâte: quo authore, regno indignus iudicatus est. Nō ita pridē Christiernus Danico, Ericus Suedico, Maria regina Scotico nuper admodū. quod & in Polonico, Hungarico, Hispanico, Lusitanico, Bohemico, & cæteris, factitatum, historiæ fide dignæ testatur. Quid verò de Pontifice ipso? Cardinales, inquiunt, quia ipsum elegerunt, aut si minus officio suo fungantur, patriarchæ, q̄ primates sunt post Cardinales, possunt, eo inuito, certis de causis convocare Concilium, in eoque pontificem iudicare. Si per notorium delictum scandalizer vniuersam Ecclesiā: si sit incorrigibilis: si reformatio necessaria sit tam in capite, quàm in membris; si contra iuramentum præstitum Concilium congregare nolit, & cætera. Ex facto verò multos Concilij auctoritate destitutos fuisse legimus. Sin

*Froissar. lib.
1. cap. 1. &
seq.*

*Ant. de But.
Cōsil. quod
positum est
inter Cōsil.
Paul. de Ca
stro, vol. an-
tiq. nu 412.
incip viso
puncto.*

Mart. Lau-
dens. in tra-
ctat. de Car-
din. in 2. q.

35.

Philip. Dec.
in quodā cō-

filio, cuius
verba fue-

runt Andr.
Barb in d.

consil. 1. lib.
1. c. 6.

Bald. in c. o-
lim. col. pen.

de rescri. in
Decretal.

Bonifacius
8. de maior.

& obed.

verò, ait Baldus, pervicaciter abvtrantur; primò vtendum est verbis; secundò, herbis, id est medicamentis; postremò, lapidibus. & vbi non sufficit virtutis ingeniũ, valere debet armorum præsidium. Quòd si verò & doctorum ferè omnium calculis, & Conciliorum decretis, & ipsis rebus gestis probatur, Concilium Papam deponere, vt loquuntur, iure posse, qui tamen regem sese regum iactat; & quantò sol luna, tantò imperatore superiorem venditat; quin etiam regum imperatorũque pro libito exauctorãdorum authoritatem sibi arrogat: quis tandem dubitare queat, quin à Concilio publico cuiusque regni, non modò tyrannus, sed rex regno, ob suam insaniam perniciosus, deponi & exauctorari possit?

Age verò, in naui ista nostra politica vino sese ingurgitet nauarchus, adiutores plærique aut dormiant, aut muris poculis inebriati imminentem scopulum ludibundi intueãtur. Nauis interea aut eum cursum nò teneat, quem domino expedit, aut breuì pessum itura videatur: quid hìc suppræfecto alicui, vigili & sollicito, faciendum putes? An dormientibus aurè vellicabit, aut latus fodiet tātum: interim verò, ne

rò, ne quid ceterorum iniussu facere videatur, periclitanti naui opem atque operam suam nò præstabit? Quæ verò isthæc aut amentia, aut potius impietas fuerit? Agedū, inquā, cū tyrannis, vt ait Plato, quædam phrenesis sit et ebrietas, princeps repub. funditus evertat, optimates pleriq; colludant, conuiueant; saltē consopiti sint: Populus, qui reipub. dominus est, ministrorū illorū aut fraude, aut negligentia, quæ ipsa culpa est, in summas angustias reductus sit: existat interea optimatum vnus aliquis, qui grassantem tyrānidem animadvertat, & ex animo excreetur; quid huic aduersus illam faciendū putes? An collegas sui tantū officij admonebit, qui ipsi, quantum possunt, officiunt? At, præterquā quòd admonere periculosum est, & eo rerum statu crimen capitale censetur; perinde faciat, ac qui, cæteris auxiliis spretis, proiectis armis, apud prædones, in media sylua leges citet, & orationem de iustitia habeat: id verò verè est, quod dicitur, cum ratione insanire. Quid ergo? ad gemitus populi obsurdescet, ad latronum ingressum obmutescet, & oscitabit denique, & manus in sinum inferet? At si vel in caligatum, qui metu hostium languorem simularit,

Plato lib. 8.
& 9. de Repub.

l. 3. & l. omne delictū.
§. ult. D. de re milit.

proditoris pœnam iura statuunt : quam tandem in eum statuemus, qui, quos ipse tuendos suscepit, siue malitiâ, siue ignauâ prodit? Quin potius, nautis per ce-leusma, quæ opus erit, imperabit: curabit, ne quid respub. detrimenti capiat, ac rege etiam inuito & renitente, regnum, per quod ipse rex existit, conseruabit, regémque ipsum, tanquam phreneticum, aut furiosum, ni aliàs possit, pedibus manibúsque reuinctum, sanabit. Enimverò non est, vt diximus, vniuersa regni administratio regi à populo commendata: vt nec pontifici vniuersalis ecclesiæ episcopatus, (aiunt) sed optimatum cuique pro virili. At certè, quia concordia ab ciuitate proficiscitur; ne qua inter Pares æmulatio esset, rex institutus fuit, qui supremum in administratione reipub. locum teneret. Iurât rex, se salutem regni curaturum, idem optimates etiâ singuli per se. Num ergo, si rex, aut optimates plerique, neglecta fide, rempublicam aut perdant, aut periclitantem deserant, debebunt propterea ceteri rempubl. deserere, aut saltem minus defendere tenebûntur, quasi suo iureiurando soluti sint? Quin potius tum maximè fidem suam præstare debent, cùm ceteri negli-

*C. nullus. in
Carthagin.
Concil. Do-
flores Pon-
tificij.*

negligūt; præsertim cū in eum finē præcipuè, tanquam ephōri, sint instituti: ac quidque demum iustum censeatur, cū finem suum attingit. Num etenim si plures eandem rem promiserūt, vnius periurio alterius obligatio perimitur? num, si plures eiusdē summæ correi sūt, vnius fraude ceteri liberantur? Num, si plures contutores pupillum malè tuentur, ibi illorū culpa vnus aliquis vir bonus tutelę onere minùs tenetur? Quin potius, nec illi perfidię infamiã vitare possunt, nī quatenus in iis positū est, fidei suę satis facere conentur: nec hi sese periculo tutelę malè gestę iudiciq; eximere, nī cæteros cõtutores suspectos agāt. cū sanè nō modò tutor vnicus ceteros suspectos agere possit, et remouēdos

*l. 3. D. de ad-
ministr. et pe-
ric tutor. &
cur. l. 3. D. de
suspect. tut.
& curat.*

curare; verū etiā remotus. Itaq;, qui regno imperiõve vniuerso opem operamq; suam promiserint, quales Comes stabuli, Mareschalli, Patricij & cæteri, aut qui ali- cui speciatim regioni, vrbive, quæ regni partem faciat; quales Duces, Marchiones, Comites, Maiores & cæteri, vniuersæ rei publicæ, eive reipublicæ parti, quam ipsis secundū regem populus cōmiserit, tyrannide oppressæ succurrere tenentur. Et illi quidem vniuersum regnū à tyrānide vin-

*Machab. li.
2. c. 3. v. 45.*

dicare debent, si possunt: hi, tanquã tuto-
res per regiones dati, eam regni partẽ, cu-
ius tutelam susceperunt. Illi, inquã, tyran-
num coercere, hi à suis finibus arcere te-
nentur. Itaque Mathathias, tãquam opti-
matum vnus, cæteris partim conniuenti-
bus, partim colludentibus, Antiocho re-
gnum Iudæorum tyrannicè opprimente,
populum arma capturis his verbis affatur:
Restauremus statũ populi nostri, dimice-
mus pro populo nostro, próq; sanctis lo-
cis nostris. Vnde nõ pro religione tãtũ,
sed pro patria, pro focus, inquam, non mi-
nus iustè, quàm pro aris armã capi posse
adversus tyrannum, (qualis is erat) liqui-
dò apparet. Neq; enim repræhenduntur à
quoquã, quòd regnum evicerint, sed quòd
regiam dignitatem, quæ ad tribum Iudæ
pertinebat, sibi vendicarint. Exempla eó-
dem pertinẽtia apud historiographos plu-
rima occurrũt. Arbactus Mediæ præfectus,
Sardanapalum inter mulieres pensã distri-
buentẽ, opesq; regias in meretrices pro-
fundentem, interficit. Vindex Galliarũ, &
Galba Hispaniarũ Præsides, à Nerone, cõ-
niutente ad ipsius tyrannidem senatu, defi-
ciũt, vnãq; Gallia & Hispania vniuersa. Ve-
rũ insigne est in primis Laconicũ illud
iudi-

*Iustin. lib. 1.
Diodor. lib.
2. cap. 37.*

iudiciū; quod sanè ab eo senatu profectū, apud omnes gētes in rem iudicatā trāsire debet. Cum Lacedæmonij Byzantiū possiderēt, Clearchū ducē exercitus vrbi præfecerāt, qui frumentū ciuibus ereptū, militibus extraneis distribuebat. Interea verò familię ciuiū fame peribant. Anaxilaus igitur, vnus ex vrbis optimatibus, ea tyrānide cōmotus, de patriæ deditione cū Alcibiade paciscitur. atq; is paulo pōst in urbem recipitur. Anaxilaus Spartę accusatus ob Byzātij deditionem, causam suam ipse agit. Spartani hominē absoluerūt: qā, aiūt, bella gerēda sunt cum hostibus, non cū rerum naturā. Nil verò magis naturæ repugnat, quā si, qui urbem aliquā defendere tenētur, ipsis hostibus iniquiores sint. Hæc Lacedæmonij, qui iustè regnabant, quibus vix vlli boni reges non assentiantur. Nimirū, qui bene regnare cupiūt, quid in tyrannos statuatur, quid optimates iure possint, quid populus ipse, sūs q; dēq; habent. Verū vlteriū adhuc nobis p̄grediendū est.

Tenetur nautarum quilibet, si nauarchi culpā negligētiāve nauis periclitetur, manū admouere. Tenetur Optimatū quilibet, si principis collegarūmq; scelere vel defidia respub. pereat, laborāti succurrere, regnū deniq; in solidum, eiūsve saltē eam

partem, quæ sibi commissa fuerit, à tyrannide vindicare. An verò tandem mediastino cuilibet idem licebit? An Herdonio Sabino, Euno Suriano, Spartaco gladiatorum fortè, an, inquã, priuato cuilibet seruos ad pileum vocare, subditos ad arma ciere, manus denique cum principe conferere, si tyrannis vrgeat, licebit? Minimè verò. Singulis seu priuatis respub. commissa non est: imò ipsi optimatum & magistratuum curæ, non secus ac pupilli, cõmissi sunt. Itaque non tenentur rempubl. tueri, qui seipsos tueri non possint. Singulis neque à Deo, neque à populo gladius cõcessus est. Itaque si gladium iniussu stringat, seditionis sunt, quamvis causa iusta videatur. Singuli denique principem non constituunt, sed vniuersi. Itaque vniuersorum, eorum, inquã, qui vniuersos in regno, regione, vrbe quæ regni partem faciat, repræsentant, iussu expectent oportet, aut vnius saltem ex illis, antequam aduersus principem quidquam moliantur. Etenim vt pupillus, non nisi tutore authore, actionem intendere potest, etsi pupillus quidè dominus verè est; tutor verò pro domino tantum, quantum ad pupillarem providentiam attinet, habetur: ita neque populus,

nisi

l. 1. C. de seditionis.

l. 8. l. 9. D. de aucto. & constituto. et cur.

nisi iis authoribus, in quos suam authorita-
tem & potestatem transtulit, siue ij ordina-
rij magistratus sint, siue in conventu pu-
blico extra ordinem creati; quos, inquã,
gladio suo in eam rem accinxit, quibus se
regendum curandumque tradidit: qui de-
nique, non secus ac prætor ille Romæ, qui
inter seruos & dominos ius dicebat, eo lo-
co verè constituti sunt, vt si quælis inter
regē & subditos oboriatur, iudices & vin-
dices se præstent, ne ipsi subditi in sua ipso-
rum causâ sententiam pronuncient. Itaq;
si vestigalia & tributa iniqua imperari, si
quæ contra pacta in ve fraudem fieri vide-
antur, nec tamē optimatū vllus reclamer,
aut repugnet, conquiescendum sibi putet,
ac cogitent, optimos medicos morbū vt
antevertant, aut tollant, venę sectionē, hu-
morum evacuationē, scarificationem sepe
imperare. Ita enim rerum natura compa-
ratum esse, vt vix vllum malum absque al-
tero curari, vix quicquā boni absq; impro-
bo labore acquiti possit. Habēt exemplū
populi Israelitici sub Salomone, qui tribu-
ta, quæ ad templū extruendū, regnūque
muniendū grauissima imperabātur, nō re-
cusauit; quia publico cōsilio, ad Dei gloriā
reique publ. decus & ornamentū ea impe-

Seneca lib.
1. de Benef.

Iob 34. v. 30

rari iudicabat. Habēt & Christi Seruatoris nostri, qui etsi Rex ipse regū erat, qā tñ priuatā personā tū sustinebat, tributū libēter p̄soluit. Si manifestæ tyrānidi faueāt optimates ipsi, aut saltē nō repugnēt; recordēt, p̄pter peccata populi, Deo permittente, regnare hypocritas. qui, nī se ad Deū ipsi ex corde cōvertāt, nullis machinis everti possint. Itaq; nō pedibus, nō manibus, sed genib. flexis opus esse. Deniq;, malos principes ferāt, meliores optent, & nō sectus ac grandinē, illuuiiones, tēpestātes, cæterāsq; naturales calamitates, tyrānidē illam sibi æquo animo ferendā, aut sedes mutandas putent. Si Dauid in montes sese recipit, & Sauli tyrāno parcit; qā nō erat ex optimatibus populi: Christus, qā regnū ipsius nō erat de hoc mūdo, in Ægyptū fugit, seseq; tyrānidi subducit: Paulus, quia singulorū Christianorū, nō magistratuū, officiū describit, vel Neroni ipsi obediendū esse docet. At si optimates oēs, aut plæriq;, aut vnus saltē aliquis manifestā tyrānidē coercere, aut magistratus ab ea regni parte, quæ sibi cōmissa fuerit, arcere conetur, & ita qdē, vt is sit, q̄ eius expellēdē prætēxtu aliā nō inuehat; tū sanè, tanquā agmine facto, certatim ad delectū cōcurrāt, obnixè pedibus

bus manibúsq; opé ferát, ac táquá Deus ipse cælitus signū pugnae adversus tyrānos dederit, répub. regnūq; à tyrānide vindicare conétur. Etenim vt populū per tyrānos, ita & tyrannos per populū punit & castigat Deus: ratūq; perpetuò est, quod Syrachus dicit, Regna trāsferri de gente in gentem, propter iniquitates, iniurias & scelera principū: omnē verò tyrānidē parū diurnā existere. Sic Centuriones & milites, Ioiadē summi sacerdotis iussa alacriter exequūtur in vindicanda Athaliæ reginē tyrānide. Sic pij oēs ex Israele, ad Machabeos sese recipiunt, partim vt verū Dei cultū, partim vt rempub. adversus impios & iniquos conatus Antiochi tueātur: Deus verò iustis eorū conatibus fauet, & prosperum exitū largitur. Quid veró? An nō etiā aliquando ex ipsis priuatis vindicē tyrānidis aliquē De9 excitare potest? An nō idē ipse, qui tyrānos è plebē, nullo titulo, nullo prætextu fretos, puniendo populo excitat, liberatores etiā vel ex ima plebē excitare poterit? An nō idē, qui Iabino, qui Egloni populū mancipauit, p̄ Ehodē, Baracū, Deborahā, eūdē ab optimatib. dereliētū liberavit, & quasi manumisit? Quid ergo iam obstat, dices, qn idē De9, q nobis tyrānos hoc

Ecclesi. 10.

1. Machab. 3. v. 43. &c.

tempore immisit, tyrannorū ultores etiam extra ordinem mittat? Cur, si Achab sæuit in viros bonos, si Iezabel Nabotho falsos testes subornat, non erit & Iehu, qui familiam Achabi delet, qui sanguinem Nabothi vindicet, qui Iezabelē canibus lacerandam proiciat? Certè, quod antea respondendi, vt iustitię, ita neq; misericordię diuinę, vlllo tempore quidquā decedit. At verò, cū evidētia illa signa, quibus extraordinariā illorū heroū vocationē Deus confirmare solebat, nobis hoc sēculo vt plurimū desint, videat populus, ne, dum sicco pede, duce aliquo impostore, mare transfretare cupit, in gurgitem, quod Iudæis accidisse aliquando legimus, præceps ruat: ne, dum vindicē tyrannidi quærit, sequatur fortē aliquem, qui, eo tyranno expulso, tyrannidem ipsam ad se transferat: ne denique, dū reipub. merere gestit, priuatæ alicuius libidini militet: itaq; quod multis rebus præsertim Italicis accidit, dū præsens malū arcere conatur, longè grauis accersat.

In summa, vt hunc tandem tractatū cōcludamus, principes eliguntur à Deo, constituti à populo. Vt singuli principe inferiores sunt; ita vniuersi, & qui vniuersos repræsentant, regni officarii, principe superi-

periores sunt. In cōstituendo principe intervenit fœdus inter ipsum & populum, tacitum, expressum, naturale, vel etiam civile, vt bene imperanti bene pareatur, vt reipub. inseruienti omnes inseruiant, vt legibus obtemperanti omnes obsequantur: & cætera. Huius verò fœderis seu pacti, regni officarij vindices & custodes sunt. Qui hoc pactū perfidē & pervicaciter violat, is verè exercitio tyrannus est. Itaque regni officarij ipsum & secundum leges iudicare, & renitentem vi coercere, si aliàs non possunt, ex officio tenentur. Hi duorum generum sunt. Qui regni vniuersi tutelam susceperunt, quales Comes stabuli, Mareschalli, Patricij, Palatini & ceteri, singuli per se, cæteris conniuentibus aut colludentibus, tyrannum coercere debent: qui alicuius partis, regionisve, quales duces, marchiones, comites, consules, maiores, tyrānidem tyrannūq; ab ea regione vrbeve arcere iure suo possunt. Porro singuli sive priuati aduersus tyrannos exercitio, gladium non stringent; quia non à singulis, sed ab vniuersis constituti sunt. At aduersus eos, qui absque titulo sese intrudunt, quia nulla pactio intercessit, promiscuè admittuntur. Quo in genere cēse-

ri possunt ij, qui ignauia desidiave legiti-
mi principis abutentes, tyrannidem in i-
psius subditos exercent. Et hæc hætenus :
quibus ex secunda quæstione, quæ fortè
desunt, adiungi possunt.

Q V A R T A Q V A E - S T I O.

*A N I V R E P O S S I N T, A V T
debeant Vicini Principes auxilium ferre alio-
rum Principum subditis, religionis puræ
causa afflictis, aut manifesta ty-
rannide oppressis?*



Vccedit iam alia quæstio, in
qua certè definienda, cōscien-
tia magis, quàm sciētia opus
est, quæq; si charitas hoc sæcu-
lo locū suū obtineret, planè
otiosa esset. At quia, vt nunc sunt mores,
charitate ipsa nil quidquā est inter homi-
nes aut carius aut rarius; videtur etiā à no-
bis breuiter tractanda. Tyrāni, tum anima-
rū, tū corporū, tū ecclesię, tum reipublicę
regnive, coërceri, expelli, & puniri per po-
pulū possunt. Vtrūq; iā rationib. evicimus.
Verū, quia vel ea fraus tyrānorū, vel ea sub-
dito-

ditorū simplicitas plærūq; est, vt vix antè
cognoscātur illi, quā rapuerint; aut hi de
sua salute cogitent, quā fermè perierint, in
eāsq; angustias redacti, hi, à quibus suis vi-
ribus emergere nō possunt, alienas implo-
rare cogūtur: quæritur, vtrū iis religionis,
aut reipub. regni Christi, aut regni sui cau-
sam tuētibus, principes Christiani auxiliū
ferre iure possint? Et multi quidē, cū affli-
ctis opē ferendo suas se opes aucturos spe-
rarunt, protinus licere iudicarūt. Sic enim
Romani, Alexāder, Magn9 & ceteri multi,
tyrānorū coercendorū prætēxtu, pomœria
sæpe sua protulerunt. Nec ita pridē vidi-
mus Henricū II. Franciæ regē, bellū intu-
lisse Carolo V. Principū Imperij, & quidē
Protestātiū liberādorū defendēdorūq; prę-
textu: vt etiā Henricū VIII. Anglię regem,
Protestātibus Germanię opē ferre paratū,
vt Carolo V. negotiū facefferet. At si aut
periculi aliquid inde metuat, aut lucri mi-
nus sperari possit, tū sanè plērosq; princi-
pes, liceat, nec ne, disputantes audias. Et
vt illi pietatis prætextu, aut ambitionem,
aut quæstū tegebāt; sic hi desidię suæ iusti-
tiā obrédūt, cū sanè nec illos verè hortaret
pietas, quæ aliena tm̄ quærit, nec hos iusti-
tia dehortati debeat, q̄ tota foras spectat,

& quasi proiecta est. Ergo, vtrisque posthabitis, in religionis primum causa quid vera pietas, quidque iustitia suadeant, videamus. Primum ratum sit, Vnicam esse ecclesiam, cuius caput Christus, cuiusque ita membra inter se coherent consentiuntque, ut nullum ex illis vel minimum, vim lésionemve pati possit, quin cetera ledantur & dolorem percipiant, ut vniuersa Scriptura docet. Propterea comparatur Ecclesia corpori. Corpus verò sæpe non brachij modo, aut cruris, sed minimi etiam digiti lésione afficitur, aut vulnere perit. Frustra itaque iactet aliquis, huius sibi corporis salutem cordi esse, qui, quod totum tueri potest, membratim dilaniari & discerpi patitur. Comparatur ædificio. Ædificium verò, quamcunque in partem cuniculi agantur, totum sæpe corrui; quamcunque contignationem flamma invadat, in vniuersum periclitatur. Ridiculus itaque fuerit, qui fortè quòd in hypogeo habitet, flammam à tecto arcere cunctetur. Male sanus, qui cuniculos contrariis eludere nolit; quòd in hunc, non in illum parietem admoveantur. Comparatur & naui. Navis verò tota simul periclitatur, tota simul perit. Itaque equè ruti sunt, qui in prora, ac qui

in

in puppi; qui in carina, ac qui in transtris; si tempestas sæuiat. cū certè vel vulgato proverbio, qui in eodem periculo versantur, in eadem naui esse dicantur. His positis, certè qui eius dolore, incendio, iactatione non commouetur, ex eo corpore nō est, in familia Christi non censetur, locum in Arca nullū habet. Qui verò vel tantillū cōmouetur, nihilo magis dubitare debet, an ecclesię membris vexatis opē ferre debeat; quā, an sibi ipsi, an se ipsum iuuare, cū omnes in ecclesia vnū simus. Quin potius quisq; in suo munere suā iis opē operamque pręstare tenetur: & eo vtique maiorem, quo ampliores à Deo opes, nec tam possidendas, quā dispensandas accepit.

Hęc Ecclesia vt vnica est, ita etiam singulis Principibus Christianis in vniuersum & in solidum commendata atque commissa est. Quia enim vni alicui vniuersam committere, lubricum erat; singulis verò singulas eius partes, ab eius vnitate planè alienum: vniuersam singulis, singulas eius partes vniuersis cōmisit Deus. Nec verò vt propugnent eam tantū, verū etiam, vt, quantū possint, propagandam curent. Itaque si vnā eius partem, Germanicā fortè, aut Anglicam, princeps

regionis illius curet, alteram verò oppressam, si opem ferre possit, deserat & negligat, Ecclesiâ deseruisse censeretur, cum sanè sponsa Christi vnica sit, quâ, ne vsquâ violeretur, corrumpaturve, omnibus viribus protegere ac tueri debeat. Huius vniuersæ instaurationē vt priuati quique genibus flexis, ita magistratus, pedibus, manibus, totis, inquam, viribus promouere tenentur. Neque enim alia est ecclesia Ephesina, alia Colossensis, & ceteræ; sed singulæ illæ vniuersæ ecclesiæ partes sunt: vniuersa verò, regnū Christi est, qđ omnes priuati optare debēt; reges verò, principes, magistratus, amplificare, dilatare, propugnare & pparare vbiq; & aduersus quoscunq; tenetur. Propterea apud Iudæos vnicū tēplū erat, à Salomone extructū, qđ vnitatē ecclesiæ repræsentabat. Ridiculus verò & plectendus foret edituus, qui partē tantū aliquā sartā testā curaret, cæteras cōplui pateretur. Consimiliter reges Christiani omnes, cum inaugurantur, gladiū tuēdę nominatim catholicæ seu vniuersę ecclesię accipiunt. quo in manū accepto, omnes plagas Orbis designant, inq; orientem, occasum, meridiē, septétriones eum vibrant, ne vlla eius pars excepta censeatur. Cum verò ec-

clesiæ

clesiæ protectionē eo ritu suscipiunt, verā
proculdubio intelligunt, non falsam. Ita-
que ei, quam veram & puram esse profi-
tentur, in integrum restituendæ operam
suam præstare debent. Ita verò à piis prin-
cipibus obseruatum fuisse, exempla doce-
re possunt. Tempore Ezechię regis Iuda,
iam pridem mancipatum erat regnū Israel
regi Assyriorum, nimirū inde ab Osea re-
ge. Itaque si ea Ecclesia Dei tantum, quæ
in regno Iuda erat, non etiam vniuersa, E-
zechię commissa fuisset; si, inquam, eodē
modo custodiendi fuissent limites agro-
rum in ecclesia defendenda, ac in tributo
fortè imperando; Ezechias, proculdubio,
ea præsertim tempestate, qua Assyrij orbis
imperio potiebantur, sese continuisset. Ac
videmus, eū inuitasse per veredarios vni-
uersum Israelem, subditos, inquam, regis
Assyrij, ad Pascha celebrandum in Ieru-
salem: quin & pios in Israele, in diruendis
excelsis suis, in dirionibus nimirum E-
phraim & Manasse & cæteris, quæ As-
syriis parebant, adiuuisse. Sic etiam
legimus Iosiam regem, in primis pium,
non regnum suum modò, verum & I-
sraeliticum, regi tum Assyriorum pla-
nè addictum, cultu idolorum repurgasse.

2. Chro. c. 31

2. Reg. c. 22

2. Chro. 34

v. 6. & 35

Nimirum vbi Dei gloria, vbi Christi regnum agitur, nulli limites, nulli fines, nulli cancelli, piorum principum zelum arcerere debet. Sin vis fortè maior immineat, recordentur horum exemplo, qui verè Dominum timent, neminem metuere posse. Hæc piorum principum exempla, ex quibus ecclesia, quæ prius Palæstina circūscribebatur, per vniuersum orbem diffusa fuit. Christiani principes multi insequuti sunt. Erant Constantinus & Licinius imperatores ambo: ille Orientis, hic Occidentis. Erant & collegæ pari potestate præditi. Notum verò est, quod vulgo dicitur; Parum in parem non habere imperium. Nichilo minus tamen Constantinus Liciniū Christianos, in iisque nobiles plerosque, religionis siue causâ, siue prætextu, relegātem, divexantem, contrucidantem, bello petit, religionis liberum cultum Christianis vi impetrat: fidem denique frangentē, & ad pristinam sæuitiā revertentē Thessalonicae morte mulctari iubet. Constantinus, inquam, ille Magnus, cuius vsque adeo pietas ab omnibus illius sæculi Theologis celebratur, vt de eo quidam dictum velint, quod est apud Esaiam Prophetam: Reges Ecclesiæ nutricios & pastores futuros.

turos. Eo mortuo, diuisum fuit Romanū imperiū inter filios, æquo iure, nulla cuiquā adiuncta prærogatiua: ex his Constās. Orthodoxos, Constantius natu maior Artianos fouebat. Et hic quidē Athanasium Arrianorum hostem, Alexandria expulserat. Certē, si limitum vlla ratio haberi debuit, inter fratres debuit. Interim tamē minatur ille fratri, ni Athanasium restituat, vi facere paratus, ni quamprimū eum hic in integrum restituisset. Quod si verò vnus episcopi restituendi causa hæc facere non dubitauit: an non multò æquius, cum pars populi aliquanta opprimitur, cum auxilium implorat, Optimatibusque authoribus religionem suam tueri cupit? Sic & Theodosius, Attico episcopo suadente, aduersus Chosroēm Persarum regem bellū suscepit, vt Christianis religionis causa vexatis succurreret, etsi ij priuati verè erāt. Quod sanè iustissimi illi principes, qui tot leges sanxerunt, qui que tantam iuris curā habuerunt, minimè fecissent, si eo facto alienos fines, & iura gentium violari iudicassent. Quorsum verò tot expeditiones principum Christianorum in Syriam aduersus Saracenos, quorsum toties imperatæ decimæ illæ Saladinides, quorsum tot

*Sozom. lib.
7. c. 18.*

bella socialia adversus Turcas, tot adversus eosdem indictæ cruciatæ, si quibusvis Christianis principibus, etiam remotissimis, ecclesiâ Dei tyrânide, Christianos captivos servitutis iugo liberare non licuit? Quibus verò argumētis impellebantur ad id bellū, quibus rationibus vrgebātur? nisi, quod ecclesia vna esset, quod Christus omnes omnino ad delectū vndiquaq; vocaret? quod communia pericula cōmūibus armis depellēda essent? quæ omnia pariter huic nostræ causæ planè cōveniunt. Quod si verò licuit illis adversus Mahometem, nec modò licuit, verū vt alacribus præmium, ita & ignavis & cunctatoribus pœna statuta fuit: cur non & adversus Christi hostē? Si, inquā, in Græcos Troiā nostrā obfidentes; cur nō & in Sinonē incendiariū? Deniq;, si Christianos servitute corporea (neminē enim cogunt Turcæ) liberare piū fuit; an nō multò magis miserorū animas manumittere, inq; libertatē restituere? Et hæc quidem tot piorū principū exempla, legis instar esse possunt. Verū quid Deus ipse per os Prophetarum in eos qui Ecclesię instaurationē non promoueat, aut afflictionē negligent, passim decernat, audiendū est. Gaditæ, Rubenitæ, & dimidia

tribus

tribus Manasse, petunt à Mose suã sibi suisq; familiis portionẽ tribui cis Iordanẽ. Et Moses quidẽ tribuit: verũ ea lege atque conditione, vt Fratres, ceteros, inquã, Israelitas, in consequenda terra Chanaan non adiuuent modò; verũ, quia primi portionem obtinuerunt, præcedant eos, & in prima acie sint collocati. Sin minus; eosdem diris deuouet, anathemate percutit, atque iis comparat, qui ad Cadesbarne rebelles iudicati fuerant. Quid enim? ait: Fratres vestri belligerabũtur; vos verò interea hĩc quiescetis? Quin potiùs traicietis Iordanẽ, nec priùs huc ad penates vestros regrediemini, quàm Deus hostes suos expulerit à facie sua, requiẽmq; fratribus vestris, non secus ac vobis, concesserit. Tum demum verò innocentes eritis coram Domino & Israele; nimirum quos primos tanto beneficio dignatus est Deus optimus maximus, ni fratres adiuuent, ni laborum socij sint, ni præcedant, grauissimẽ pœnẽ proculdubio manent. Consimiliter cùm Debora duce, Nephthalitæ & Zabulonenses in Iabinum tyrannũ arma cepissent, ac interim tribus Ruben; quæ prima in armis esse debuerat, se fistula inter gregum pascua oblectaret;

Num. 32.
Iosue c. 4. v. 12.
Deuter. c. 3. ver. 20.

Indic. 5.

Galaad intermedio amne sese tutum putaret; Dan maris imperium iactaret; Affer denique montium asperitate confideret; Spiritu Dei per Prophetissam loquente, differtissimè omnes damnantur. Maledicite Meroz, ait Angelus Domini, diris devoute habitatores eius; quia non venerunt in auxilium Domini cum strenuis. At benedicta Iahel vxor Heberi Cinæi, quæ (licet fœdus cum gentibus causari potuisset) Sisaram nihilo minus ipsum hostilis exercitus ducem confodit. Itaque piè Vrias: Arca, inquit, Israel, Iuda, habitant sub tentoriis, sub pellibus degunt, noctem sæpe infomnem sub dio transigunt: ego verò cum vxore epulabor, genio indulgebo, delitabor? Viuit Deus, nunquam hoc faciam.

Impiè contrà principes Israel, qui montiū Samariæ difficultate, Sionisq; munitione freti, luxu diffluunt, enuiuantur, comestantur, in eburneis lectis dormiunt, capillitiū pervngunt. Interea verò Iosephum contritum, cruciatum, mirè vexatum despiciunt, nec eius afflictione vllò modo commouentur. Propterea verò, ait Deus exercituum, superbiam domus Iacob odi, magnificas ipsius ædes derestor. Iuraui per animam meam; Tradam ciuitatem, & circuitum

2. Sam. c. 11.
vers. 11.

Amos 6.

cuitum eius. Qui verò tantopere luxuriabantur, in transmigratione mox primi erunt. Impiè quoque Ephraimitæ, qui Gedeoni & Iephthæ victoriam adeptis & triūphantibus non modò nō gratulantur, verum invident; quos tamen periclitantes deseruērunt. Item Israelitę, qui Dauide rerum porito, exclamant: En caro tua, & ossa tua sumus nos: qui prius, eodem in angustias redacto, dicebant; Non est nobis pars in Dauide, nō in filio Isai. Impiè Christiani illi nomine tenus omnes, qui sacris Ecclesię epulis communicare volunt, calicem amaritudinis cum fratribus ne degustāt quidem, qui salutē in Ecclesia quærunt, salutem & incolumitatē ecclesię & membrorum suorum non curant. Deniq; vnum Patrem Deum, vnam familiam ecclesiā agnoscunt, vnum te in Christo corpus esse profitentur: neq; tamen aut Christo in mēbris affecto opem ferunt, aut inopi opes suas impertiuntur. Quam verò eius impietatis pœnam futurā putamus? Moses comparat desertores fratrum, rebeliebus Cadesbaine. Horum verò nemo, ita decernente Deo, terram Chanaan ingressus est. Ne villam itaq; in Chanaan celesti sibi sedem quęrant, qui Christo miserrimè

Iudic. 8. & 12.

2. Sam. c. 5.

Numer. 32.

cruciato, ac millies quotidie morienti, opémque illorum ostiatim quasi imploranti non subveniunt. Christus ipse æterno igni damnat eos, qui ipsum peregrinantē non exceperunt, frigentem nō fouerunt, nudum non vestierunt, inopem non iuuerunt, captiuum non liberarunt. Ignem itaque æternum paratum sibi sciant oportet, qui quotidie talia patientē, surda aure prætereunt, quantumvis magna interim miracula edere videantur: & adeò quiddē, vt quibusvis infidelibus tolerabilius, quàm illis futurum sit. Quid enim? Iudæine propriè, Scribæ, inquam, & Pharisæi, Christum crucifigunt? Ethnicine, Turcæ, Christiani denique quidam in membris suis persequuntur, cruciant, divexant? Minimè sanè. Iudæi impostorem, Ethnici maleficum, Turcæ infidelem, alij hæreticum credunt & profitentur. Itaque si mentem illorum omnium spectes, è qua vulgò crimen metimur, noxios illi omnes, impios & pœnam meritos persequi, Christum propriè occidere non videntur. At verè persequuntur, verè occidunt ij tantùm, qui quem Messiam, Redemptorem, Deum profitentur, in suis membris torqueri ac crucifigi, cùm impedire

dire possint, vltro patiuntur. In summa: qui *August. in*
quem neci eripere potest, non eripit; equè *ps. 82.*
tenetur, ac qui occidit. Quia enim noluit *Ambros. lib.*
opem ferre, voluit occidi. In crimine verò *1. de Offic.*
voluntas ipsa spectari debet. At certè eo *Gratian. in*
gravius est, Christianorū præsertim Prin- *Decret.*
cipum, qui Religionis causa vexatis opem
nō ferunt, homicidium, quo plures, quos
liberare possent, interficiunt; & quo fra-
trem, quàm quemlibet, interficere, scele-
ratiusest. Atrocius, quàm ipsorum Tyrā-
norum scelus: quo virum bonum, iustum,
pium, innocentem, quàm latronem, im-
postorem, magum, hæreticum interfi-
cere: quo Deum, quàm quemlibet homi-
nem perere, flagitiosius est. quo denique
perfidia in pari facto ignorantiam su-
perat.

An verò de iis, qui tyrannide oppressis
rémve publicam adversus tyrānidē defen-
dentibus, nō opē ferunt, idem statuere li-
cebit? cū nō tam arctē necessitudinis, non
tam arcti fœderis ratio habeatur; cum, in-
quam, non de Ecclesia, quæ vna omnium
est, quæ vna vniuersa; singulis commis-
sa est: sed de Republica, quæ alia aliorum
esse potest, alia aliis sigillatim com-
mendata est, hīc agatur? Proximus est,

ait Christus, nō Iudæus Iudæo tantū, sed Samaritano, & cuivis homini. Proximum autem debemus, vt nos ipsos, amare. Itaq; nō Iudæus Iudæū tantū, sed & quēlibet peregrinum etiam & ignotum, latroni, si possit, eripere tenetur, si officio suo satisfacere velit. Nec disputabit quisquam, an liceat alium defendere, qui seipsum tueri iustum iudicabit: cū sanè alium, quā femetipsum, defendere eo iustius sit, quo quæ mera caritas, quā quæ aut ira, aut vindicta, aut alia animi perturbatio facit, iustiora existunt, & in propriis iniuriis vlciscēdis, nemo modum teneat: in alienis, licet grauioribus, immoderatissimi quiq; modum tenere possint. Verū, est quod ab Ethnicis ipsis discamus, quid à nobis humana societas hac in re, quidque communis omnium natura requirat. Quia, ait Cicero, vna omnium hominū natura est, hoc vel Natura ipsa præscribit, vt homo homini, quicumque sit, ob eam ipsam tamen causam, quod homo sit, consultum velit. Sin minus; omnis humana cōsociatio dissoluatur, necesse est. Itaq; vt iustitię duo fundamenta sunt: primū, ne cui noceatur; deinde, vt omnium, si fieri possit, vtilitati seruiatur: ita & iniustitię duo genera

*Cic. lib. 1.
& 3. Off.*

nera sunt; vnum eorum, qui inferunt; alterum eorum, qui ab iis, quibus infertur, si possunt, nō propulsant iniuriā. Nam qui iniuste in quempiam facit, aut ira, aut aliqua perturbatione incitatus, is quasi manus violenter videtur afferre socio: qui autem non defendit, nec obsistit, si potest, iniuriæ, tam est in vitio, quàm si aut parētes, aut amicos, aut patriam deserat. Ita, quod ille facit, ira facere iudicatur, quæ furor brevis censetur: quod hic, mala mēs verè & malus animus, qui tyrannus perpetuus est. Et illius furor vtcumque, huius destinatum consilium nulla ratione excusari queat. Dices: Vereor, ne dum ab illo iniuriam depello, huic faciam iniuriā. Imò verò iustitiæ prætexu iniustitiam tuam tegere vis. cū, si te ipse cōsulas, nō te iustitia, vt officium deseras, sed quævis alia causa potiùs moueat. Etenim, vt ait ille alio loco, aut inimicitias, aut laborem, aut sumptus suscipere non vis, aut etiam negligentia, pigritia, inertia, aut tuis studiis, quibusdāve occupationibus sic impediris, vt eos, quos tutari debeas, desertos esse patiaris. Dum verò tuum tē negotium agere dicis, ne cuiquam facere videaris iniuriam, in alterum iniustitiæ genus

*Diod. Sic.
lib. 2. cap. 2.*

incurris. Deferis enim vitæ societatem: quia nil confers in eam studij, nil operæ, nil facultatum. Hæc Ethnici philosophi & politici, piè sanè magis, quàm multi hoc sæculo Christiani. Hinc vicinus, ni domino sæuienti seruū eripiat, legibus Romanorum tenetur. Apud Ægyptios verò, qui obiter hominem à latronibus cædi, aut quamlibet iniuriam pati comperisset, neque subuenisset, si potuisset; mortis erat reus: sin minus, latrones coram magistratu accusare tenebatur. Quod si neglexisset; plagis ad certum numerum, triduanoque ieiunio plectebatur. Quod si id verò vicino in vicinum iure licet; imò ex officio incumbit; si obvio cuique in latronem: an non multò magis licebit bono principi, non seruis quidem aduersus sæuientem dominum, aut filiis aduersus furentem patrem; sed regno aduersus tyrannum, reipublicæ aduersus priuatam vnius libidinem, populo, domino, inquam, aduersus seruum & actorem publicum, opem ferre & patrocinari? imò verò si neglexerit; an non, vt ille latronis, hic tyranni nomen pœnâsque merebitur? Hinc

*Thucyd. lib.
1.*

Thucydides, Non ij modò, ait, tyranni sunt, qui alios in seruitutem redigunt, verum
rùm

rùm longè potius ij, qui, cùm eam violentiam reprimere possint, non curant. in primis verò, qui Defensores Græciæ & communis patriæ vocitari volunt; patriæ verò oppressæ non opitulantur. & rectè. Tyrannus enim quam violenter invadit tyrannidem, violenter retinere quodāmodo cogitur. quia lupum, ut dicebat Tyberius, auribus tenere sibi videtur, quem neque absque vi retinere, neque absque periculo dimittere potest. Itaque crimen crimine ut extinguat, multa scelera patrat, ac aliis iniuriam inferre cogitur, ne sibi ipse iniuriosus sit. Hic verò princeps, qui tyranni scelera, innocentumque cædem, quæ impedire potest, otiosus spectat; quia ex eo quasi gladiatorio ludo voluptatem captat, tantò tyranno criminiosior est, quantò qui gladiatores committit, ipso homicida gladiatore; quātò qui voluptatis causa, eo qui metu necessitateve coactus, hominē interficit. Si opponūt quidā: Verū culpa est, rei alienę sese immiscere: respondeat Terentianus Chremes: Homo sum: humani à me nihil alienū puto. Si, qđ alij, ut latebras impietati querāt, distinctos esse limites, distinctas iurisdictiones; in alienā verò messem falcē iniicere nō licere:

*Pompon. de
reg. iuris,
leg. 6.*

Cic. 1. Off.

nec ego sanè consulo, vt eo prętextu fines alienos invadas, iurisdictionē alterius ad te rapias, messē vicini in areā tuā traducas, quod pleriq; eo prętextu faciunt. Nō, inquam, vt arbitri illius exemplo, de quo Cicero, rem controversam tibi ipse adiudices. Quin potius principē regnū Christi invadentem coerceas, tyrannum intra limites suos contineas, populo afflicto, reipublicæ prostratæ, manum auxiliarem porrigas. Ita verò id præstes, vt non tuę utilitati, sed humanę societati omnino cōsulas. Cū enim iustitia tota foras spectet; iniustitia sui tantū rationem habeat: iustē demum id feceris, si commodorū tuorum rationem nullam habueris. Breuiter, si princeps fixos pietatis & iustitię limites violēter transilit, poterit vicinus piē iustęque extra limites suos prosilire, non vt invadat aliena, sed vt suis illum contentum esse iubeat: quin impius & iniustus erit, si negligat. Si princeps in populum tyrānidē exerceat, nō minus aut segnius illi opē feret, quā illi, si populus seditionē moueat: imò eò promptiūs debebit, quò plures, quā vnum pati, miserabilius est. Si Persena Tarquinius Superbum Romam reducat; multò æquius Constantinus à populo

populo senatúq; Romano accersitus, Maxentium tyrannū vrbe expellet. Denique, si homo homini lupus fiat, quin & homo homini deus, vt est in proverbio, esse possit, nil planè vetat. Itaque Herculem in deorum numerū retulit Antiquitas, quòd Procrustem, Busyridem, & alios tyrānos, humani generis pestes, orbisque monstra vbique terrarum puniret & domaret. Sic & imperium Romanum, quamdiu liberū stetit, Orbis terræ adversus tyrannorum *Cic. 2. Off.* latrocinia patrocinium vocitabatur: quia regum, populorum, nationum portus & refugium erat Senatus. Sic Constantinus à Romanis in Maxentium tyrannum accersitus, ducē exercitus Deū habuit, cuius expeditionem vniuersa ecclesia miris laudibus extulit, cū tamen eandem haberet authoritatem Maxentius in Occidente, quam in Oriente Constantinus. Carolus Magnus quoque in Lōgobardos bellum suscepit, à Patriciis Italię in auxilium vocatus; cū tamen & Longobardorum regnum iampridem stabilitum esset, & nihil ipse iuris in illos sibi vindicare posset. Consimiliter cū Carolus Caluus rex Francorum, præsidem eius regionis, quæ Sequanam & Ligerim amnes interiacet,

Ioan. Auentin. in Annal. Boioaria.

Lambertum ducem & Iamætium per tyrannidem de medio sustulisset, ac cæteri Galliæ optimates ad Ludouicum Germaniæ regē, Caroli ex alia matre fratrem, confugissent, auxiliū in Caluū eiūsq; matrem Iudithā, sceleratissimā fœminam petituri: is in amplissimo principū Germaniæ cœtu supplices audiuit, quorū vnanimi cōsilio, restituendis exulibus, bellū in Caluū publicè decretum fuit. Denique, vt tyranni vbique locorū extiterunt aliqui; ita & apud omnes Historiographos vindicatæ per Principes vicinōs tyrānidis, defensiq; populi exempla passim extant, quæ principes hodierni, in tyrannis tum corporū, tum animæ, tū reipub. tum ecclesiæ Christi, coërcendis, imitari debent, ni ipsi tyrāni meritissimo iure nominari velint.

Ac (vt tandē vno verbo hunc tractatū cōcludamus) iubet pietas, legē Dei custodire, Ecclesiāq; tueri; iustitia, tyrannos, iuris rei que publicæ eversores, coërcere; charitas, oppressis succurrere, manumque adiutricem præbere. Qui verò hæc tollūt, pietatem, iustitiam, charitatem de medio tollere & extinguere omnino volunt.

FINIS.

ALPHONSVS MENESIVS

*Benauides, Tarraconensis, Gal-
liam adloquitur.*

GALLIA, quid sæuo toties fremis horrida motu;
Religio sanctas flet laniata comas?
Cur populus bello regem, populumq; vicissim
Rex petit? indigno terra cruore rubet?
Cur fratrem frater lacerat? cur viscera ciuis
In sua crudeles ipse acuit gladios?
Vnde animis nouus iste furor? quæ tanta libido,
Sanguine cognato commaculare manus?
Scilicet, vt quondam, stabulis emissus Iberis,
Prata per, & campos, & iuga, fertur equus:
Aut ratis in scopulos errat peritura latentes;
Nullus vbi celsa puppe magister adest:
Haud aliter, legum populo dum fræna relaxas,
Dum Regi soluis vincula, tota ruis.
At, populum & regem solitis tu siste lupatis,
Ilicet antiquus restituetur honos.
Si ponas illi leges, hic seruet easdem,
Adtolles sursum, Gallia, læta caput.
Tu modò ne monitis aures præbere recusa,
Diuino Brutus quæ pius ore canit.
Candida pax primum cocat, Concordia surgat,
Fœdere sacrorum consocianda tibi:
Bis seni, vt solitum, Procures moderentur habenas,
Quos Patriæ patres dicitis, atque Pares:

Queis olim ducibus Rex atque auctoribus usus,
Arma foris rexit, templa, forumq; domi.
Moribus antiquis, Regni Conventus agatur
Legitimus, STATVVM nomine TERGEMINVM.
Hoc Regum indomitos freno distringere gressus,
His placeat loris colla superba regi.
Nam si nec leges, nec publica commoda rerum,
Vnius arbitrio cuncta licere sinunt;
Quis nouus hic mos est? quæ tanta licentia? Gallus
Cur Princeps legum vincula nulla ferat?
Non licuit Regi, ius, vectigalia, censum,
Aut pacem, aut forti bella gerenda manu,
Connubij aut tædas, noua vel decernere pacta;
Ni Populus, veteri more, iuberet idem.
Ab: anne ille tamen, nostri ô graue dedecus æui,
Tunc Mahometanis miscuit arma pia,
Et pepigit sibi, captiuas vrbesq; domosq;,
At capita, & prædam, barbære Turca, tibi?
Germanæ thalamos an tunc laniena, suorum
Sanguine fœdabat? Marsq;, Hymenæus erat?
Non ita Rex Populo semper tutorq;, paterq;:
Et Populus, proles Regis amica fuit.
Tunc potuit Pietas Regem, Populumq; fidelis
Commendare animus, tunc bene iunctus amor.
Fraudibus atque dolis te non instruxerat ille
Tusculus adhuc, vitiis imbueratq; suis.
Fregerat arte fidem nemo, iurataq; Pacis
Numina. non vlli, fallere, ludus erat.

Sed

Sed Rex, Traiano similis : si iura secutus,
Et patrias leges, impero, Galle, tibi;
Hoc pro me, dixit, gladio Dux vtere in hostem:
Sin secus, hunc ipsum pectore conde meo.
Felix ò nimium, Pietas dum provida, Regni
Ordine tergemino te moderata fuit.
Verum vbi successit senibus scelerata Iuventus;
Consilis prauis, stultitiâq; peris.
Nonne ego iam video, crudelibus vndique flammis
Sacra triumphari ? non, tua iura rapi ?
Non ego Nobilibus cædes, aconita parari ?
Et nullum priscis legibus esse locum ?
Iustitiæq; decus temni ? Virtutis honores ?
Et pessum Christi funditus ire fidem ?
Sume animos fortes tamen, & patria adsere iura.
Præsto erit, audeto, numen ab arce Poli.
Fœdus ini, leges renoua, duce & auspice Christo.
Hic tua certa salus, præsidiumq; tuum.
Si levis anxietas, si te spes vana moratur,
Eximit has Brutus, Gallia, ritè tibi.
Quin ego, te, quamvis telluris alumnus Iberæ,
Hostis & à patrij condicione soli,
Si licet, hortor idem, miseratus damna tuorum,
Tot Populi cædes, tot fera fata Ducum.
Credo equidè: hæc vincens immania mōstra malorū,
Inscribes domitis, BRUTE, MAGISTER ERAS.





